

অন্নদামঞ্জল

ভারতচন্দ্র রায় গুণাকর

BANGLADARSHAN.COM

গণেশ-বন্দনা

গণেশায় নমঃ নমঃ আদিব্রহ্ম নিরূপম
পরমপুরুষ পরাৎপর।
খর্ব্ব স্থূল কলেবর গজমুখ লম্বোদর
মহাযোগী পরমসুন্দর॥
বিঘ্ন নাশ কর বিঘ্নরাজ।
পূজা হোম যোগ যাগে তোমার অর্চনা আগে
তব নামে সিদ্ধ সর্ব্ব কাজ॥
স্বরগ পাতাল ভূমি বিশ্বের জনক তুমি
সৃষ্টি স্থিতি প্রলয়ের মূল।
শিবের তনয় হয়ে দুর্গারে জননী কয়ে
ত্রীড়া কর হয়ে অনুকূল॥
হেলে শুণ্ড বাড়াইয়া সংসার সমুদ্র পিয়া
খেলাছলে করহ প্রলয়।
ফুৎকারে করিয়া বৃষ্টি পুন কর বিশ্ব সৃষ্টি
ভাল খেলা খেল দয়াময়॥
বিধি বিষ্ণু শিব শিবা ত্রিভুবন রাত্রি দিবা
সৃষ্টি পুন করহ সংহার।
বেদে বলে তুমি ব্রহ্ম তুমি জপ কোন্ ব্রহ্ম
তুমি সে জানহ মর্ম্ম তার॥
যে তুমি সে তুমি প্রভু জানিতে না পারি কভু
বিধি হরি হর নাহি জানে।
তব নাম লয় যেই আপদ এড়ায় সেই
তুমি দাতা চতুর্ভুগ দানে॥
আমি চাহি এই বর শুন প্রভু গণেশ্বর
অন্নপূর্ণামঙ্গল রচিব।
কৃপাবলোকন কর বিঘ্নরাজ বিঘ্ন হর
ইথে পার তবে সে পাইব॥
আপনি আসরে উর নায়কের আশা পূর
নিবেদিনু বন্দনা বিশেষে।

কৃষ্ণচন্দ্র ভক্তি আশে

ভারত সরস ভাষে

রাজা কৃষ্ণচন্দ্রের আদেশে॥

শিব-বন্দনা

শঙ্করায় নমঃ নমঃ

গিরিসুতাপ্রিয়তম

বৃষভবাহন যোগধারী।

চন্দ্র সূর্য্য হুতাশন

সুশোভিত ত্রিনয়ন

ত্রিগুণ ত্রিশূলী ত্রিপুরারী॥

হর হর মোর দুঃখ হর।

হর রোগ হর তাপ

হর শোক হর পাপ

হিমকরশেখর শঙ্কর॥

গলে দোলে মুণ্ডমাল

পরিধান বাঘছাল

হাতে মুণ্ড চিতাভস্ম গায়।

ডাকিনীযোগিনীগণ

প্রেত ভূত অগণন

সঙ্গে সঙ্গে নাচিয়া বেড়ায়॥

অতিদীর্ঘ জটাজুট

কণ্ঠে শোভে কালকূট

চন্দ্রকলা ললাটে শোভিত।

ফণী বালা ফণী হার

ফণিময় অলঙ্কার

শিরে ফণী ফণী উপবীত॥

যোগীর অগম্য হয়ে

সদা থাক যোগ লয়ে

কি জানি কাহার কর ধ্যান।

অনাদি অনন্ত মায়া

দেহ যারে পদছায়া

সেই পায় চতুর্ভুজ দান॥

মায়ামুক্ত তুমি শিব

মায়ামুক্ত তুমি জীব

কে বুঝিতে পারে তব মায়া।

অজ্ঞান তাহার যায়

অনায়াসে জ্ঞান পায়

যারে তুমি দেহ পদছায়া॥

নায়কের দুঃখ হর

মোর গীত পূর্ণ কর

নিবেদিনু বন্দনা বিশেষে।
কৃষ্ণচন্দ্র ভক্তি আশে ভারত সরস ভাষে
রাজা কৃষ্ণচন্দ্রের আদেশে॥

সূর্য্য-বন্দনা

ভাস্করায় নমঃ হর মোর তমঃ
দয়া কর দিবাকর।
চারি বেদে কয় ব্রহ্ম তেজোময়
তুমি দেব পরাৎপর॥
দিনকর চাহ দীনে।
তোমার মহিমা বেদে নাহি সীমা
অপরাধ ক্ষম ক্ষীণে॥
বিশ্বের কারণ বিশ্বের লোচন
বিশ্বের জীবন তুমি।
সর্ব্ব দেবময় সর্ব্ব বেদাশ্রয়
আকাশ পাতাল ভূমি॥
একচক্র রথে আকাশের পথে
উদয়গিরি হইতে।
যাহ অস্তগিরি এক দিনে ফিরি
কে পারে শক্তি কহিতে॥
অতিথর কর পোড়ে মহীধর
সিন্ধুর জল শুকায়।
পদ্মিনী কেমনে হাসে হৃষ্টমনে
তোমার তত্ত্ব কে পায়॥
দ্বাদশ মূর্তি গ্রহগণপতি
সংজ্ঞা ছায়া নারী ধন্যা।
শনি যম মনু তব অঙ্গজনা
যমুনা তোমার কন্যা॥

বিশ্বের রক্ষিতা বিশ্বের সবিতা
তাই সে সবিতা নাম।
তুমি বিশ্বসার মোরে কর পার
করিএ কোটি প্রণাম॥
কোকনদোপর থাক নিরন্তর
অশেষ গুণসাগর।
বরাভয় কর ত্রিনয়ন ধর
মাথায় মাণিকবর॥
স্মরিলে তোমায় পাপ দূরে যায়
আসরে সদয় হয়ে।
কৃষ্ণচন্দ্র ভূপে চাহিবে স্বরূপে
ভারতচন্দ্রের স্তবে॥

BANGLADARSHAN.COM

বিষ্ণু-বন্দনা

কেশবায় নমঃ নমঃ পুরাণ পুরুষোত্তম
চতুর্ভূজ গরুড়বাহন।
বরণ জলদঘটা হৃদয়ে কৌস্তভছটা
বনমালা নানা আভরণ॥
কৃপা কর কমললোচন।
জগন্নাথ মুরহর পদ্মনাভ গদাধর
মুকুন্দ মাধব নারায়ণ॥
রাম কৃষ্ণ জনার্দন লক্ষ্মীকান্ত সনাতন
হৃষীকেশ বৈকুণ্ঠ বামন।
শ্রীনিবাস দামোদর জগদীশ যজ্ঞেশ্বর
বাসুদেব শ্রীবৎসলাঞ্জন॥
শঙ্খ চক্র গদাম্বুজ সুশোভিত চারি ভুজ
মনোহর মুকুট মাথায়।
কিবা মনোহর পদ নিরুপম কোকনদ

রতননূপুর বাজে তায়॥
পরিধান পীতাম্বর অধর বাঙ্কুলীবর
মুখসুধাকরে সুধা হাস।
সঙ্গে লক্ষ্মী সরস্বতী নাভিপদে প্রজাপতি
রূপে ত্রিভুবন পরকাশ॥
ইন্দ্র আদি দেব সব চারি দিকে করে স্তব
সনকাদি যত ঋষিগণ।
নারদ বীণার তানে মোহিত যে গুণগানে
পঞ্চ মুখে গান পঞ্চগনন॥
কদম্বের কুঞ্জবনে বিহর সানন্দ মনে
শীতল সুগন্ধ মন্দ বায়।
ছয় ঋতু সহচর বসন্ত কুসুমশর
নিরবধি সেবে রাজা পায়॥
ভৃঙ্গের হৃষ্কার রব কুহরে কোকিল সব
পূর্ণ চন্দ্র শরদযামিনী।
বীণা বাঁশী আদি যন্ত্রে গান করে কামতন্ত্রে
ছয় রাগ ছত্রিশ রাগিণী॥
উর প্রভু শ্রীনিবাস নায়কের পূর আশ
নিবেদিনু বন্দনা বিশেষে।
ভারত ও পদআশে নূতন মঙ্গল ভাষে
রাজা কৃষ্ণচন্দ্রের আদেশে॥

কৌষিকী-বন্দনা

কৌষিকী কালিকে চণ্ডিকে অম্বিকে
প্রসীদ নগনন্দিনি।
চণ্ডবিনাশিনি মুণ্ডনিপাতিনি
শুম্ভনিশুম্ভঘাতিনি॥
শঙ্করি সিংহবাহিনি।

মহিষমর্দিনি দুর্গবিঘাতিনি
রক্তবীজনিকৃন্তিনি ॥
দিনমুখরবি কোকনদ ছবি
অতুল পদ দুখানি।
রতননূপুর বাজয়ে মধুর
ভ্রমরবঙ্কার মানি ॥
হেমকরিকর উরু মনোহর
রতন কদলিকায়।
কটি ক্ষীণতর নাভি সরোবর
অমূল্য অম্বর তায় ॥
কমল কোরক কদম্বনিন্দক
করিসুতকুম্ভ উচ।
কাঁচুলি রঞ্জিত অতি সুশোভিত
অমৃতপূরিত কুচ ॥
সুবলিত ভূজ সহিত অম্বুজ
কনক মৃগাল রাজে।
নানা আভরণ অতি সুশোভন
কনক কঙ্কণ বাজে ॥
কোটি শশধর বদন-সুন্দর
ঈষদ মধুর হাস।
সিন্দুরমার্জিত মুকুতারঞ্জিত
দশনপাঁতি প্রকাশ ॥
সিন্দুর চন্দন ভালে সুশোভন
রবি শশী এক ঠাই।
কেবা আছে সমা কি দিব উপমা
ত্রিভুবনে হেন নাই ॥
শিরে জটাজুট রতন মুকুট
অর্ধ শশী ভালে শোভে।
মালতীমালায় বিজুলি খেলায়
ভ্রমর ভ্রময়ে লোভে ॥
কহি জোড়করে উরহ আসরে
ভারতে করহ দয়া।

BANGLADARSHAN.COM

কৃষ্ণচন্দ্র রায়ে

রাখ রাঙ্গা পায়ে

অভয় দেহ অভয়া॥

লক্ষ্মী-বন্দনা

উর লক্ষ্মি কর দয়া।

বিষ্ণুর ঘরণী

ব্রহ্মার জননী

কমলা কমলালয়॥

সনাল কমল

সনাল উৎপল

দুখানি করে শোভিত।

কমল আসন

কমল ভূষণ

কমলমাল ললিত॥

কমল চরণ

কমল বদন

কমল নাভি গভীর।

কমল দু কর

কমল অধর

কমলময় শরীর॥

কমলকোরক

কদম্বনিন্দক

সুধার কলস কুচ।

করি অরি মাজে

জিনি করিরাজে

কুন্তযুগচারু উচ॥

সুধাময় হাস

সুধাময় ভাষ

দৃষ্টিতে সুধা প্রকাশ।

লাক্ষ্মার কাঁচুলি

চমকে বিজুলি

বসন লক্ষ্মীবিলাস॥

রূপ গুণ জ্ঞান

যত যত স্থান

তুমি সকলের শোভা।

সদা ভুঞ্জে সুখ

নাহি জানে দুখ

যে তব ভকতিলোভা॥

সদা পায় দুখ

নাহি জানে সুখ

তুমি হও যারে বাম।
সবে মন্দ কয় নাম নাহি লয়
লক্ষ্মীছাড়া তার নাম॥
তব নাম লয়ে লক্ষ্মীপতি হয়ে
ত্রিলোক পালেন হরি।
যাদোগণেশ্বর হৈলা রত্নাকর
তোমারে উদরে ধরি॥
যে আছে সৃষ্টিতে নাম উচ্চারিতে
প্রথমে তোমার নাম।
তোমার কৃপায় অনায়াসে পায়
ধর্ম অর্থ মোক্ষ কাম॥
উর মহামায়া দেহ পদছায়া
ভারতের স্তুতি লয়ে।
কৃষ্ণচন্দ্র বাসে থাক সদা হাসে
রাজলক্ষ্মী স্থিরা হয়ে॥

BANGLADARSHAN.COM

সরস্বতী-বন্দনা

উর দেবী সরস্বতি স্তবে কর অনুমতি
বাগীশ্বর বাক্যবিনোদিনি।
শ্বেত বর্ণ শ্বেত বাস শ্বেত বীণা শ্বেত হাস
শ্বেতসরসিজনিবাসিনি॥
বেদ বিদ্যা তন্ত্র মন্ত্র বেণু বীণা আদি যন্ত্র
নৃত্য গীত বাদ্যের ঈশ্বরী।
গন্ধর্ব্ব অঙ্গরগণ সেবা করে অনুক্ষণ
ঋষি মুনি কিন্নর কিন্নরী॥
আগমের নানা গ্রন্থ আর যত গুণপন্থ
চারি বেদ আঠার পুরাণ।
ব্যাস বাল্মীকাদি যত কবি সেবে অবিরত

দারিদ্র্য দুর্গতি কর চূর্ণ।
তুমি দেবী পরাংপরা সুখদাত্রী দুঃখহরা
অন্নপূর্ণা অন্নে কর পূর্ণ॥
রক্তসরসিজোপরি বসি পদাসন করি
পদতলে নবরবি দেখা।
রক্তজবাপ্রভাহর অতিমনোহরতর
ধ্বজবজ্রাঙ্কুশ উর্ধ্বরেখা॥
কিবা সুবলিত উরু কদলীকাণ্ডের গুরু
নিরুপম নিতম্বে কিঙ্কিণী।
শোভে নিরুপম বাস দশ দিশ পরকাশ
ত্রিভুবনমোহনকারিণী॥
কটি অতি ক্ষীণতর নাভি সুধাসরোবর
উচ্চ কুচ সুধার কলস।
কণ্ঠ কম্বুরাজ রাজে নানা অলঙ্কার সাজে
প্রকাশে ভুবন চতুর্দশ॥
কিবা মনোহর কর মৃগালের গর্ভহর
অপুলী চম্পকচারুদল।
ফণিরাজফণমণি কঙ্কণের কণমণি
নানা অলঙ্কার বলমল॥
বাম করতলে ধরি কারণ-অমৃত ভরি
পানপাত্রে রতননির্মিত।
রত্ন হাতা ডানি হাতে সঘৃত পলান্ন তাতে
কিবা দুই ভুই সুললিত॥
চর্ক্য চুম্ব্য লেহ্য পেয় নানা রস অপ্রমেয়
বিবিধ বিলাসে পরশিয়া।
ভুঞ্জাইয়া কৃন্তিবাস মধুর মধুর হাস
মহেশের নাচন দেখিয়া॥
দেবতা অসুর রক্ষ অঙ্গুর কিম্বর যক্ষ
সবে ভোগ করে নানা রস।
গন্ধর্ভ্ব ভুজঙ্গ নর সিদ্ধ সাধ্য বিদ্যাধর
নব গ্রহ দিকপাল দশ॥
জিনি কোটি শশধর কিবা সুখ মনোহর

BANGLADARSHAN.COM

মণিময় মুকুট মাথায়।
ললিত কবরীভার তাহে মালতীর হার
ভ্রমর ভ্রমরী কল গায়॥
বিধি বিষ্ণু ত্রিলোচন আদি দেব ঋষিগণ
চৌদিকে বেড়িয়া করে গান।
আগম পুরাণ বেদ না জানে তোমার ভেদ
তুমি দেবী পুরুষ প্রধান॥
ঘটে কর অধিষ্ঠান শুন নিজ-গুণগান
নায়কের পূর্ণ কর আশ।
রাজার মঙ্গল কর রাজ্যের আপদ্ হর
গায়কের কণ্ঠে কর বাস॥
স্বপনে রজনীশেষে বসিয়া শিয়রদেশে
কহিলা মঙ্গল রচিবারে।
সেই আজ্ঞা শিরে বহি নূতন মঙ্গল কহি
পূর্ণ কর চাহিয়া আমারে॥
বিস্তর অন্নদাকল্পে কত গুণ কব অল্পে
নিজ গুণে হবে বরদায়।
নূতন মঙ্গল আশে ভারত সরস ভাষে
রাজা কৃষ্ণচন্দ্রের আজ্ঞায়॥

BANGLADARSHAN.COM

গ্ৰন্থসূচনা

অন্নপূৰ্ণা অপৰ্ণা অন্নদা অষ্টভুজা।
অভয়া অপৰাজিতা অচ্যুত অনুজা ॥
অনাদ্যা অনন্তা অম্বা অম্বিকা অজয়া।
অপৰাধ ক্ষম অগো অব গো অব্যয়া ॥
শুন শুন নিবেদন সভাজন সব।
যে ৰূপে প্ৰকাশ অন্নপূৰ্ণা মহোৎসব ॥
সুজা খাঁ নবাবসুত সৰ্ফৰাজ খাঁ।
দেয়ান আলমচন্দ্ৰ রায় রায়রায়া ॥
ছিল আলিবৰ্দি খাঁ নবাব পাটনায়।
আসিয়া কৰিয়া যুদ্ধ বধিলেক তায় ॥
তদবধি আলিবৰ্দি হইলা নবাব।
মহাবদজঙ্গ দিলা পাতশা খেতাব ॥
কটকে মূৰসীদকুলি খাঁ নবাব ছিল।
তাৰে গিয়া আলিবৰ্দি খেদাইয়া দিল ॥
কটকে হইল আলিবৰ্দিৰ আমল।
ভাইপো সৌলদজঙ্গে দিলেন দখল ॥
নবাব সৌলদজঙ্গ রহিলা কটকে।
মূৰাদবাখৰ তাৰে ফেলিল ফাটকে ॥
লুঠি নিল নারী গারী দিল বেড়ি তোক।
শুনি মহাবদজঙ্গ চলে পেয়ে শোক ॥
উত্তরিল কটকে হইয়া তুৰাপৰ।
যুদ্ধে হারি পলাইল মূৰাদবাখৰ ॥
ভাইপো সৌলদজঙ্গে খালাস কৰিয়া।
উড়িষ্যা কৰিল ছাৰ লুঠিয়া পুড়িয়া ॥
বিস্তৰ লক্ষৰ সঙ্গে অতিশয় জুম।
আসিয়া ভুবনেশ্বৰে কৰিলেক ধুম ॥
ভুবনে ভুবনেশ্বৰ মহেশ্বৰ স্থান।
দুৰ্গা সহ শিবৰ সৰ্বদা অধিষ্ঠান ॥
দুৰাত্মা মোগল তাহে দৌৰাত্ম্য কৰিল।

দেখিয়া নন্দীর মনে ক্রোধ উপজিল ॥
মারিতে লইলা হাতে প্রলয়ের শূল।
করিব যবন সব সমূল নির্মূল ॥
নিষেধ করিল শিব ত্রিশূল মারিতে।
বিস্তর হইবে নষ্ট একেরে বধিতে ॥
অকালে প্রলয় হৈল কি কর কি কর।
না ছাড় সংহারশূল সংহর সংহর ॥
আছয়ে বর্গির রাজা গড় সেতারায়ে।
আমার ভকত বড় স্বপ্ন কহ তায় ॥
সেই আসি যবনের করিবে দমন।
শুনি নন্দী তারে গিয়া কহিলা স্বপন ॥
স্বপ্ন দেখি বর্গিরাজা হইল ক্রোধিত।
পাঠাইল রঘুরাজ ভাস্কর পণ্ডিত ॥
বর্গি মহারাষ্ট্র আর সৌরাষ্ট্র প্রভৃতি।
আইল বিস্তর সৈন্য বিকৃতি আকৃতি ॥
লুঠি বাঙ্গালার লোকে করিল কাঙ্গাল।
গঙ্গা পার হইল বান্ধি নৌকার জাঙ্গাল ॥
কাটিল বিস্তর লোক গ্রাম গ্রাম পুড়ি।
লুঠিয়া লইল ধন ঝিউড়ী বহুড়ী ॥
পলাইয়া কোঠে গিয়া নবাব রহিল।
কি কহিব বাঙ্গালার যে দশা হইল ॥
লুঠিয়া ভুবনেশ্বর যবন পাতকী।
সেই পাপে তিন সুবা হইল নারকী ॥
নগর পুড়িলে দেবালয় কি এড়ায়।
বিস্তর ধার্মিক লোক ঠেকে গেল দায় ॥
নদীয়া প্রভৃতি চারি সমাজের পতি।
কৃষ্ণচন্দ্র মহারাজ শুদ্ধশান্তমতি ॥
প্রতাপতপনে কীর্তিপদ্ম বিকাসিয়া।
রাখিলেন রাজলক্ষ্মী অচলা করিয়া ॥
রাজা রাজচক্রবর্তী ঋষি ঋষিরাজ।
ইন্দ্রের সমাজ সম যাঁহার সমাজ ॥
কাশীতে বান্ধিলা জ্ঞানবাপীর সোপান।

BANGLADARSHAN.COM

উপমা কোথায় দিব না দেখি সমান॥
দেবীপুত্র বলি লোক যার গুণ গায়।
এহ পাপে সেহ রাজা ঠেকিলেন দায়॥
মহাবদজঙ্গ তাঁরে ধরে লয়ে যায়।
নজরানা বলে বার লক্ষ টাকা চায়॥
লিখি দিলা সেই রাজা দিব বার লক্ষ।
সাজোয়াল হইল সুজন সর্বভক্ষ॥
বর্গিতে লুঠিল কত কত বা সুজন।
নানামতে রাজার প্রজার গেল ধন॥
বন্ধ করি রাখিলেক মুরশিদাবাদে।
কত শত্রু কত মতে লাগিল বিবাদে॥
দেবীপুত্র দয়াময় ধরাপতি ধীর।
বিবিধ প্রকারে পূজা করিলা দেবীর॥
চৌত্রিশ অক্ষরে বর্ণাইয়া কৈলা স্তব।
অনুকম্পা স্বপনে হইল অনুভব॥
অন্নপূর্ণা ভগবতী মূর্তি ধরিয়া।
স্বপন কহিলা মাতা শিয়রে বসিয়া॥
শুন রাজা কৃষ্ণচন্দ্র না করিহ ভয়।
এই মূর্তি পূজা কর দুঃখ হবে ক্ষয়॥
আমার মঙ্গল গীত করহ প্রকাশ।
কয়ে দিলা পদ্ধতি গীতের ইতিহাস॥
চৈত্র মাসে শুক্ল পক্ষে অষ্টমী নিশায়।
করিহ আমার পূজা বিধিব্যবস্থায়॥
সভাসদ তোমার ভারতচন্দ্র রায়।
মহাকবি মহাভক্ত আমার দয়ায়॥
তুমি তারে রায় গুণাকর নাম দিও।
রচিতে আমার গীত সাদরে কহিও॥
আমি তারে স্বপ্ন কব তার মাতৃবেশে।
অষ্টাহ গীতের উপদেশ সবিশেষে॥
সেই আজ্ঞা মত রাজা কৃষ্ণচন্দ্র রায়।
অন্নপূর্ণা পূজা করি তরিলা সে দায়॥

BANGLADARSHAN.COM

সেই আজ্ঞা মত কবি রায় গুণাকর।
অন্নদামঙ্গল কহে নবরসতর॥

কৃষ্ণচন্দ্রের সভাবর্ণন

নিবেদনে অবধান কর সভাজন।
রাজা কৃষ্ণচন্দ্রের সভায় বিবরণ॥
চন্দ্রে সবে ষোল কলা হ্রাস বৃদ্ধি তায়।
কৃষ্ণচন্দ্র পরিপূর্ণ চৌষষ্টি কলায়॥
পদ্মিনী মুদয়ে আঁখি চন্দ্রে দেখিলে।
কৃষ্ণচন্দ্রে দেখিতে পদ্মিনী আঁখি মিলে॥
চন্দ্রের হৃদয়ে কালি কলঙ্ক কেবল।
কৃষ্ণচন্দ্রহৃদে কালী সর্বদা উজ্জ্বল॥
দুই পক্ষ চন্দ্রের অসিত সিত হয়।
কৃষ্ণচন্দ্রে দুই পক্ষ সদা জ্যোৎস্নাময়॥
প্রথম পক্ষেতে পাঁচ কুমার সূজন।
পঞ্চ দেহে পঞ্চমুখ হৈলা পঞ্চগনন॥
প্রথম সাক্ষাৎ শিব শিবচন্দ্র রায়।
দ্বিতীয় ভৈরবচন্দ্র ভৈরবের প্রায়॥
তৃতীয় যে হরচন্দ্র হর অবতার।
চতুর্থ মহেশচন্দ্র মহেশ আকার॥
পঞ্চম ঈশানচন্দ্র তুল্য দিতে নাই।
ফুলের মুখটী জয়গোপাল জামাই॥
দ্বিতীয় পক্ষের যুবরাজ রাজকায়।
মধ্যম কুমার খ্যাত শম্ভুচন্দ্র রায়॥
জামাতা কুলীন রামগোপাল প্রথম।
সদানন্দময় নন্দগোপাল মধ্যম॥
শ্রীগোপাল ছোট সবে ফুলের মুখটী।
আদান প্রদানে খ্যাত ত্রিকূলে পালটী॥
রাজার ভগিনীপতি দুই গুণধাম।

মুখটী অনন্তরাম চট্ট বলরাম॥
বলরাম চট্টসুত ভাগিনা রাজার।
সদাশিব রায় নাম শিব অবতার॥
দ্বিতীয় অনন্তরাম মুখুয়ের সুত।
রায় চন্দ্রশেখর অশেষ গুণযুত॥
ভূপতির ভাগিনীজামাই গুণধাম।
বাঁদুরি গোকুল কৃপারাম দয়ারাম॥
মুখ কৃষ্ণজীবন কৃষ্ণভক্তের সার।
পাঠকেন্দ্র গদাধর তর্ক অলঙ্কার॥
ভূপতির পিসা শ্যামসুন্দর চাটুতি।
তার কৃষ্ণদেব রামকিশোর সন্ততি॥
ভূপতির পিসার জামাই তিন জন।
কৃষ্ণগনন্দ মুখয্যা পরম যশোধন॥
মুখয্যা আনন্দিরাম কুলের আগর।
মুখ রাজকিশোর কবিতুকলাধর॥
প্রিয় জ্ঞতি জগন্নাথ রায় চাঁদ রায়।
শুকদেব রায় ঋষি শুকদেব প্রায়॥
কালিদাস সিদ্ধান্ত পণ্ডিত সভাসদ।
কন্দর্প সিদ্ধান্ত আদি কত পারিষদ॥
কৃষ্ণ মুখোপাধ্যায় কুলীন প্রিয় বড়।
মুক্তিরাম মুখয্যা গোবিন্দভক্ত দড়॥
গণক বাঁদুয়্যা অনুকূল বাচস্পতি।
আর যত গণক গণিতে কি শকতি॥
বৈদ্যমধ্যে প্রধান গোবিন্দরাম রায়।
জগন্নাথ অনুজ নিবাস সুগন্ধায়॥
অতিপ্রিয় পারিষদ শঙ্কর তরঙ্গ।
হরহিত রামবোল সদা অঙ্গসঙ্গ॥
চক্রবর্তী গোপাল দেয়ান সহবতি।
রায় বস্তুী মদনগোপাল মহামতি॥
কিঙ্কর লাহিড়ী দ্বিজ মুনশী প্রধান।
তার ভাই গোবিন্দ লাহিড়ী গুণবান॥
কালোয়াত গায়ন বিশ্রাম খাঁ প্রভৃতি।

BANGLADARSHAN.COM

মৃদঙ্গী সমজ খেল কিন্নর আকৃতি ॥
নর্তকপ্রধান শেরমামুদ সভায়।
মোহন খোষালচন্দ্র বিদ্যাধর প্রায় ॥
ঘড়ীয়াল কার্ত্তিক প্রভৃতি কত জন।
চেলা খানেজাদ যত কে করে গণন ॥
সেফাহীর জমাদার মামুদ জাফর।
জগন্নাথ শিরপা করিলা যার পর ॥
ভূপতির তীরের ওস্তাদ নিরুপম।
মুজঃফর হুসেন মোগল কর্ণসম ॥
হাজারি পঞ্চম সিংহ ইন্দ্রসেনসুত।
ভগবন্ত সিংহ অতি যুদ্ধে মজবুত ॥
যোগরাজ হাজারি প্রভৃতি আর যত।
ভোজপুরে সোয়ার বৌদেলা শত শত ॥
কুল্ল মালে রঘুনন্দন মিত্র দেয়ান।
তার ভাই রামচন্দ্র রাঘব ধীমান ॥
আমীন রাঢ়ীয় দ্বিজ নীলকণ্ঠ রায়।
দুই পুত্র তাহার তাহার তুল্য কায় ॥
বড় রামলোচন অশেষ গুণধাম।
ছোট রামকৃষ্ণ রায় অভিনব কাম ॥
দেয়ানের পেশকার বসু বিশ্বনাথ।
আমীনের পেশকার কৃষ্ণসেন সাথ ॥
রত্নগজ আদি গজ দিগ্গজ সংখ্যায়।
উচ্চৈঃশ্রবা উচ্চৈঃশ্রবা অশ্বের লেখায় ॥
হাবসী ইমামবক্স হাবসী প্রধান।
হাতী ঘোড়া উট আদি তাহার যোগান ॥
অধিকার রাজার চৌরাশী পরগণা।
খাড়ি জুড়ী আদি করি দপ্তরে গণনা ॥
রাজ্যের উত্তর সীমা মুরশিদাবাদ।
পশ্চিমের সীমা গঙ্গা ভাগীরথী খাদ ॥
দক্ষিণের সীমা গঙ্গাসাগরের ধার।
পূর্ব সীমা ধুল্যাপুর বড় গাঙ্গ পার ॥
ফরমানী মহারাজ মনসবদার।

BANGLADARSHAN.COM

সাহেব নহবৎ আর কানগোই ভার॥
কোঠায় কাঙ্গুরা ঘড়ী নিশান নহবৎ।
পাতশাহী শিরপা সুলতানী সুলতানৎ॥
ছত্র দণ্ড আড়ানী চামর মোরছল।
সরপেচ মোরছা কলগী নিরমল॥
দেবীপুত্র নামে রাজা বিদিত সংসারে।
ধর্মচন্দ্র নাম দিলা নবাব যাহারে॥
সেই রাজা এই অন্নপূর্ণার প্রতিমা।
প্রকাশিয়া পূজা কৈলা অনন্তমহিমা॥
কবি রায় গুণাকর খ্যাতি নাম দিয়া।
ভারতেরে আঞ্জা দিলা গীতের লাগিয়া॥
অন্নপূর্ণা ভারতেরে রজনীর শেষে।
স্বপন কহিলা মাতা তার মাতৃবেশে॥
অরে বাছা ভারত গুনহ মোর বাণী।
তোমার জননী আমি অন্নদা ভবানী॥
কৃষ্ণচন্দ্র অনুমতি দিলেন তোমারে।
মোর ইচ্ছা গীতে তুমি তেষহ আমারে॥
ভারত কহিলা আমি নাহি জানি গীত।
কেমনে রচিত গীত এ কি বিপরীত॥
অন্নদা কহিলা বাছা না করিহ ভয়।
আমার কুপার বলে বোবা কথা কয়॥
গ্রন্থ আরস্তিয়া মোর কুপা সাক্ষী পাবে।
যে কবে সে হবে গীত আনন্দে শিখাবে॥
এত বলি অমৃতান্ন মুখে তুলি দিলা।
সেই বলে এই গীত ভারত রচিলা॥

BANGLADARSHAN.COM

গীতারম্ভ

অল্পপূর্ণা মহামায়া সংসার যাঁহার মায়া

পরাংপরা পরমা প্রকৃতি।

অনির্বাচ্যা নিরূপমা আপনি আপন সমা

সৃষ্টি স্থিতি প্রলয় আকৃতি॥

অচক্ষু সর্বত্র চান অকর্ণ শুনিতে পান

অপদ সর্বত্র গতাগতি।

কর বিনা বিশ্ব গড়ি মুখ বিনা বেদ পড়ি

সবে দেন কুমতি সুমতি॥

বিনা চন্দ্রানলরবি প্রকাশি আপন ছবি

অন্ধকার প্রকাশ করিলা।

প্লাবিত কারণ জলে বসি স্থল বিনা স্থলে

বিনা গর্ভে প্রসব হইলা॥

শুণ সত্ত্বতমোরজে হরিহরকমলজে

কহিলেন তপ তপ তপ।

শুন বিধি হরি হর তিন জনে পরস্পর

করেন কারণ জলে জপ॥

তিনের জানিতে সত্ত্ব জানাইতে নিজ তত্ত্ব

শবরূপা হইলা কপটে।

পচাগন্ধ মাংস গলে ভাসিয়া কারণ জলে

আগে গেলা বিষ্ণুর নিকটে॥

পচা গন্ধে ব্যস্ত হরি উঠি গেলা ঘৃণা করি

বিধিরে ছলিতে গেলা মাতা।

পচা গন্ধে ভাবি দুখ ফিরিয়া ফিরিয়া মুখ

চারি মুখ হইলা বিধাতা॥

বিধির বুঝিয়া সত্ত্ব শিবের জানিতে তত্ত্ব

শিব অঙ্গে লাগিলা ভাসিয়া।

শিব জ্ঞানী ঘৃণা নাই বসিতে হইল ঠাই

যত্নে ধরি বসিলা চাপিয়া॥

দেখিয়া শিবের কৰ্ম্ম তাহাতে বসিল মৰ্ম্ম

ভার্য্যারূপা ভবানী হইলা।
পতিরূপ পশুপতি দুজনে ভুঞ্জিয়া রতি
ক্রমে সৃষ্টি সকল করিলা॥
বিধির মানস সুত দক্ষ মুনি তপযুত
প্রসূতি তাহার ধর্ম্মজায়া।
তার গর্ভে সতী নাম অশেষ মঙ্গল ধাম
জনম লভিলা মহামায়া॥
নারদ ঘটক হয়ে নানামত বলে কয়ে
শিবেরে বিবাহ দিলা সতী।
শিবের বিকট সাজ দেখি যক্ষ ঋষিরাজ
বামদেবে হৈলা বামমতি॥
সদাশিব নিন্দা করে মহা ক্রোধ হৈল হরে
সতী লয়ে গেলেন কৈলাসে।
দক্ষেরে বিধাতা বাম না লয় শিবের নাম
সদা নিন্দা করে কটু ভাষে॥
আরম্ভিয়া দেবযাগ নিমন্ত্রিল দেবভাগ
নিমন্ত্রণ না কৈল শঙ্করে।
যাইতে দক্ষের বাস সতীর হইল আশ
ভারত কহিছে জোড়করে॥

সতীর দক্ষালয়ে গমনোদেয়াগ

কালীরূপে কত শত পরাৎপরা গো।
অন্নদা ভুবনা বলা মাতঙ্গী কমলা
দুর্গা উমা কাত্যায়নী বাণী সুরবরা গো॥
সুন্দরী ভৈরবী তারা জগতের সারা
উন্মুখী বগলা ভীমা ধূমা ভীতিহরা গো।
রাধানাথের দুঃখভরা নাশ গো সতুরা
কালের কামিনী কালী করুণাসাগরা গো॥

নিবেদন শুনহ ঠাকুর পঞ্চানন।
যজ্ঞ দেখিবারে যাব বাপার ভবন॥
শঙ্কর কহেন বটে বাপঘরে যাবে।
নিমন্ত্রণ বিনা গিয়া অপমান পাবে॥
যজ্ঞ করিয়াছে দক্ষ শুন তার মর্শ্ব।
আমারে না দিবে ভাগ এই তার কর্শ্ব॥
সতী কন মহাপ্রভু হেন না কহিবা।
বাপঘরে কন্যা যেতে নিমন্ত্রণ কিবা॥
যত কন সতী শিব না দেন আদেশ।
ক্রোধে সতী হৈলা কালী ভয়ঙ্কর বেশ॥

কালীরূপা

মুক্তকেশী মহামেঘবরণা দম্ভরা।
শবারূঢ়া করকাঞ্চী শবকর্ণপূরা॥
গলিতরুধিরধারা মুণ্ডমালা গলে।
গলিতরুধির মুণ্ড বামকরতলে॥
আর বাম করেতে কৃপাণ খরশাণ।
দুই ভুজে দক্ষিণে অভয় বর দান॥
লোল জিহ্বা রক্তধারা মুখের দু পাশে।
ত্রিনয়ন অর্ধচন্দ্র ললাটে বিলাসে॥

তারারূপা

দেখি ভয়ে মহাদেব ফিরাইল মুখ।
তারারূপ ধরি সতী হইলা সম্মুখ॥
নীলবর্ণা লোলজিহ্বা করালবদনা।
সর্পবান্ধা উর্ধ্ব একজটা বিভূষণা॥
অর্ধচন্দ্র পাঁচখানি শোভিত কপাল।
ত্রিনয়ন লম্বোদর পরা বাঘছাল॥

নীলপদ্ম খড়া কাতি সমুণ্ড খর্পর।
চারি হাতে শোভে আরোহণ শিবোপর॥

রাজরাজেশ্বরী

দেখি ভয়ে পলাইতে চান পশুপতি।
রাজরাজেশ্বরী হয়ে দেখা দিলা সতী॥
রক্তবর্ণা ত্রিনয়না ভালে সুধাকর।
চারি হাতে শোভে পাশাক্কুশ ধনুঃশর॥
বিধি বিষ্ণু ঈশ্বর মহেশ রুদ্র পঞ্চ।
পঞ্চপ্রেতনিরমিত বসিবার মঞ্চ॥

ভুবনেশ্বরী

দেখিয়া শঙ্কর ভয়ে মুখ ফিরাইলা।
হইয়া ভুবনেশ্বরী সতী দেখা দিলা॥
রক্তবর্ণা সুভূষণা আসন অমুজ।
পাশাক্কুশ বরাভয়ে শোভে চারি ভুজ॥
ত্রিনয়ন অর্ধচন্দ্র ললাটে উজ্জ্বল।
মণিময় নানা অলঙ্কার ঝলমল॥

ভৈরবীরূপা

দেখি ভয়ে মহাদেব গেলা এক ভিতে।
ভৈরবী হইয়া সতী লাগিলা হাসিতে॥
রক্তবর্ণা চতুর্ভূজা কমল আসনা।
মুণ্ডমালা গলে নানা ভূষণভূষণা॥
অক্ষমালা পুথী বরাভয় চারি কর।
ত্রিনয়ন অর্ধচন্দ্র ললাট উপর॥

ছিন্নমস্তা

দেখি ভয়ে বিশ্বনাথ হইলা কম্পিত।
ছিন্নমস্তা হইলা সতী অতি বিপরীত॥
বিকসিত পুণ্ডরীক কর্ণিকার মাজে।
তিন গুণে ত্রিকোণ মণ্ডল ভাল সাজে॥
বিপরীত রতে রত রতি কামোপরি।
কোকনদবরণা দ্বিভুজা দিগম্বরী॥
নাগযজ্ঞোপবীত মুণ্ডাঙ্ঘ্রিমালা গলে।
খড়্গে কাটি নিজ মুণ্ড ধরি করতলে॥
কণ্ঠ হৈতে রুধির উঠিছে তিন ধার।
এক ধারা নিজ মুখে করেন আহার॥
দুই দিকে দুই সখী ডাকিনী বর্ণিনী।
দুই ধারা পিয়ে তারা শব আরোহিণী॥
চন্দ্র সূর্য্য অনল শোভিত ত্রিনয়ন।
অর্দ্ধচন্দ্র কপালফলকে সুশোভন॥

ধূমাবতী

দেখি ভয়ে ত্রিলোচন মুদিলা লোচন।
ধূমাবতী হয়ে সতী দিলা দরশন॥
অতি বৃদ্ধা বিধবা বাতাসে দোলে স্তন।
কাকধ্বজরথারুঢ়া ধূমের বরণ॥
বিস্তারবদনা কৃশা ক্ষুধায় আকুলা।
এক হস্ত কম্পমান আর হস্তে কুলা॥

বগলামুখী

ধূমাবতী দেখি ভীম সভয় হইলা।
হইয়া বগলামুখী সতী দেখা দিলা॥

রত্নগৃহে রত্নসিংহাসনমধ্যস্থিত।
পীতবর্ণা পীতবস্ত্রাভরণভূষিতা॥
এক হস্তে এক অসুরের জিহ্বা ধরি।
আর হস্তে মুদগর ধরিয়া উর্দ্ধ করি॥
চন্দ্র সূর্য্য অনল উজ্জ্বল ত্রিনয়ন।
ললাটমণ্ডলে চন্দ্রখণ্ড সুশোভন॥

মাতঙ্গী

দেখি ভয়ে ভোলানাথ যান পলাইয়া।
পথ আগুলিলা সতী মাতঙ্গী হইয়া॥
রত্নপদ্মাসনা শ্যামা রক্তবস্ত্র পরি।
চতুর্ভূজা খড়া চর্ম্ম পাশাঙ্কুশ ধরি॥
ত্রিলোচনা অর্দ্ধচন্দ্র কপালফলকে।
চমকিত বিশ্ব বিশ্বনাথের চমকে॥

BANGLADARSHAN.COM

মহালক্ষ্মী

মহাভয়ে মহাদেব হৈলা কম্পমান।
মহালক্ষ্মীরূপে সতী কৈলা অধিষ্ঠান॥
সুবর্ণ সুবর্ণ বর্ণ আসন অম্বুজ।
দুই পদ্য বরাভয়ে শোভে চারি ভুজ॥
চতুর্দন্ত চারি শ্বেত বারণ হরিষে।
রত্নঘটে অভিষেকে অমৃত বরিষে॥
ভারত কহিছে মা গো এই দশ রূপে।
দশ দিকে রক্ষা কর কৃষ্ণচন্দ্র ভূপে॥

সতীর দক্ষালয়গমন

এ কি মায়া এ কি মায়া কর মহামায়া।
সংসারে যে কিছু দেখি তব মায়া ছায়া॥
নিগম আগমে তুমি নিরুপমকায়া।
ত্রিগুণজননী পুন ত্রিদেবের জায়া॥
ইহলোকে পরলোকে তুমি সে সহায়া।
ভারত কহিছে মোরে দেহ পদছায়া॥
পলাইতে না পেয়ে ফাঁফর হৈলা হর।
কহিতে লাগিলা কম্পমান কলেবর॥
তোমরা কে মোরে কহ পাইয়াছি ভয়।
কোথা গেল মোর সতী বলহ নিশ্চয়॥
কালীমূর্তি কহিতে লাগিলা মহাদেবে।
পূর্ব সর্ব জান কেন পাসরিলা এবে॥
পরমা প্রকৃতি আমি ভেবে দেখ মনে।
প্রসবিনু তুমি বিষ্ণু বিধি তিন জনে॥
তিন জনে তোমরা কারণ-জলে ছিলা।
তপ তপ তপ বাক্য কহিনু শুনিলা॥
তিন জন পরস্পর লাগিলা জপিতে।
শবরূপে আইলাম ভাসিতে ভাসিতে॥
পচা গন্ধে উঠি গেলা বিষ্ণু ভাবি দুখ।
বিধি হৈলা চতুর্মুখ ফিরি ফিরি মুখ॥
তুমি ঘৃণা না করিয়া করিলা আসন।
প্রকৃতিরূপেতে তোমা করিনু ভজন॥
পুরুষ হইলা তুমি আমার ভজনে।
সেই আমি সেই তুমি ভেবে দেখ মনে॥
এত শুনি শিবের হইল চমৎকার।
প্রকাশ করিলা তন্ত্র মন্ত্র সবাকার॥
লুকাইয়া দশ মূর্তি সতী হইলা সতী।
গৌর বর্ণ ছাড়ি হৈলা কালীয় মূর্তি॥
মোহিত মহেশ মহামায়ার মায়ায়।

BANGLADARSHAN.COM

যে ইচ্ছা করহ বলি দিলেন বিদায়॥
রথ আনি দিতে শিব কহিলা নন্দীরে।
রথে চড়ি গেলা সতী দক্ষের মন্দিরে॥
প্রসূতি সতীরে দেখি কালীয়বরণ।
কহিল দেখিয়াছিল যেমন স্বপন॥
আহা মরি বাছা সতি কালী হইয়াছ।
ছাড়িবে আমারে বুঝি মনে করিয়াছ॥
স্বপনে দেখেছি দক্ষ শিবেরে নিন্দিবে।
শিবনিন্দা শুনি তুমি শরীর ছাড়িবে॥
শিব করিবেন দক্ষ যজ্ঞ সহ নাশ।
তোমা দেখি স্বপ্নে মোর হইল বিশ্বাস॥
জগন্মাতা হয়ে মাতা বলেছ আমার।
জন্মশোধ খাও কিছু চাহিয়া এ মায়॥
মার বাক্যে মাতা কিছু আহার করিয়া।
যজ্ঞ দেখিবারে গেলা সতুরা হইয়া॥
কৃষ্ণবর্ণা দেখি সতী দক্ষ কোপে জ্বলে।
শিবনিন্দা করিয়া সভার আগে বলে॥
ভারত শিবের নিন্দা কেমনে বর্ণিবে।
নিন্দাছলে স্তুতি করি শঙ্কর বুঝিবে॥

BANGLADARSHAN.COM

শিবনিন্দায় সতীর দেহত্যাগ

সভাজন গুণ জামাতার গুণ
বয়সে বাপের বড়।
কোন গুণ নাই যেথা সেথা ঠাঁই
সিদ্ধিতে নিপুণ দড়॥
মান অপমান সুস্থান কুস্থান
অজ্ঞান জ্ঞান সমান।
নাহি জানে ধর্ম নাহি মানে কর্ম

চন্দনে ভস্মঞ্জেরান ॥

যবনে ব্রাহ্মণে কুকুরে আপনে

শ্মশানে স্বরগে সম।

গরল খাইল তবু না মরিল

ভাঙ্গড়ের নাহি যম ॥

সুখে দুঃখ জানে দুঃখে সুখ মানে

পরলোকে নাহি ভয়।

কি জাতি কে জানে কারে নাহি মানে

সদা কদাচারময় ॥

কহিতে ব্রাহ্মণ কি আছে লক্ষণ

বেদাচারবহিষ্কৃত।

ক্ষত্রিয়কথন না হয় ঘটন

জটা ভস্ম আদি ধৃত ॥

যদি বৈশ্য হয় চাষী কেন নয়

নাহি কোন ব্যবসায়।

শূদ্র বলে কেবা দ্বিজ দেয় সেবা

নাগের পৈতা গলায় ॥

গৃহী বলা দায় ভিক্ষা মাগি খায়

না করে অতিথিসেবা।

সতী ঝি আমার গৃহিণী তাহার

সন্ন্যাসী বলিবে কেবা ॥

বনস্থ বলিতে নাহি লয় চিতে

কৈলাস নামেতে ঘর।

ডাকিনীবিহারী নহে ব্রহ্মচারী

এ কি মহাপাপ হর ॥

সতী ঝি আমার বিদ্যুত আকার

বাতুলের হৈল জায়া।

আমি অভাজন পরম ভাজন

ঘটক নারদ ভায়া ॥

আহা মরি সতি কি দেখি দুর্গতি

অন্ন বিনা হৈলা কালি।

তোমার কপাল পর বাঘছাল

BANGLADARSHAN.COM

আমার রহিল গালি॥
শিবনিন্দা শুনি রোষে যত মুনি
দধীচি অগস্ত্য আদি।
দক্ষে গালি দিয়া চলিলা উঠিয়া
শ্রবণে কর আছাদি॥
তবু পাপ দক্ষ নিন্দি কত লক্ষ
সতী সম্বোধিয়া কহে।
তার মৃত্যু নাই তোরে নাহি ঠাই
আমার মরণ নহে॥
মোর কন্যা হয়ে প্রেত সঙ্গে রয়ে
ছি ছি এ কি দশা তোরে।
আমি মহারাজ তোরে এই সাজ
মাথা খেতে আলি মোর॥
বিধবা যখন হইবি তখন
অন্ন বস্ত্র তোরে দিব।
সে পাপ থাকিতে নারিব রাখিতে
তার মুখ না দেখিব॥
শিবনিন্দা শুনি মহাদুঃখ গুণি
কহিতে লাগিলা সতী।
শিবনিন্দা কর কি শকতি ধর
কেন বাপা হেন মতি॥
যারে কালে ধরে সেই নিন্দে হরে
কি কহিব তুমি বাপ।
তব অঙ্গজানু তেজিব এ তনু
তবে যাবে মোর পাপ॥
তিনি মৃত্যুঞ্জয় গালিতে কি হয়
মোর যেতে আছে ঠাই।
কর্ষ্ম মত ফল যজ্ঞ যাবে তল
তোরে রক্ষা আর নাই॥
যে মুখে পামর নিন্দিলে শঙ্কর
সে মুখ হবে ছাগল।
এতেক কহিয়া শরীর ছাড়িয়া

BANGLADARSHAN.COM

উত্তরীলা হিমাচল ॥
হিমগিরিপতি ভাগ্যবান অতি
মেনকা তাহার জায়া।
পূর্বতপবরে তাহার উদরে
জনমিলা মহামায়া ॥
সতী দেহ ত্যাগে নন্দী মহা রাগে
সত্বরে গেলা কৈলাসে।
শূন্য রথ লয়ে শোকাকুল হয়ে
নিবেদিলা কৃতিবাসে ॥
শুনীয়া শঙ্কর শোকেতে কাতর
বিস্তর কৈলা রোদন।
লয়ে নিজগণ করিলা গমন
করিতে দক্ষদমন ॥
কৃষ্ণচন্দ্র রায় রাজা ইন্দ্রপ্রায়
অশেষগুণসাগর।
তঁার অভিমত রচিলা ভারত
কবি রায় গুণাকর ॥

শিবের দক্ষালয় যাত্রা

মহারুদ্ররূপে মহাদেব সাজে।
ভভস্তুম্ ভভস্তুম্ শিঙ্গা ঘোর বাজে ॥
লটাপট্ জটাজুট সংঘট্ট গঙ্গা।
ছলচ্ছল্ টলট্টল্ কলক্কল্ তরঙ্গা ॥
ফণাফণ্ ফণাফণ্ ফণীফণ্ গাজে।
দিনেশ প্রতাপে নিশানাথ সাজে ॥
ধকধবক্ ধকধবক্ জ্বলে বহি ভালে।
ববম্বম্ ববম্বম্ মহাশব্দ গালে ॥
দলম্বল্ দলম্বল্ গলে মুণ্ডমালা।

কটীকউসদ্যোমরা হস্তিহালা ॥
পচা চর্ম্ব বুলী করে লোল বুলে।
মহাঘোর আভা পিনাকে ত্রিশূলে ॥
ধিয়া তাধিয়া তাধিয়া ভূত নাচে।
উলঙ্গী উলঙ্গে পিশাচী পিশাচে ॥
সহস্রে সহস্রে চলে ভূত দানা।
হুঙ্কার হাঁকে উড়ে সর্পবাণা ॥
চলে ভেরবা ভৈরবী নন্দী ভৃঙ্গী।
মহাকাল বেতাল তাল ত্রিশৃঙ্গী ॥
চলে ডাকিনী যোগিনী ঘোর বেশে।
চলে শাঁখিনী পেতিনী মুক্তকেশে ॥
গিয়া দক্ষ যজ্ঞে সবে যজ্ঞ নাশে।
কথা না সরে দক্ষরাজে তরাসে ॥
অদূরে মহারুদ্র ডাকে গভীরে।
অরে রে অরে দক্ষ দে রে সতীরে ॥
ভুজঙ্গপ্রয়াতে কহে ভারতী দে।
সতী দে সতী দে সতী দে সতী দে ॥

BANGLADARSHAN.COM

দক্ষযজ্ঞনাশ

ভূতনাথ ভূতসাথ দক্ষযজ্ঞ নাশিছে।
যক্ষ রক্ষ লক্ষ লক্ষ অট্ট অট্ট হাসিছে ॥
প্রেতভাগ সানুরাগ বাম্প বাম্প বাঁপিছে।
ঘোর রোল গণ্ডগোল চৌদ্দ লোক কাঁপিছে ॥
সৈন্যসূত মন্ত্রপূত দক্ষ দেয় আছতি।
জন্নি তায় সৈন্য ধায় অশ্ব ঢালি মাছতি ॥
বৈরিপক্ষ যক্ষ রক্ষ রুদ্রবর্গ ডাকিয়া।
যাও যাও হুঁ দিখাও দক্ষ দেই হাঁকিয়া ॥
সে সভায় আত্মগায় রুদ্র দেন নির্বৃতি।
দক্ষরাজ পায় লাজ আর নাহি নিষ্কৃতি ॥

রুদ্র দূত ধায় ভূত নন্দী ভূঙ্গী সঙ্গিয়া।
ঘোরবেশ মুক্তকেশ যুদ্ধরঙ্গরঙ্গিয়া॥
ভার্গবের সৌষ্ঠবের দাড়ি গৌপ ছিঙিল।
পুষণের ভূষণের দন্তপাঁতি পাড়িল॥
বিপ্র সৰ্ব্ব দেখি পৰ্ব্ব ভোজ্য বস্ত্র সারিছে।
ভূতভাগ পায় লাগ নাথি কীল মারিছে॥
ছাড়ি মন্ত্র ফেলি তন্ত্র মুক্তকেশ ধায় রে।
হায় হায় প্রাণ যায় পাপ দক্ষ দায় রে॥
যজ্ঞ গেহ ভাঙ্গি কেহ হব্য কব্য খাইছে।
উর্দ্ধহাথ বিশ্বনাথ নাম গীত গাইছে॥
মার মার ঘের ঘার হান হান হাঁকিছে।
হূপ হাপ দূপ দাপ আশ পাশ ঝাঁকিছে॥
অট্ট অট্ট ঘট ঘট ঘোর হাস হাসিছে।
হুম হাম খুম খাম ভীম শব্দ ভাষিছে॥
উর্দ্ধবাহু যেন রাহু চন্দ্র সূর্য্য পাড়িছে।
লম্প বাম্প ভূমিকম্প নাগ কর্ম লাড়িছে॥
অগ্নি জালি সর্পি ঢালি দক্ষ দেহ পুড়িছে।
ভস্মশেষ হৈল দেশ রেণু রেণু উড়িছে॥
হাস্যতুণ্ড যজ্ঞকুণ্ড পূরি পূরি মূতিছে।
পাদ ঘায় ঠায় ঠায় অশ্ব হস্তি পুঁতিছে॥
রাজ্য খণ্ড লণ্ড ভণ্ড বিস্ফুলিঙ্গ ছুটিছে।
হুল খুল কুল কুল ব্রহ্মাডিম্ব ফুটিছে॥
মৌন তুণ্ড হেঁট মুণ্ড দক্ষ মৃত্যু জানিছে।
কেহ ধায় মুষ্টি ঘায় মুণ্ড ছিঙি আনিছে॥
মৈল দক্ষ ভূত যক্ষ সিংহনাদ ছাড়িছে।
ভারতের তুণ্ডকের হৃন্দ বন্ধ বাড়িছে॥

BANGLADARSHAN.COM

প্রসূতিস্তবে দক্ষজীবন

শিবনাম বল রে জীব বদনে।
যদি আনন্দে যাবে শিবসদনে॥
শিবনাম লয়ে মুখে তরিব সকল দুখে
দমন করিব সুখে শমনে।
শিবগুণ কি কহিব কোথায় তুলনা দিব
জীব শিব হয় শিব সেবনে॥
শিব শিব বলে যেই এই দেহে শিব সেই
শিব নিজপদ দেই সে জনে।
কাতরে করুণা কর পাপ তাপ সব হর
ভারতে রাখহ হর ভজনে॥

এইরূপে যজ্ঞ সহ দক্ষ নাশ পায়।

প্রসূতি বাঁচিলা মাত্র সতীর কৃপায়॥

বিধি বিষ্ণু দুই জন নিজ স্থানে ছিলা।

দেখিয়া শিবের ক্রোধ অস্তির হইলা॥

অকালে প্রলয় জানি করেন শঙ্কর।

দক্ষবাসে শিব পাশে আইলা সত্বর॥

সতীশোকে পতিশোকে লজ্জা তেয়াগিয়া।

প্রসূতি শিবের কাছে আইলা কান্দিয়া॥

গলবস্ত্রা হয়ে এল শিবের সম্মুখ।

শাশুড়ী দেখিয়া শিব লাজে হেঁটমুখ॥

দূর গেল রুদ্রভাব শিবভাব হয়।

প্রসূতি বিস্তর স্তুতি করে সবিনয়॥

বিশ্বের জনক তুমি বিশ্বমাতা সতী।

অসীম মহিমা জানে কাহার শক্তি॥

আমি জানি আমার ভাগ্যের সীমা নাই।

সতী মোর কন্যা তুমি আমার জামাই॥

বেদেতে মহিমা তব পরম নিগূঢ়।

সেই বেদ পড়ি মোর পতি হৈল মূঢ়॥

আপনি বিচার কর পরিহর রোষ।

BANGLADARSHAN.COM

দক্ষের এ দোষ কেন বেদের এ দোষ ॥
যেমন তোমার নিন্দা করিল পাগল।
যে করিলে সেহ নহে তার মত ফল ॥
কি করিবে পরিণামে বুঝিতে না পারি।
ভাগ পেতে হয় মোরে আমি তার নারী ॥
সতীর জননী আমি শাশুড়ী তোমার।
তথাপি বিধবা দশা হইল আমার ॥
ছাড়িয়া গেলেন সতী মরিলেন পতি।
তোমার না হয় দয়া কি হইবে গতি ॥
তোমার শাশুড়ী বলি যম নাহি লয়।
আমারে কাহারে দিবা কহ দয়াময় ॥
প্রসূতির বাক্যে শিব সলজ্জ হইলা।
রাজ্য সহ দক্ষরাজে বাঁচাইয়া দিলা ॥
ধড়ে মুণ্ড নাহি দক্ষ দেখিতে না পায়।
উঠে পড়ে ফিরে ঘুরে কবন্ধের প্রায় ॥
দক্ষের দুর্গতি দেখি হাসে ভূতগণ।
প্রসূতি বলিছে প্রভু এ কি বিড়ম্বন ॥
বিধাতা বিষ্ণুর সহ করিয়া মন্ত্রণা।
কহিলেন খণ্ডিবারে দক্ষের যন্ত্রণা ॥
শ্বশুর তোমার দক্ষ সম্বন্ধ গৌরব।
ইহায়ে উচিত নহে এতেক রৌরব ॥
অপরাধ ক্ষমিয়া যদ্যপি দিলা প্রাণ।
কৃপা করি মুণ্ড দেহ কর জ্ঞানবান ॥
শুনিয়া নন্দীরে শিব কহিলা হাসিয়া।
কার মুণ্ড দিবা দক্ষ দেখহ ভাবিয়া ॥
নন্দী বলে তব নিন্দা করিয়াছে পাপ।
ছাগমুণ্ড হইবে সতীর আছে শাপ ॥
শুনিয়া সম্মতি দিলা শিব মহাশয়।
যেমন করিল কৰ্ম্ম উপযুক্ত হয় ॥
শিববাক্যে নন্দী এক ছাগল কাটিয়া।
মুণ্ড আনি দক্ষক্ষণে দিলেক আঁটিয়া ॥
মিলন হইল ভাল হর দিলা বর।

BANGLADARSHAN.COM

শঙ্করের স্তুতি দক্ষ করিল বিস্তর॥
তুমি ব্রহ্ম তুমি ব্রহ্মা তুমি হরি হর।
তুমি জল তুমি বায়ু তুমি চরাচর॥
তুমি আদি তুমি অন্ত তুমি মধ্য হও।
পঞ্চভূতময় পঞ্চভূতময় নও॥
নিরাকার নির্গুণ নিঃসীম নিরূপম।
না জানি করিনু নিন্দা অপরাধ ক্ষম॥
বন্দিবার ফলে হৈল পূর্বের সকল।
নিন্দিবার চিহ্ন রৈল বদন ছাগল॥
বিধি বিষ্ণু আদি সবে দক্ষেরে লইয়া।
যজ্ঞ পূর্ণ কৈল শিবে অগ্রভাগ দিয়া॥
যজ্ঞস্থানে সতীদেহ দেখিয়া শঙ্কর।
বিস্তর রোদন কৈলা কহিতে বিস্তর॥
শিরে লয়ে সতীদেহ করিলা গমন।
গুণ গেয়ে স্থানে স্থানে করেন ভ্রমণ॥
বিধি সঙ্গে মন্ত্রণা করিলা গদাধর।
সতীদেহ থাকিতে না ছাড়িবেন হর॥
তথায় সতীর দেহ গিয়া চক্রপাণি।
কাটিলেন চক্রধারে করি খানি খানি॥
যেখানে যেখানে অঙ্গ পড়িল সতীর।
মহাপীঠ সেই স্থান পূজিত বিধির॥
করিয়া একান্ন খণ্ড কাটিলা কেশব।
বিধাতা পূজিলা ভব হইলা ভৈরব॥
একমত না হয় পুরাণমত যত।
আমি কহি মন্ত্রচূড়ামণি তন্ত্রমত॥
আজ্ঞা দিলা কৃষ্ণচন্দ্র ধরণী ঈশ্বর।
রচিলা ভারতচন্দ্র রায় গুণাকর॥

BANGLADARSHAN.COM

পীঠমালা

ভবসংসার ভিতরে। ভব ভবানী বিহরে॥

ভূতময় দেহ নবদ্বার গেহ
নরনারীকলেবর।

গুণাতীত হয়ে নানা গুণ লয়ে
দৌহে নানা খেলা করে॥

উত্তম অধম স্থাবর জঙ্গম
সব জীবের অন্তরে।

চেতনাচেতনে মিলি দুই জনে
দেহিদেহরূপে চরে॥

অভেদ হইয়া ভেদ প্রকাশিয়া
এ কি করে চরাচরে।

পাইয়াছে টের কি করে এ ফের
কবি রায় গুণাকরে॥

BANGLADARSHAN.COM

হিঙ্গুলায় ব্রহ্মরক্ত ফেলিলা কেশব।

দেবতা কোটুবী ভীমলোচন ভৈরব॥ ১

শর্করারে তিন চক্ষু ত্রিগুণ ভৈরব [বৈভব ?]

মহিষমর্দিনী দেবী ক্রোধীশ ভৈরব॥ ২

সুগন্ধায় নাসিকা পড়িল চক্রহতা।

ত্র্যম্বক ভৈরব তাহে সুনন্দা দেবতা॥ ৩

জ্বালামুখে জিহ্বা তাহে অগ্নি অনুভব।

দেবীর অম্বিকা নাম উন্মত্ত ভৈরব॥ ৪

ভৈরব পর্কতে গুষ্ঠ পড়ে চক্রঘায়।

নম্রকর্ণ ভৈরব অবন্তী দেবী তায়॥ ৫

প্রভাসে অধর দেবী চন্দ্রভাগা তাহে।

বক্রতুণ্ড ভৈরব প্রত্যক্ষরূপ যাহে॥ ৬

জনস্থানে চিবুক পড়িল অভিরাম।

বিকৃতাক্ষ ভৈরব ভ্রামরী দেবী নাম॥ ৭

গোদাবরীতীরে পড়ে বাম গণ্ডখানি।

বিশেষ ভৈরব বিশ্বমাতৃকা ভবানী॥ ৮

গণ্ডকীতে ডানি গণ্ড পড়ে চক্রঘায়।
চক্রপাণি ভৈরব গণ্ডকী চণ্ডী তায়॥ ৯
উর্দ্ধ দন্তপাঁতির অনলে হৈল ধাম।
সংক্রুর ভৈরব দেবী নারায়ণী নাম॥ ১০
পঞ্চসাগরেতে পড়ে অধোদন্তসার।
মহারুদ্র ভৈরব বারাহী দেবী তার॥ ১১
করতোয়াতটে পড়ে বাম কর্ণ তাঁর।
বামেশ ভৈরব দেবী অপর্ণা তাঁহার॥ ১২
শ্রীপৰ্বতে ডানি কর্ণ ফেলিলেন হরি।
ভৈরব সুন্দরানন্দ দেবতা সুন্দরী॥ ১৩
কেশজাল নাম স্থানে পড়ে তাঁর কেশ।
উমা নামে দেবী তাহে ভৈরব ভূতেশ॥ ১৪
কিরীটকোণায় পড়ে কিরীট সুরূপ।
ভুবনেশী দেবতা ভৈরব সিদ্ধরূপ॥ ১৫
শ্রীহটে পড়িল গ্রীবা মহালক্ষ্মী দেবী।
সৰ্বানন্দ ভৈরব বৈভব যাহা সেবি॥ ১৬
কাশ্মীরেতে কৰ্ণ দেবী মহামায়া তায়।
ত্রিসংখ্যা ঈশ্বর নাম ভৈরব তথায়॥ ১৭
রত্নাবলী স্থানে ডানি স্কন্ধ অভিরাম।
কুমার ভৈরব তাহে দেবী শিবা নাম॥ ১৮
মিথিলায় বাম স্কন্ধ দেবী মহাদেবী।
মহোদর ভৈরব সৰ্বার্থ যাঁরে সেবি॥ ১৯
চট্টগ্রামে ডানি হস্ত অর্দ্ধ অনুভব।
ভবানী দেবতা চন্দ্রশেখর ভৈরব॥ ২০
আর অর্দ্ধ ডানি হস্ত মানসসরোবরে।
দেবী দাক্ষায়ণী হর ভৈরব বিহরে॥ ২১
উজানীতে কফোণি মঙ্গলচণ্ডী দেবী।
ভৈরব কপিলাস্বর শুভ যাঁরে সেবি॥ ২২
মণিবেদে মণিবন্ধ পড়িল তাঁহার।
জ্ঞাণু নামে ভৈরব সাবিত্রী দেবী তাঁর॥ ২৩
প্রয়াগেতে দু হাতের অঙ্গুলী সরস।
তাহাতে ভৈরব দশ মহাবিদ্যা দশ॥ ২৪ ইং ৩৩

বাহুলায় বাম বাহু ফেলিলা কেশব।
বাহুলা চণ্ডিকা তাহে ভীৰুক ভৈরব॥ ৩৪
মণিবন্ধে বাম মণিবন্ধ অভিরাম।
সৰ্বানন্দ ভৈরব গায়ত্রী দেবী নাম॥ ৩৫
জালন্ধরে তাঁহার পড়িল এক স্তন।
ত্রিপুরমালিনী দেবী ভৈরব ভীষণ॥ ৩৬
আর স্তন পড়ে তাঁর রামগিরি স্থানে।
শিবানী দেবতা চণ্ড ভৈরব সেখানে॥ ৩৭
বৈদ্যনাথে হৃদয় ভৈরব বৈদ্যনাথ।
দেবী তাহে জয়দুর্গা সৰ্ব সিদ্ধি সাথ॥ ৩৮
উৎকলে পড়িল নাভি মোক্ষ যাহা সেবি।
জয় নামে ভৈরব বিজয়া নামে দেবী॥ ৩৯
কাঞ্চী দেশে পড়িল কাঁকালি অভিরাম।
বেদগৰ্ভা দেবতা ভৈরব রুৰু নাম॥ ৪০
নিতম্বের অর্ধ কালমাধবে তাঁহার।
অসিতাঙ্গ ভৈরব দেবতা কালী তাঁর॥ ৪১
নিতম্বের আর অর্ধ পড়ে নৰ্মদায়।
ভদ্রসেন ভৈরব শোণাঙ্কী দেবী তায়॥ ৪২
মহামুদ্রা কামরূপে রজোযোগ যায়।
রাবানন্দ ভৈরব কামাখ্যা দেবী তায়॥ ৪৩
নেপালে দক্ষিণ জঙ্ঘা কপালী ভৈরব।
দেবী তায় মহামায়া সদা মহোৎসব॥ ৪৪
জয়ন্তায় বাম জঙ্ঘা ফেলিলা কেশব।
জয়ন্তী দেবতা ক্রমদীশ্বর ভৈরব॥ ৪৫
দক্ষিণ চরণখানি পড়ে ত্রিপুরায়।
নল নামে ভৈরব ত্রিপুরা দেবী তায়॥ ৪৬
ক্ষীরগ্রামে ডানি পার অঙ্গুষ্ঠ বৈভব।
যুগাদ্যা দেবতা ক্ষীরখণ্ডক ভৈরব॥ ৪৭
কালীঘাটে চারিটি অঙ্গুলি ডানি পার।
নকুলেশ ভৈরব কালিকা দেবী তার॥ ৪৮
কুরুক্ষেত্রে ডানি পার গুল্ফ অনুভব।
বিমলা তাহাতে দেবী সম্বর্ত্ত ভৈরব॥ ৪৯

BANGLADARSHAN.COM

বিভাসেতে বাম গুল্ফ ফেলিলা কেশব।
ভীমরূপা দেবী তাহে কপালী ভৈরব॥ ৫০
তিরোতায় পড়ে বাম পদ মনোহর।
অমরী দেবতা তাহে ভৈরব অমর॥ ৫১
শূন্য শির দেখি শিব হৈলা চিন্তাবান।
হিমালয় পর্বতে বসিলা করি ধ্যান॥
কৃষ্ণচন্দ্র আজ্ঞায় ভারতচন্দ্র গায়।
হরি হরি বল সবে পালা হৈল সায়॥

শিববিবাহের মন্ত্রণা

উমা দয়া কর গো। বিষম শমনভয় হর গো॥
পাপেতে জড়িত মতি কাতর হয়েছি অতি
পতিতপাবনী নাম ধর গো।
মা বলিয়া ডাকি ঘন শুনিয়া না দেহ মন
গুহ গজাননে বুঝি ডর গো॥
তুমি গো তারিণী তারা অসার সংসার সারা
নানারূপে চরাচরে চর গো।
রাধানাথ তব দাস পূরাও তাহার আশ
তবে ঋণিচক্র ঋণে তর গো॥

উদাসীন দেখি হরে বিধি গদাধর।
মন্ত্রণা করিলা লয়ে যতেক অমর॥
ত্রিদিবে প্রধান দেব দেবদেব শিব।
শিব হৈলা শক্তিহীন কেবা কি করিব॥
নানামত মন্ত্রণা করিয়া দেব সব।
মহামায়া উদ্দেশে বিস্তর কৈলা স্তব॥
হইল আকাশবাণী সকলে শুনিলা।
মহামায়া হিমালয় আলয়ে জন্মিলা॥
উ শব্দে বুঝহ শিব মা শব্দে শ্রী তার।
বুঝিয়া মেনকা উমা নাম কৈলা সার॥

তঁাহার সহিত তবে শিবের বিবাহ।
তবে সে শর্কের হবে সংসার নির্বাহ॥
আকাশবাণীতে পেয়ে দেবীর উদ্দেশ।
নারদেরে ডাকিয়া কহিলা হ্রষীকেশ॥
ঘটক হইয়া তুমি হিমালয়ে যাও।
উমা সহ মহেশের বিবাহ ঘটাও॥
একে তো নারদ আরো বিষ্ণুর আদেশ।
শিবের বিবাহ তাহে বাড়িল আবেশ॥
জনকের জননীর দেখিব চরণ।
আর কবে হব হেন ভাগ্যের ভাজন॥
মাজিয়া বীণার তার মিশাইয়া তান।
ভারতের অভিমত গৌরীগুণ গান॥

নারদের গান

BANGLADARSHAN.COM

জয় দেবী জগন্ময়ি দীনদয়াময়ি
শৈলসুতে করুণানিকরে।
জয় চণ্ডবিনাশিনি মুণ্ডনিপাতিনি
দুর্গবিঘাতিনি মুখ্যতরে॥
জয় কালি কপালিনি মস্তকমালিনি
খর্পরধারিণি শূলধরে।
জয় চণ্ডি দিগম্বরি ঈশ্বরি শঙ্করি
কৌষিকি ভারতভীতিহরে॥

শিববিবাহের সম্বন্ধ

এরূপে নারদ মুনি বীণা বাজাইয়া।
উত্তরিলে হিমালয়ে নাচিয়া গাইয়া॥
দেখেন বাহিরে গৌরী খেলিছেন রঙ্গে।

চৌষটি যোগিনী কুমারীর বেশ সঙ্গে॥
মৃত্তিকার হর গৌরী পুত্তলি গড়িয়া।
সহচরীগণ মেলি দিতেছেন বিয়া॥
দেখি নারদের মনে হৈল চমৎকার।
এ কি কৈলা মহামায়া মায়া অবতার॥
দণ্ডবৎ হয়ে মুনি করিলা প্রণাম।
আজি বুঝিলাম সিদ্ধ হৈল হরিনাম॥
অভীষ্ট হউক সিদ্ধ বর দিয়া মনে।
নারদে কহিলা দেবী গর্বিত ভৎসনে॥
শুন বৃদ্ধ ব্রাহ্মণ ঠাকুর মহাশয়।
আমারে প্রণাম কর উপযুক্ত নয়॥
অল্পায়ু করিবে বুঝি ভাবিয়াছ মনে।
দেখিয়া এমন কৰ্ম্ম করিলা কেমনে॥
মুনি বলে এ দেখাও তুমি কারে।
তোমার কৃপায় ভয় না করি তোমারে॥
আমারে বুঝিলা বৃদ্ধ বালিকা আপনি।
ভাবি দেখ তুমি মোর বাপের জননী॥
নাতি জ্ঞানে বুড়া বলি হাসিছ আমারে।
পাকা দাড়ি বুড়া বর ঘটাব তোমারে॥
আনিব এমন বর বায়ে লড়ে দাঁত।
ঘটক তাহার আমি জানিবা পশ্চাত॥
বিবাহের নামে দেবী ছলে লজ্জা পেয়ে।
কহি গিয়া মায়ে বলি ঘরে গেলা ধেয়ে॥
আল্যা করি কোলে বসি ছেঁদে ধরি গলে।
ও মা ও মা বলি উমা কথা কন ছলে॥
সখী মেলি খেলিনু বাহিরবাড়ি গিয়া।
ধূলা ঘরে দিতেছিঁনু পুতুলের বিয়া॥
কোথা হৈতে বুড়া এক ডোকরা বামন।
প্রণাম করিল মোরে এ কি অলক্ষণ॥
নিষেধ করিনু তারে প্রণাম করিতে।
কত কথা কহে বুড়া না পারি কহিতে॥
দুটা লাউ বান্ধা কান্ধে কাঠ একখান।

BANGLADARSHAN.COM

বাজাইয়া নাচিয়া নাচিয়া করে গান॥
ভাবে বুঝি সে বামন বড় কন্দলিয়া।
দেখিবে যদ্যপি চল বাপারে লইয়া॥
শুনিয়া মেনকা মনে জানিলা নারদ।
সম্বমে বাহিরে আসি বন্দিলেন পদ॥
হিমালয় শুনিয়া আইলা দ্রুত হয়ে।
সিংহাসনে বসাইলা পদধূলি লয়ে॥
নারদ কহেন শুন শুন হিমালয়।
কি কহিব অসীব তোমার ভাগ্যোদয়॥
এই যে তোমার উমা কন্যা বল যাঁরে।
অখিলভুবনমাতা জানিতে কে পারে॥
বিবাহ কাহারে দিবা ভাবিয়াছ কিবা।
শিব পতি ইঁহার ইঁহার নাম শিবা॥
হিমালয় বলে কি এমন ভাগ্য হবে।
ভবানী হবেন উমা পার পাব ভবে॥
নারদ কহিছে ভাগ্য হয়েছে তখনি।
জনক জননী ভাবে জন্মিলা যখনি॥
হিমালয় মেনকা যদ্যপি দিলা সায়।
লগ্নপত্র করিয়া নারদ মুনি যায়॥
আজ্ঞা দিলা কৃষ্ণচন্দ্র ধরণী ঈশ্বর।
রচিলা ভারতচন্দ্র রায় গুণাকর॥

শিবের ধ্যানভঙ্গে কামভঙ্গ

শিবের সম্বন্ধ করিয়া নিৰ্বন্ধ
আইলা নারদ মুনি।
কমললোচন আদি দেবগণ
পরম আনন্দ শূনি॥
সকলে মিলিয়া শিব কাছে গিয়া

বিস্তর করিলা স্তব।
নাহি ভাঙ্গে ধ্যান দেখি চিন্তাবান
হইলা বিধি কেশব॥
মন্ত্রণা করিয়া মদনে ডাকিয়া
সুরপতি দিলা পান।
সম্মোহন বাণ করিয়া সন্ধান
শিবের ভাঙ্গহ ধ্যান॥
ইন্দ্রের আজ্ঞায় রতিপতি ধায়
পুষ্পশরাসন হাতে।
সমুখে সামন্ত ধাইল বসন্ত
কোকিল ভ্রমর সাতে॥
মলয় পবন বহে ঘন ঘন
শীতল সুগন্ধ মন্দ।
তরু লতাগণ ফুলে সুশোভন
জগতে লাগিল ধন্দ॥
যত দেবগণ হৈলা অদর্শন
হরের ক্রোধের ভয়।
পূর্ব নিয়োজন নিকট মরণ
মদন সমুখে রয়॥
আকর্ণ পুরিয়া সন্ধান করিয়া
সম্মোহন বাণ লয়ে।
ভূমে হাঁটু পাড়ি দিল বাণ ছাড়ি
অনলে পতঙ্গ হয়ে॥
কিবা করে ধ্যান কিবা করে জ্ঞান
যে করে কামের শর।
সিহরিল অঙ্গ ধ্যান হৈল ভঙ্গ
নয়ন মিলিলা হর॥
কামশরে ত্রস্ত নারী লাগি ব্যস্ত
নেহালেন চারি পাশে।
সমুখে মদন হাতে শরাসন
মুচকি মুচকি হাসে॥
দেখি পুষ্পশরে ক্রোধ হৈল হরে

BANGLADARSHAN.COM

অটল অচল টলে।

ললাটলোচন হৈতে হতাশন

ধক ধক ধক জ্বলে॥

মদন পলায় পিছে অগ্নি ধায়

ত্রিভুবন পরকাশি।

চৌধিকে বেড়িয়া মদনে পুড়িয়া

করিল ভস্মের রাশি॥

মরিল মদন তবু পঞ্চগনন

মোহিত তাহার বাণে।

বিকল হইয়া নারী তপাসিয়া

ফিরেন সকল স্থানে॥

কামে মত্ত হর দেখিয়া অঙ্গর

কিনুরী দেবী সকল।

যায় পলাইয়া পশ্চাত তাড়িয়া

ফিরেন শিব চঞ্চল॥

মনে মনে হাসি হেন কালে আসি

নারদ হৈলা সমুখ।

নারদে দেখিয়া সলজ্জ হইয়া

হর হৈলা হেঁটমুখ॥

খুড়া খুড়া কয়ে দণ্ডবত হয়ে

কহিছে নারদ হাসি।

দক্ষগৃহ ছাড়ি হেমন্তের বাড়ি

জনমিলা সতী আসি॥

বিবাহ করিয়া তাঁহারে লইয়া

আনন্দে কর বিহার।

শুনি শিব কন ওরে বাছাধন

ঘটক হও তাহার॥

মুনি কহে দ্রুত সকলি প্রস্তুত

বর হয়ে কবে যাবা।

কহেন শঙ্কর বিলম্ব না কর

আজি চল মোর বাবা॥

শুনি মুনি কয় এমন কি হয়

সর্ব দেবগণে কহ।
প্রায় হয়ে বুড়া ভুলিয়াছ খুড়া
দিন দুই স্থির রহ॥
শান্ত হৈলা হর যতেক অমর
এলা যথা পশুপতি।
কামের মরণ করিয়া শ্রবণ
কান্দিয়া আইলা রতি॥
কৃষ্ণচন্দ্র রায় রাজা ইন্দ্রপ্রায়
অশেষ গুণসাগর।
তঁার অভিমত রচিলা ভারত
কবি রায় গুণাকর॥

রতিবিলাপ

পতিশোকে রতি কাঁদে বিনাইয়া নানা ছাঁদে
ভাসে চক্ষু জলের তরঙ্গে।
কপালে কঙ্কণ মারে রুধির বহিছে ধারে
কাম-অঙ্গভঙ্গ লেপে অঙ্গে॥
আলু থালু কেশবাস ঘন ঘন বহে শ্বাস
সংসার পূরিল হাহাকার।
কোথা গেলা প্রাণনাথ আমারে করহ সাথ
তোমা বিনা সকলি আঁধার॥
তুমি কাম আমি রতি আমি নারী তুমি পতি
দুই অঙ্গ একই পরাণ।
প্রথমে যে প্রীতি ছিল শেষে তাহা না রহিল
পিরীতির এ নহে বিধান॥
যথা যথা যেতে প্রভু মোরে না ছাড়িতে কভু
এবে কেন আগে ছাড়ি গেলা।
মিছা প্রেম বাড়াইয়া ভাল গেলা ছাড়াইয়া

এখন বুঝিনু মিছা খেলা॥
না দেখিব সে বদন না হেরিব সে নয়ন
না শুনিব সে মধুর বাণী।
আগে মরিবেন স্বামী পশ্চাতে মরিব আমি
এত দিন ইহা নাহি জানি॥
আহা আহা হরি হরি উছ উছ মরি মরি
হায় হায় গৌসাই গৌসাই।
হৃদয়েতে দিতে স্থান করিতে কতেক মান
এখন দেখিতে আর নাই॥
শিব শিব শিব নাম সবে বলে শিবধাম
বাম দেব আমার কপালে।
যার দৃষ্টে মৃত্যু হরে তার দৃষ্টে প্রভু মরে
এমন না দেখি কোন কালে॥
শিবের কপালে রয়ে প্রভুরে আছতি লয়ে
না জানি বাড়িল কিবা গুণ।
একের কপালে রহে আরের কপাল দহে
আগুনের কপালে আগুন॥
অনলে শরীর ঢালি তথাপি রহিল গালি
মদন মরিলে মৈল রতি।
এ দুঃখে হইতে পার উপায় না দেখি আর
মরিলেক নাহি অব্যাহতি॥
অরে নিদারুণ প্রাণ কোন্ পথে পতি যান
আগে যা রে পথ দেখাইয়া।
চরণ রাজীবরাজে মনঃশিলা পাছে বাজে
হৃদে ধরি লহ রে বহিয়া॥
অরে রে মলয় বাত তোরে হৌক বজ্রাঘাত
মরে যা রে ভ্রমরা কোকিলা।
বসন্ত অল্পায়ু হও বন্ধু হৈয়া বন্ধু নও
প্রভু বধি সবে পলাইলা॥
কোথা গেলা সুররাজ মোর মুণ্ডে হানি বাজ
সিদ্ধ কৈলা আপনার কৰ্ম।
অগ্নিকুণ্ড দেহ জ্বালি আমি তাহে দেহ ঢালি

অন্তকালে কর এই ধর্ম্ম॥
বিরহ সন্তাপ যত অনলে কি তাপ তত
কত তাপ তপনের তাপে।
ভারত বুঝায়ে কয় কাঁদিলে কি আর হয়
এই ফল বিরহীর শাপে॥

রতির প্রতি দৈববাণী

অগ্নিকুণ্ড জ্বালি রতি সতী হৈতে চায়।

হইল আকাশবাণী শুনিবারে পায়॥

শুন রতি তনু ত্যাগ না কর এখন।

শুনহ উপায় কহি পাইবে মদন॥

দ্বাপরে হবেন হরি কৃষ্ণ অবতার।

কংস বধি করিবেন দ্বারকা বিহার॥

রুক্মিণীয়ে লইবেন বিবাহ করিয়া।

তঁার গর্ভে এই কাম জনমিবে গিয়া॥

শম্বর দানব বড় হইবে দুর্জন।

মদনের হাতে তার মৃত্যু নিয়োজন॥

দাসী হয়ে তুমি গিয়া থাক তার ধামে।

লুকাইয়া এইরূপ মায়াবতী নামে॥

কহিবেন শম্বরে নারদ তপোবন।

জন্মিল তোমার শত্রু কৃষ্ণের নন্দন॥

শুনিয়া শম্বর বড় মনে পাবে ভয়।

মায়া করি দ্বারকায় যাবে দুরাশায়॥

মোহিনী বিদ্যায় সবে মোহিত করিবে।

হরিয়া লইয়া কামে সমুদ্রে ফেলিবে॥

মৎস্যে গিলিবেক তারে আহর বলিয়া।

না মরিবে কাম ভবিতব্যের লাগিয়া॥

সেই মৎস্য জালিয়া ধরিয়া লবে জালে।

ভেট লয়ে দিবেক শম্বর মহীপালে॥

BANGLADARSHAN.COM

কুটিবারে সেই মৎস্য দিবেক তোমারে।
তাহাতে পাইবে তুমি কৃষ্ণের কুমারে॥
পুত্রবৎ পালিবা আপন প্রাণনাথ।
মা বলে যদ্যপি তবে কর্ণে দিবে হাত॥
শেষে তারা সম্মোহন আদি পঞ্চ বাণ।
শিখাইয়া পরিচয় দিয়া দিও জ্ঞান॥
শম্বরে বধিয়া কাম দ্বারকায় যাবে।
কহিনু উপায় এইরূপে পতি পাবে॥
শুনি রতি সাত পাঁচ ভাবনা করিয়া।
নিবায় অনলকুণ্ড রোদন ত্যজিয়া॥
কামের উদ্দেশে চলে শম্বরের দেশ।
বেশ ভূষা রূপ ছাড়ি ধরি দাসীবেশ॥
শিবের বিবাহ সবে শুন ইতঃপর।
রচিলা ভারতচন্দ্র রায় গুণাকর॥

BANGLADARSHAN.COM

শিব বিবাহ যাত্রা

শিবের বিবাহ পরম উৎসাহ
সবে হৈলা যত্নবান।
পরম সন্তোষে দুন্দুভি নির্ঘোষে
ইন্দ্র হৈলা আগুয়ান॥
নিজগণ লয়ে বরযাত্রা হয়ে
চলিলা যত অমর।
অঙ্গর নাচিছে কিন্নর গাইছে
পুলকিত মহেশ্বর॥
ব্রহ্মা পুরোহিত চলিলা ত্বরিত
বরকর্ত্তা নারায়ণ।
ইন্দ্রের শাসনে মরত ভুবনে
চলে যত রাজগণ॥

কুবের ভাঙুরী যক্ষগণ ভারি
নানা আয়োজন সাজি।
বায়ু করি বল আপনি অনল
হইলা আতস বাজি॥
নারদ রসিয়া হাসিয়া হাসিয়া
সাজাইতে গেলা রব।
বসি ছিলা হর উঠিলা সত্বর
নারদ কহে তৎপর॥
জটাজুটে চূড়া সাপে বান্ধ খুড়া
মুকুটে কি দিবে শোভা।
কি কাজ মুক্তায় হাড়ের মালায়
কন্যার মা হবে লোভা॥
কস্তুরী কেশরে চন্দনে কি করে
ঘন করে মাখ ছাই।
কি করে মণিতে যে শোভা ফণিতে
হেন বর কোথা পাই॥
ফুলমালা যত শোভা দিবে কত
যে শোভা মুণ্ডের মালে।
কাপড়ে কি শোভা জগমনোলোভা
যে শোভা বাঘের ছালে॥
রথ হস্তী আর কি কাজ তোমার
যে বুড়া বলদ আছে।
তোমার যে গুণ কব কোটি গুণ
আমি মেনকার কাছে॥
অধিক করিয়া সিদ্ধি মিশাইয়া
ধুতুরা খাইতে হবে।
যাবত বিবাহ না হবে নিৰ্ব্বাহ
উপবাস তব সবে॥
এরূপ করিয়া বর সাজাইয়া
হর লয়ে মুনি যায়।
প্রেত ভূতগণ ধায় অগণন
আন্ধার কৈল ধূলায়॥

BANGLADARSHAN.COM

বুপ বুপ বাপ দুপ দুপ দাপ
লক্ষ্য বাস্প দিয়া চলে।
মহা ধুমধাম হাঁকে হুম হাম
জয় মহাদেব বলে॥
সহজে সবার বিকট আকার
সহিতে না পারে আলো।
থাবায় থাবায় মশাল নিবায়
আন্ধারে শোভিল ভালো॥
করতালি দিয়া বেড়ায় নাচিয়া
হাসে হিহি হিহি হিহি।
দন্ত কড়মড়ি করে জড়াজড়ি
লক লক লক জিহি॥
করে চড়াচড়ি ধায় রড়ারড়ি
কিলাকিলি গণ্ডগোল।
কে কারে আছাড়ে কে কারে পাছাড়ে
কে মানে কাহার বোল॥
তরু উপাড়িয়া গিরি উখাড়িয়া
কৈল প্রলয়ের ঝড়।
বরযাত্রগণ লইয়া জীবন
পালইল দিয়া রড়॥
ইন্দ্রাদি পলায় অন্য কেবা তায়
দেখিয়া আনন্দ হরে।
আগে ভাগে হরি বিধি সঙ্গে করি
গেলা হেমন্তের ঘরে॥
হিমগিরিরাজ করিয়া সমাজ
বসি পুরোহিত সাথ।
বলদে চড়িয়া শিঙ্গা বাজাইয়া
এলা বর ভূতনাথ॥
যত কন্যাযাত্র দেখিয়া সুপাত্র
বলে এ কেমন বর।
বরযাত্রগণে দেখি ভয় মনে
না সরে কারো উত্তর॥

BANGLADARSHAN.COM

কৃষ্ণচন্দ্র রায়

রাজা ইন্দ্রপ্রায়

অশেষ গুণসাগর।

তঁার অভিমত

রচিলা ভারত

কবি রায় গুণাকর॥

শিববিবাহ

জয় জয় হর রঙ্গিয়া।

করবিলসিত নিশিত পরশু

অভয় বর কুরঙ্গিয়া॥

লক লক ফণী জটবিরাজ

তক তক তক রজনিরাজ

ধক ধক ধক দহন সাজ

বিমল চপল গঙ্গিয়া।

তুলু তুলু তুলু নয়ন লোল

হলু হলু হলু যোগিনাবোল

কুলু কুলু কুলু ডাকিনীরোল

প্রমদ প্রমথ সঙ্গিয়া॥

ভভম ভবম ববম ভাল

ঘন বাজে শিঙ্গা ডমরু গাল

রুদ্র তালে তাল দেই বেতাল

ভৃঙ্গী নাচে অঙ্গভঙ্গিয়া।

সুরগণ কহে জয় মহেশ

পুলকে পুরল সকল দেশ

ভারত যাচত ভকতিলেশ

সরস অবশ অঙ্গিয়া॥

সভামাঝে হিমালয় পূর্বমুখ হয়ে।

বসিয়াছে দানসজ্জা বাম দিকে লয়ে॥

উত্তরাস্যে রাখিয়াছে বরের আসন।

পরস্পর শাস্ত্রকথা কহে ধীরগণ॥

হেন কালে বর আসি কৈলা অধিষ্ঠান।
সম্বমে উঠিয়া সবে কৈলা অভ্যুত্থান॥
বর দেখি হিমালয় হৈলা হতবুদ্ধি।
ভূতগণে দেখিয়া উড়িল ভূতশুদ্ধি॥
কহিতে না পারে দক্ষযজ্ঞ ভাবি মনে।
ভুলিয়া বসিলা গিরি বরের আসনে॥
ভবানীর ভাবে ভব ঢুলিয়া ঢুলিয়া।
গিরির আসনে গিয়া বসিলা ভুলিয়া॥
বিধি তাহে বিধি দিলা এ এক নিয়ম।
তদবধি বিবাহেতে হৈল ব্যতিক্রম॥
কুশহস্ত হিমালয় বিধির বিহিত।
হেন কালে জিজ্ঞাসা করিল পুরোহিত॥
কে পিতা কে পিতামহ কে প্রপিতামহ।
কিবা গোত্র কয় বা প্রবর বর কহ॥
হেঁট মুখে পঞ্চগনন ভাবিতে লাগিলা।
বিষয় বুঝিয়া বিধি বিশেষ কহিলা॥
স্মরহর বর বরপিতা পুরহর।
পিতামহ সংহর প্রপিতামহ হর॥
শিব গোত্র শম্ভু শৰ্ব্ব শঙ্কর প্রবর।
শুনিয়া বিধিরে চাহি হাসিলেন হর॥
এরূপে গিরিশে গিরি গৌরী দান দিলা।
স্ত্রী আচার করিবারে মেনকা আইলা॥
কেশব কৌতুকী বড় কৌতুক দেখিতে।
নারদেরে কহিলা কন্দল লাগাইতে॥
গরুড়ে কহিলা তুমি ভয় দেখাইয়া।
শিবকটিবন্ধ সাপ দেহ খেদাইয়া॥
এয়োগণ সঙ্গে করি প্রদীপ ধরিয়া।
লইয়া নিছনিডালা হুলাহুলি দিয়া॥
বরের সমুখে মাত্র মেনকা আইলা।
পলাবার পথে গিয়া হরি দাঁড়াইলা॥
গরুড় হুঙ্কার দিয়া উত্তরিল গিয়া।
মাথা গুঁজে যত সাপ যায় পলাইয়া॥

BANGLADARSHAN.COM

বাঘছাল খসিল উলঙ্গ হৈলা হর।
এয়োগণ বলে ও মা এ কেমন বর॥
মেনকা দেখিলা চেয়ে জামাই লেঙ্গটা।
নিবায়ে প্রদীপ দেয় টানিয়া ঘোমটা॥
নাকে হাত এয়োগণ বলে আই আই।
মেদিনী বিদরে যদি তাহাতে সামাই॥
দেখিয়া সকল লোক মশাল নিবায়।
শিবভালে চাঁদ অগ্নি আলো করে তায়॥
লাজে মরে এয়োগণ কি হৈল আপদ।
মেনকার কাছে গিয়া কহিছে নারদ॥
শুন শুন এয়োগণ ব্যস্ত কেন হও।
কেমন জামাই পেলে বুঝে শুঝে লও॥
মেনকা নারদবাক্যে দুনা মনদুখে।
পলাইতে গোবিন্দের পড়িলা সমুখে॥
দশনে রসনা কাটি গুড়ি গুড়ি যায়।
আই আই কি লাজ কি লাজ হয় হয়॥
ঘরে গিয়া মহাক্রোধে ত্যজি লাজ ভয়।
হাত লাড়ি গলা তাড়ি ডাক ছাড়ি কয়॥
ও রে বুড়া আঁটকুড়া নারদা অলপেয়ে।
হেন বর কেমনে আনিলি চক্ষু খেয়ে॥
বুড়া হয়ে পাগল হয়েছে গিরিরাজ।
নারদার কথায় করিল হেন কাজ॥
ভারত কহিছে আর কি আছে আটক।
কন্দলের অভাব কি নারদ ঘটক॥

কন্দল ও শিবনিন্দা

আই আই ওই বুড়া কি
এই গৌরীর বর লো।
বিয়ার বেলা এয়োর মাঝে

হৈল দিগম্বর লো॥

উমার কেশ চামরছটা

তামার শলা বুড়ার জটা

তায় বেড়িয়া ফৌফায় ফণী

দেখে আসে জ্বর লো।

উমার মুখ চাঁদের চূড়া

বুড়ার দাড়ি শণের লুড়া

ছারকপালে ছাইকপালে

দেখে পায় ডর লো॥

উমার গলে মণির হার

বুড়ার গলে হাড়ের ভার

কেমন করে ও মা উমা

করিবে বুড়ার ঘর লো।

আমার উমা মেয়ের চূড়া

ভাঙ্গড় পাগল ওই লো বুড়া

ভারত কহে পাগল নহে

ওই ভুবনেশ্বর লো॥

BANGLADARSHAN.COM

কান্দে রাণী মেনকা চক্ষুর জলে ভাসে।

নখে নখ বাজায়ে নারদ মুনি হাসে॥

কন্দলে পরমানন্দ নারদের টেঁকি।

আঁকশলী পোয়া মোনা গড়ে মেকামেকি॥

পাখ নাহি তবু টেঁকি উড়িয়া বেড়ায়।

কোণের বহুড়ী লয়ে কন্দলে জড়ায়॥

সেই টেঁকি চড়ে মুনি কান্ধে বীণা যন্ত্র।

দাড়ি লড়ে ঘন পড়ে কন্দলের মন্ত্র॥

আয় রে কন্দল তোরে ডাকে সদাশিব।

মেয়েগুলো মাথা কোড়ে তোরে রক্ত দিব॥

বেনা বোড়ে বুটি বান্ধি কি কর বসিয়া।

এয়ো সুয়া এক ঠাঁই দেখ রে আসিয়া॥

ঘুরুলে বাতাস লয়ে জলের ঘুরলে।

সেহকুল কাঁটা হাতে ঝাট এস চলে॥

এক ঠাই এত মেয়ে দেখা নাহি যায়।
দোহাই চঞ্জীর তোরে আয় আয় আয়॥
নারদের মন্ত্র তন্ত্র না হয় নিষ্ফল।
পরস্পর এযোগণে বাজিল কন্দল॥
এ বলে উহারে সই ওটা বড় ঠেঁটা।
আর জন বলে সই এই বটে সেটা॥
যেই মাত্র বুড়া বর হইল লেঙ্গটা।
আই মা লো চেয়ে রৈল ফেলিয়া ঘোমটা॥
সে বলে লো বটে বটে আমি বড় টেঁটা।
গোবিন্দে সুন্দর দেখি চেয়ে রৈল কেটা॥
তার সই বলে থাক জানি লো উহারে।
পথিকেরে ভুলাইয়া আনে আঁখিঠারে॥
ইহার হইয়া কহে উহার মকর।
গোবিন্দেরে দেখিয়াছে এ বড় পামর॥
চারিমুখা রাজাটা বরের ভাই হেন।
তার দিকে তোর দিদি চেয়ে রৈল কেন॥
সে বলে নাফানী আ লো না জান আপনা।
চাঁদে দেখি দেখিয়াছি তোর সতীপনা॥
এইরূপে কন্দলে লাগিল বুটাবুটি।
ডাকাডাকি গালাগালি মাথা কুটাকুটি॥
দাঁড়াইয়া পিঁড়ায় হাসেন পশুপতি।
হেঁট মুখে মৃদু মন্দ হাসেন পার্বতী॥
হর হর বলিয়া ডাকিছে ভূত যত।
হরিষ বিষাদে হিমালয় জ্ঞানহত॥
ভূতভয়ে এযোগণ নীরব রহিছে।
ডুকরিয়া ফুকরিয়া মেনকা কহিছে॥
আহা মরি ও মা উমা সোনার পুতুল।
বুড়ারে কে বলে বর কেবল বাতুল॥
পায়ে পড়ে আমার উমার কেশপাশ।
বুড়ার বিকট জটা পরশে আকাশ॥
আমার উমার দন্ত মুকুতাগঞ্জন।
বায়ে লড়ে ভাঙ্গা বেড়া বুড়ার দশন॥

BANGLADARSHAN.COM

উমার বদনচাঁদে পরকাশে রাকা।
বুড়ার বিকট মুখে দাড়ি গৌফ পাকা॥
কি শোভা উমার গায়ে সুগন্ধি চন্দন।
ছাই মাখে অঙ্গে বুড়া এ কি অলক্ষণ॥
উমার গলায় জাতী মালতীর মালা।
বুড়ার গলায় হাড়মালা এ কি জ্বালা॥
বিচিত্রে বসন উমা পরে কত বন্ধে।
বাঘছাল পরে বুড়া আঁত উঠে গন্ধে॥
উমার রতনকাঞ্চী ভ্রমর গুঞ্জরে।
বুড়ার কোমরবন্ধ ফণী ফৌস ধরে॥
নিছনি করিতে গেনু লয়ে তৈল কুড়।
সাপে খেয়েছিল প্রায় বাঁচালে গরুড়॥
আই মা এ লাজ কি রাখিতে ঠাই আছে।
কেমনে উলঙ্গ হৈল শাশুড়ীর কাছে॥
আলো নিবাইনু সবে দারুণ লজ্জায়।
কপালে আগুন তার আলো করে তায়॥
আহা মরি বাছা উমা কি তপ করিলে।
সাপুড়ের ভূতুড়ের কপালে পড়িলে॥
বরযাত্র প্রেত ভূত দাঁড়াইয়া মূতে।
ভাগ্যবলে এয়োগণে না পাইল ভূতে॥
কহিছে ভারতচন্দ্র রায় গুণাকর।
দক্ষযজ্ঞ মনে করি নিন্দহ শঙ্কর॥

শিবের মোহন বেশ

আমার শঙ্কর করুণাকর গো।
নিন্দা কর না ত্রিভুবনে মহেশ্বর॥
কালকূট পিয়া বিশ্ব বাঁচাইয়া
মৃত্যুঞ্জয় হৈলা হর।
কপালে অনল শিরে গঙ্গাজল

অনলে জলে সৌসর॥
ভালে সুধাকর গলে বিষভর
সুধা বিষে বরাবর।
ভারত কহিছে মোরে না সহিছে
এ শিবে নিন্দে পামর॥

শিবনিন্দা করিয়া মেনকা যত কহে।
দক্ষেরে হইল মনে উমারে না সহে॥
যে দুঃখে দক্ষের ঘরে ত্যজিলাম কায়।
এখানে মেনকা বুঝি ফেলে সেই দায়॥
হর লয়ে নরলীলা করিবারে চাই।
তাহে হয় শিবনিন্দা এ বড় বালাই॥
কি জানি শিবের মনে পাছে হয় দ্বেষ।
কৃপা করি মেনকারে উমা দিল বোধ॥
মেনকার হৈল জ্ঞান দেবীর দয়ায়।
মনোহর বর হরে দেখিবারে পায়॥
জটাজুট মুকুট দেখিলা ফণিমণি।
বাঘছাল দিব্য বস্ত্র দিব্য পৈতা ফণী॥
ছাই দিব্য চন্দন বদন কোটি চাঁদ।
মুক্ত হৈল সর্বজন দেখিয়া সুছাঁদ॥
হরগুণ বরগুণ হৈল এক ঠাই।
মেনকা আনন্দে ঘরে লইয়া জামাই॥
এইরূপে হরগৌরী বিবাহ হইল।
হিমালয় মেনকার আনন্দ বাড়িল॥
কুতূহলে ছলাছলি দেয় এয়োগণ।
ঋষিগণ বেদগানে পুরিল ভুবন॥
কিন্নর করয়ে গান নাচয়ে অঙ্গর।
অশেষ কৌতুক করে যত বিদ্যাধর॥
উমা লয়ে উমাপতি গেলেন কৈলাস।
বিধি বিষ্ণু আদি সবে গেলা নিজ বাস॥
নিত্যসখী আসি জয়া বিজয়া মিলিল।
ডাকিনী যোগিনী আদি যে যেখানে ছিল॥

BANGLADARSHAN.COM

আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

সিদ্ধিঘোটন

বড় আনন্দ উদয়।

বহু দিনে ভগবতী আইলা আলয়॥

শঙ্খঘণ্টারব মহামহোৎসব

ত্রিভুবনে জয় জয়।

নাচিছে নাটক গাইছে গায়ক

রাগ তাল মান লয়॥

যত চরাচর হরিষ অন্তর

পরম আনন্দময়।

রায় গুণাকর কহে পুটকর

মোরে যেন দয়া হয়॥

BANGLADARSHAN.COM

উমা পেয়ে মহেশের বাড়িল আনন্দ।

নন্দীরে কহেন কথা হাসি মৃদুমন্দ॥

শুন শুন অরে নন্দি তুমি বড় ভক্ত।

সিদ্ধি ঘুটি দিতে মোরে তুমি বড় শক্ত॥

এত বেলা হৈল দেখ সিদ্ধি নাহি খাই।

বুদ্ধিহারা হইয়াছি শুদ্ধি নাহি পাই॥

ফাঁফর হইনু দেখ মুখে উড়ে ফেকো।

ভেভাচাকা লাগিল ভুলিয়া হৈনু ভেকো॥

নূতন ঘোটনা কুঁড়া দিয়াছে বিশাই।

আজি বড় শুভ দিন বার কর তাই॥

এমন আনন্দ মোর কবে হবে আর।

সতী নিবসতি এল গেল অন্ধকার॥

যদবধি এই সতী দক্ষযজ্ঞে গিয়া।

ছাড়ি গিয়াছিল মোরে শরীর ছাড়িয়া॥

তদবধি গৃহ শূন্য সিদ্ধি নাহি জানি।
আজি হৈল ইষ্টসিদ্ধি সিদ্ধি দেহ আনি॥
অল্প করি সিদ্ধি লহ মণ লক্ষ বার।
ধুতুরার ফল তাহে যত দিতে পার॥
মহুরী মরিচ লঙ্গ প্রভৃতি মশলা।
অধিক করিয়া দিয়া করহ রসলা॥
দুগ্ধ দিয়া ঘন করি ঘুরাও ঘোটনা।
দুধ কুসুম্ভায় আজি হয়েছে বাসনা॥
ভৃঙ্গী মহাকাল ভূত ভৈরবাদী যত।
সকলে প্রসাদ পাবে ঘোট তারি মত॥
শুনি নন্দী মহানন্দে বন্দি পঞ্চগননে।
নূতন ঘোটনা কুঁড়া আনিল যতনে॥
বাছিয়া সিদ্ধির রাশি উড়াইয়া গুঁড়া।
ধুইয়া গঙ্গার জলে পূর্ণ কৈল কুঁড়া॥
দু হাতে ঘোটনা দুই পায়ে কুঁড়া ধরি।
ত্রিপুরমর্দন নাম মনে মনে স্মরি॥
তাকে পাকে ঘোটনায় আরস্তিলা পাক।
ঘর্ঘর ঘুরান ঘোর ঘন ঘন ডাক॥
রাশি রাশি তাল তাল পর্বতপ্রমাণ।
গঙ্গাজলে ঘুলি কৈল সমুদ্র সমান॥
সিদ্ধি ঘোটা হৈল হর হাসেন হরিষে।
বস্ত্র বিনা ব্যস্ত হৈলা ছাকিবেন কিসে॥
হৈমবতী হাসিছেন বদনে অঞ্চলে।
ভারত কহিছে আর ছাকিয়া কি ফল॥

সিদ্ধিভক্ষণ

মহাদেবের আঁখি ঢুলু ঢুলু।

সিদ্ধিতে মগন বুদ্ধি শুদ্ধি হৈল ভুল॥

নয়নে ধরিল রঙ্গ

অলসে অবশ অঙ্গ

লটপট জটাজুট গঙ্গা হুল খুল।
খসিল বাঘের ছাল আলু থালু হাড়মাল
ভুলিল ডমরু শিঙ্গা পিনাক ত্রিশূল॥
হাসি হাসি উতরোল আধ আধ আধ বোল
ন ন্ন নন্দি নন্দি আ আ আন ন্ন নকুল।
ভারতের অনুভবে ভাঙ্গে কি ভুলাবে ভবে
ভবানী ভাবেন ভব ভাবভরাকুল॥

সিদ্ধি ঘুটি আনি নন্দী অন্তরে দাঁড়ায়।
বেতাল ভৈরবগণ নাচিয়া বেড়ায়॥
সমুখে থুইয়া সিদ্ধি মুদিয়া নয়ন।
বিজয়ার বীজমন্ত্র জপি পঞ্চগনন॥
অঙ্গুলির অগ্রভাগে অগ্র ভাগ লয়ে।
ভবানীর নামে দিলা একভাব হয়ে॥
ছোঁয়াইয়া চক্ষে মন্ত্র পড়িয়া বিশেষ।

একই নিশ্বাসে পিয়া করিলা নিঃশেষ॥
হুঙ্কার ছাড়িয়া রসে মগন হইয়া।
আকুল হইলা বড় নকুল লাগিয়া॥
নকুল করিব কি রে কহেন নন্দীরে।
ভৃঙ্গী কহে মহাপ্রভু কি আছে মন্দিরে॥
তাল বলে আজি ঘরে মাতা উপস্থিত।
মেনকা মেলানী ভার দিয়াছে কিঞ্চিৎ॥
হাসিয়া কহেন হর ভালা মোর ভাই।
বড় কথা মনে কৈলি আন দেখি তাই॥
অসংখ্য মেলানী ভার নকুলে উড়িল।
সহচরগণ সবে ভাবিতে লাগিল॥
শঙ্কর কহেন নন্দি সবারে ডাকাও।
সকলে সিদ্ধির শেষ পরসাদ পাও॥
সকলে বাঁটিয়া লও কিঞ্চিৎ কিঞ্চিৎ।
সাবধান কেহ যেন না হয় বঞ্চিৎ॥
আজ্ঞামত পূর্ণ করি সকলে পাইলা।
নকুলের শেষ নাহি ভাবিতে লাগিলা॥

BANGLADARSHAN.COM

ভবানীর কাছে গিয়া নন্দী দেয় লাজ।
অগো মাতা তোমার মায়ের দেখ কাজ॥
এমন মেলানীভার দিল আই বুড়ী।
জামাইর সিদ্ধির নকুলে গেল উড়ি॥
আমরা নকুল করি এমন কি আছে।
তুমি আজ্ঞা দিলে যাই মেনকার কাছে॥
হাসিয়া কহেন দেবী অরে বাছা সব।
তোমা সবাকার কেবা সহে উপদ্রব॥
আই বলি যাহ যদি মোর মার ঠাই।
যে বুঝি তাহার চালে খড় রবে নাই॥
তোমরা আমার মায়ে কি দোষ পাইলে।
ফুরাইবে নাহি দ্রব্য বৎসর খাইলে॥
কে বলে মেলানীভারে নাহি আয়োজন।
আন রে মেলানীভার দেখিব কেমন॥
মায়া কৈলা মহামায়া মায়ের কারণ।
পূরিল মেলানীভার পূর্বের যেমন॥
দেখিয়া আনন্দ ভূত ভৈরব সকলে।
খাইতে লাগিল সবে মহাকুতূহলে॥
জয় জয় হর গৌরী বলিয়া বলিয়া।
নাচিয়া বেড়ায় সবে করতালি দিয়া॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

হরগৌরীর কথোপকথন

আমারে ছাড়িও না। ভবানি।
সুশীলা হইয়া শিলায় জন্নিয়া
শিলাময় হিয়া হইও না।
এ ঘোর পাথারে ফেলিয়া আমারে
দোষ বারে বারে লইও না॥

শিশুগণ মিলা যেন খেলা দিলা
তেমন এখানে খেলিও না।
তব মায়াছান্দে বিশ্ব পড়ি কান্দে
ভারতে এ ফেরে ফেলিও না॥

আনন্দসাগরে হর মগন হইলা।
বিনয়ে দেবীর প্রতি কহিতে লাগিলা॥
তুমি মূল প্রকৃতি সকল বিশ্বসার।
কৃপা করি আমারে করিলে অঙ্গীকার॥
দক্ষযজ্ঞে আমার নিন্দায় দেহ ছাড়ি।
এত দিন ছিলা গিয়া হেমন্তের বাড়ী॥
ভাগ্যে সে তোমার দেখা পানু আর বার।
সত্য করি কহ মোরে না ছাড়িবে আর॥
হাসিয়া কহেন দেবী তোমা ছাড়া নই।
শঙ্কর কহেন তবে এস এক হই॥

অর্দ্ধ অঙ্গ তোমার আমার অর্দ্ধ অঙ্গে।
হরগৌরী একতনু হয়ে থাকি রঙ্গে॥
হাসিয়া কহেন দেবী এমনো কি হয়।
সোহাগে এমন কথা পুরুষেরা কয়॥
নারীর পতির প্রতি বাসনা যেমন।
পতির নারীর প্রতি মন কি তেমন॥
পাইতে পতির অঙ্গ নারী সাদ করে।
তার সাক্ষী মৃতপতি সঙ্গে পুড়ে মরে॥
পুরুষেরা দেখ যদি নারী মরি যায়।
অন্য নারী ঘরে আনে নাহি স্মরে তায়॥
অর্দ্ধ অঙ্গ যদি মোর অঙ্গে মিলাইবা।
কুচনীর বাড়ী তবে কেমনে যাইবা॥
শুনিয়া কহেন শিব পাইয়া সরম।
তোমার সহিত নহে এমন মরম॥
তোমার শরীর আমি মাথায় করিয়া।
দেখিয়াছ ফিরিয়াছি পৃথিবী ঘুরিয়া॥
চক্র করি চক্রপাণি চক্রেতে কাটিয়া।

BANGLADARSHAN.COM

মোর মাথা হৈতে তোমা দিলা ছাড়াইয়া ॥
অঙ্গ প্রতিঅঙ্গ তব পড়িল যেখানে।
ভৈরব হইয়া আমি রয়েছি সেখানে ॥
তবে মোর হেন কথা কহ কি লাগিয়া।
আর বার যাবে বুঝি আমারে ছাড়িয়া ॥
শুনিয়া কহেন দেবী সহাস্য বদনে।
সমভাবে দৌহে এক হইবে কেমনে ॥
পাঁচ মুখ তোমার আমার এক মুখ।
সমভাবে অর্দ্ধ ভাগে তুমি পাবে দুখ ॥
দশ হাত তোমার আমার দুতি হাত।
সমভাবে অর্দ্ধ ভাগে হইবে উৎপাত ॥
শঙ্কর কহেন শুন পূর্ব সমাচার।
এক মুখ দুই হাত আছিল আমার ॥
উর্দ্ধ মুখে আগমে তোমার গুণ গাই।
দুই ভুজ উর্দ্ধ করি তোমারে ধেয়াই ॥
চারি বেদে তব গুণ গান করিবারে।
চারি মুখ দিলা তুমি অধিক আমারে ॥
পঞ্চ তালে নাচিতে অধিক আট হাত।
দিয়াছ আপনি পূর্ব নিন্দহ পশ্চাত ॥
এত বলি একমুখ দ্বিভুজ হইলা।
সাক্ষী করি এক মুখ রুদ্রাক্ষে রাখিলা ॥
হাসিয়া কহেন দেবী হইলা সমান।
হরগৌরী এক হই ইথে নাহি আন ॥
দুই জনে সহাস্য বদনে রসরঙ্গে।
হরগৌরী এক হৈলা দুই অর্দ্ধ অঙ্গে ॥
এইরূপে হরগৌরী করেন বিহার।
গজানন ষড়ানন হইল কুমার ॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর ॥

BANGLADARSHAN.COM

হরগৌরী রূপ

কি এ নিরূপম শোভা মনোরম
হর গৌরী এক শরীরে।
শ্বেত পীত কায় রাঙ্গা দুটি পায়
নিছনি লইয়া মরি রে ॥

আধ বাঘছাল ভাল বিরাজে।
আধ পটাম্বর সুন্দর সাজে
আধ মণিময় কিঙ্কিণী বাজে
আধ ফণিফণা ধরি রে।
আধই হৃদয়ে হাড়ের মালা
আধ মণিময় হার উজালা
আধ কণ্ঠে শোভে গরল কালা
আধই সুখামাধুরী রে ॥

এক হাতে শোভে ফণিভূষণ
এক হাতে শোভে মণিকঙ্কণ
আধ মুখে ভাঙ্গ ধুতুরা ভক্ষণ
আধই তাম্বুল পূরি রে।

ভাঙ্গে ঢুলু ঢুলু এক লোচন
কজ্জলে উজ্জ্বল এক নয়ন
আধ ভালে হরিতাল সুশোভন
আধই সিন্দূর পরি রে ॥

কপাল লোচন আধই আধে
মিলি এক হইল বড়ই সাধে
দুই ভাগে অগ্নি এক অবাধে
হইল প্রণয় করি রে।

দোঁহার আধ আধ আধ শশী
শোভা দিল বড় মিলিয়া বসি
আধ জটাজুটে গঙ্গা সরসী
আধই চারু কবরী রে ॥

এক কাণে শোভে ফণিমণ্ডল

এক কাণে শোভে মণিকুণ্ডল
আধ অঙ্গে শোভে বিভূতি ধ্বল
আধই গন্ধকস্তুরী রে।
ভারত কবি গুণাকর রায়
কৃষ্ণচন্দ্র প্রেম ভকতি চায়
হরগৌরী বিয়া পালা হইল সায়
সবে বল হরি হরি রে॥

কৈলাসবর্ণন

কৈলাস ভূধর অতি মনোহর
কোটি শশী পরকাশ।
গন্ধর্ষ কিন্নর যক্ষ বিদ্যাধর
অপ্সরগণের বাস॥
রজনী বাসর মাস সংবৎসর
দুই পক্ষ সাত বার।
তন্ত্র মন্ত্র বেদ কিছু নাহি ভেদ
সুখ দুঃখ একাকার॥
তরু নানা জাতি লতা নানা ভাতি
ফলে ফুলে বিকসিত।
বিবিধ বিহঙ্গ বিবিধ ভূজঙ্গ
নানা পশু সুশোভিত॥
অতি উচ্চতরে শিখরে শিখরে
সিংহ সিংহনাদ করে।
কোকিল হুঙ্কারে ভ্রমর বাঙ্কারে
মুনির মানস হরে॥
মৃগ পালে পাল শার্দূল রাখাল
কেশরী হস্তিরাখাল।
ময়ূর ভূজঙ্গে ক্রীড়া করে রঙ্গে
ইন্দুরে পোষে বিড়াল॥

সব পিয়ে সুধা নাহি তৃষ ক্ষুধা
কেহ না হিংসয়ে কারে।
যে যার ভক্ষক সে তার রক্ষক
সার অসার সংসারে॥
সম ধর্মাধর্ম সম কর্মাকর্ম
ছোট বড় সমতুল।
জরা মৃত্যু নাই অপরূপ ঠাই
কেবল কৈবল্য মূল॥
চৌদিকে দুস্তর সুধার সাগর
কল্পতরু সারি সারি।
মণিবেদীপরে চিন্তামণি ঘরে
বসি গৌরী ত্রিপুরারী॥
শিব শক্তি মেলা নানা রসে খেলা
দিগম্বরী দিগম্বর।
বিহার যে সব সে সব কি কব
বিধি বিষ্ণু অগোচর॥
নন্দী দ্বারপাল ভৈরব বেতাল
কার্ত্তিকেয় গণপতি।
ভূত প্রেত যক্ষ ব্রহ্মদৈত্য রক্ষ
গণিতে কার শকতি॥
এক দিন হর ক্ষুধায় কাতর
গৌরীরে কহিলা হাসি।
ভারত ব্রাহ্মণ করে নিবেদন
দয়া কর কাশীবাসি॥

BANGLADARSHAN.COM

হরগৌরীর বিবাদসূচনা

বিধি মোরে লাগিল রে বাদে।

বিধি যার বিবাদী কি সাদ তার সাদে॥

এ বড় বিষম ধন্দ

যত করি ছন্দ বন্দ

ভাল ভাবি হয় মন্দ

পড়িঁনু প্রমাদে।

ধর্ম্মে জানি সুখ হয়

তবু মন নাহি লয়

অধর্ম্মে বিবিধ ভয়

তবু তাই স্বাদে॥

মিছা দারা সুত লয়ে

মিছু সুখে সুখী হয়ে

যে রহে আপনা কয়ে

সে মজে বিষাদে।

সত্য ইচ্ছা ঈশ্বরের

আর সব মিছা ফের

ভারত পেয়েছে টের

গুরুর প্রসাদে॥

শঙ্কর কহেন শুন শুনহ শঙ্করি।

ক্ষুধায় কাঁপয়ে অঙ্গ বলহ কি করি॥

নিত্য নিত্য ভিক্ষা মাগি আনিয়া যোগাই।

সাদ করে এক দিন পেট ভরে খাই॥

সকলের ঘরে ঘরে নিত্য ফিরি মেগে।

সরম ভরম গেল উদরের লেগে॥

ভিক্ষা মাগি ভিক্ষা মাগি কাটিলাম কাল।

তবু ঘুচাইতে নারিলাম বাঘছাল॥

আর সবে ভোগ করে কত মত সুখ।

কপালে আগুন মোর না ঘুচিল দুখ॥

নীচ লোকে উচ্চ ভাষে সহিতে না পারি।

ভিক্ষা মাগি নাম হৈল শঙ্কর ভিখারী ॥
বিধাতার লিখন কাহার সাধ্য খণ্ডি।
গৃহিণী ভাগ্যের মত পাইয়াছি চণ্ডী ॥
সর্বদা কন্দল বাজে কথায় কথায়।
রসকথা কহিতে বিরস হয়ে যায় ॥
কিবা শুভ ক্ষণে হৈল অলক্ষণা ঘর।
খাইতে না পানু কভু পূরিয়া উদর ॥
আর আর গৃহীর গৃহিণী আছে যারা।
কত মতে স্বামীর সেবন করে তারা ॥
অনির্বাহে নির্বাহ করয়ে কত দায়।
আহা মরি দেখিলে চক্ষুর পাপ যায় ॥
পরস্পরা পরস্পর শুনি এই সূত্র।
স্ত্রীভাগ্যে ধন পুরুষের ভাগ্যে পুত্র ॥
এইরূপে দুই জনে বাড়িছে বাকছল।
ভারতে বিদিত ভাল দুঃখের কন্দল ॥

BANGLADARSHAN.COM

হরগৌরীকন্দল

কেবা এমন ঘরে থাকিবে। জয়া।
এ দুঃখ সহিতে কেবা পারিবে ॥
আপনি মাখেন ছাই আমারে কহেন তাই
কেবা সে বালাই ছাই মাখিবে।
দামাল ছাবাল দুটি অন্ন চাহে ভূমে লুটি
কথায় ভুলায়ে কেবা রাখিবে ॥
বিষপানে নাহি লয় কথা কৈতে ভয় হয়
উচিত কহিলে দ্বন্দ্ব বাড়িবে।
মা বাপ পাষণ-হিয়া ভিক্ষুকেরে দিল বিয়া
ভারত এ দুঃখে ঘর ছাড়িবে ॥

শিবার হইল ক্রোধ শিবের বচনে।
ধক ধক জ্বলে অগ্নি ললাটলোচনে॥
শুনিলি বিজয়া জয়া বুড়াটির বোল।
আমি যদি কই তবে হবে গণ্ডগোল॥
হায় হায় কি কহিব বিধাতা পাষণ্ডী।
চণ্ডের কপালে পড়ে নাম হৈল চণ্ডী॥
গুণের নাহিক সীমা রূপ ততোধিক।
বয়সে না দেখি গাছ পাথর বল্লীক॥
সম্পদের সীমা নাই বুড়া গরু পুঁজি।
রসনা কেবল কথা সিন্দুকের কুঁজি॥
কড়া পড়িয়াছে হাতে অন্ন বস্ত্র দিয়া।
কেন সব কটু কথা কিসের লাগিয়া॥
আমার কপাল মন্দ তাই নাই ধন।
উঁহঁর কপালে সবে হয়েছে নন্দন॥
কেমনে এমন কন লাজ নাহি হয়।
কহিবারে পারি কিন্তু উপযুক্ত নয়॥
অলক্ষণা সুলক্ষণা যে হই সে হই।
মোর আসিবার পূর্বকালি ধন কই॥
গিয়াছিলে বুড়াটি যখন বর হয়ে।
গিয়াছিলে মোর তরে কত ধন লয়ে॥
বুড়া গরু লড়া দাঁত ভাঙ্গা গাছ গাডু।
ঝুলি কাঁথা বাঘছাল সাপ সিদ্ধি লাডু॥
তখনো যে ধন ছিল এখনো সে ধন।
তবে মোরে অলক্ষণা কন কি কারণ॥
উঁহঁর ভাগ্যের বলে হইয়াছে বেটা।
কারে কব এ কৌতুক বুঝিবেক কেটা॥
বড় পুত্র গজমুখ চারি হাতে খান।
সবে গুণ সিদ্ধি খেতে বাপের সমান॥
ভিক্ষা মাগি খুদ কোণ যে পান ঠাকুর।
তাহার ইন্দুরে করে কাটুর কুটুর॥
ছোট পুত্র কার্তিকেয় ছয় মুখে খায়।
উপায়ের সীমা নাই ময়ূরে উড়ায়॥

BANGLADARSHAN.COM

উপযুক্ত দুটি পুত্র আপনি যেমন।
সবে ঘরে আমি মাত্র এই অলক্ষণ॥
করেতে হইল কড়া সিদ্ধি বেটে বেটে।
তৈল বিনা চূলে জটা অঙ্গ গেল ফেটে॥
শাঁখা শাড়ী সিন্দূর চন্দন পান গুয়া।
নাহি দেখি আয়তি কেবল আচাভুয়া॥
ভারত কহিছে মা গো কত বল আর।
শিবের যে তিরস্কার সেই পুরস্কার॥

শিবের ভিক্ষায় গমনোদ্যোগ

ভবানীর কটুভাষে লজ্জা হৈল কৃতিবাসে
ক্ষুধানলে কলেবর দহে।
বেলা হৈল অতিরিক্ত পিন্ডে হৈল গলা তিক্ত
বৃদ্ধ লোকে ক্ষুধা নাহি সহে॥
হেঁটমুখে পঞ্চগনন নন্দীরে ডাকিয়া কন
বৃষ আন যাইব ভিক্ষায়।
আন শিঙ্গা হাড়মাল ডমরু বাঘের ছাল
বিভূতি লেপিয়া দেহ গায়॥
আন রে ত্রিশূল ঝুলি প্রমথ সকলগুলি
যতগুলি ধুতুরার ফল।
খলি ভরা সিদ্ধিগুঁড়া লহ রে ঘোটনা কুঁড়া
জটায় আছয়ে গঙ্গাজল॥
ঘর উজাড়িয়া যাব ভিক্ষায় যে পাই খাব
অদ্যাবধি ছাড়িনু কৈলাস।
নারী যার স্বতন্তরা সে জন জীয়ন্তে মরা
তাহারে উচিত বনবাস॥
বৃদ্ধকাল আপনার নাহি জানি রোজগার
চাষবাস বাণিজ্য ব্যাপার।

সকলে নিৰ্গুণ কয় ভুলায়ে সৰ্ব্বস্ব লয়
নাম মাত্ৰ রহিয়াছে সার॥
যত আনি তত নাই না ঘুচিল খাই খাই
কিবা সুখ এ ঘরে থাকিয়া।
এত বলি দিগম্বর আরোহিয়া বৃষবর
চলিলেন ভিক্ষার লাগিয়া॥
শিবের দেখিয়া গতি শিবা কন ক্ৰোধমতি
কি করিব একা ঘরে রয়ে।
বৃথা কেন দুঃখ পাই বাপের মন্দিরে যাই
গণপতি কার্তিকেয় লয়ে॥
যে ঘরে গৃহস্থ হেন সে ঘরে গৃহিণী কেন
নাহি ঘরে সদা খাই খাই।
কি করে গৃহিণীপনে খন খন ঝন ঝনে
আসে লক্ষ্মী বেড় বান্ধে নাই॥
বাণিজ্যে লক্ষ্মীর বাস তাহার অর্ধেক চাষ
রাজসেবা কত খচমচ।
গৃহস্থ আছয়ে যত সকলের এই মত
ভিক্ষা মাগা নৈব চ নৈব চ॥
হইয়া বিরসমন লয়ে গুহ গজানন
হিমালয়ে চলিলা অভয়া।
ভারত বিনয়ে কয় এমন উচিত নয়
নিষেধ করিয়া কহে জয়া॥

জয়ার উপদেশ

কহে সখী জয়া শুন গো অভয়া
এ কি কর ঠাকুরালি।
ক্ৰোধে করি ভর যাবে বাপঘর
খেয়াতি হবে কাঙ্গালী॥
মিছা ক্ৰোধ করি আপনা পাসরি

কি কর ছাবাল খেলা।
সুখমোক্ষধাম অন্নপূর্ণা নাম
সংসার সাগরে ভেলা ॥
অন্নপূর্ণা হয়ে অন্ন দেহ কয়ে
দাঁড়াবে কাহার কাছে।
দেখিয়া কাঙ্গালী সবে দিবে গালি
রহিতে না দিবে নাছে ॥
জননীর আশে যাবে পিতৃবাসে
ভাজে দিবে সদা তাড়া।
বাপে না জিজ্ঞাসে মায়ে না সম্ভাষে
যদি দেখে লক্ষ্মীছাড়া ॥
যা বলি তা কর নিজ মূর্তি ধর
বস অন্নপূর্ণা হয়ে।
কৈলাসশিখর অন্নে পূর্ণ কর
জগতের অন্ন লয়ে ॥
তিন ভূমণ্ডলে যে স্থলে যে স্থলে
যত যত অন্ন আছে।
কটাক্ষ করিয়া আনহ হরিয়া
রাখহ আপন কাছে ॥
কমল আসন আদি দেবগণ
কোটি কোটি লক্ষ লক্ষ।
কমলা প্রভৃতি যতেক প্রকৃতি
এই স্থানে দেহ ভক্ষ্য ॥
ফিরি ঘরে ঘর হইয়া ফাঁফর
কোথাও অন্ন না পেয়ে।
আপনি শঙ্কর আসিবেন ঘর
তোমার এ গুণ গেয়ে ॥
অন্ন দিয়া তাঁরে সকল সংসারে
আপনা প্রকাশ কর।
প্রকাশিয়া তন্ত্রে অন্নপূর্ণামন্ত্রে
লোকের যন্ত্রণা হর ॥
তিন ভূমণ্ডলে পূজিবে সকলে

BANGLADARSHAN.COM

চৈত্র শুক্লা অষ্টমীতে।
দ্বিতীয়া অম্বিত অষ্টাহ সঙ্গীত
বিসর্জন নবমীতে॥
পূজিবে যে জনে তাহার ভবনে
হইবে লক্ষ্মী অচলা।
আর যত আছে সব হবে পাছে
কহিবে অষ্টমঙ্গলা॥
কৃষ্ণচন্দ্র ভূপ দেবীপুত্ররূপ
অন্নপূর্ণা ব্রতদাস।
ভারত ব্রাহ্মণ কহে সুবচন
অন্নদা পুরাও আশ॥

অন্নপূর্ণামূর্তি ধারণ

BANGLADARSHAN.COM
অন্নপূর্ণা জয় জয়।
দূর কর ভবভয়॥

তুমি সর্বময় তোমা হৈতে হয়
সৃজন পালন লয়।
কত মায়া কর কত কায়া ধর
বেদের গোচর নয়॥
বিধি হরি হর আদি চরাচর
কটাক্ষেতে কত হয়।
ছাড় ছায়া মায়া দেহ পদছায়া
ভারত বিনয়ে কয়॥

জয়ার বচনে দেবী মানিয়া প্রবোধ।
বসিলেন হাস্যমুখী দূরে গেল ক্রোধ॥
বিশাই বিশাই বলি করিলা স্মরণ।
জোড়হাতে বিশ্বকর্মা দিলা দরশন॥
শুন রে বিশাই বাছা লহ মোর পান।
পানপাত্র হাতা দেহ করিয়া নির্মাণ॥

মর্ম্ব বুঝি বিশ্বকর্মা আজ্ঞা পাবামাত্র।
রতননির্মিত দিলা হাতা পানপাত্র॥
রতনমুকুট দিলা নানা অলঙ্কার।
অমূল্য কাঁচুলি শাড়ী উড়নি যে আর॥
বসিবারে মণিময় দিলা কোকনদ।
আশিস করিলা মাতা হও নিরাপদ॥
মায়া কৈলা মহামায়া কহিতে কে পারে।
হরিলা যতেক অন্ন আছিল সংসারে॥
কোটি কোটিরূপ কোটি কোটি নারায়ণ।
কোটি কোটিরূপ কোটি কোটি পদ্মাসন॥
কোটি কোটিরূপ কোটি কোটি মৃত্যুঞ্জয়।
কোটি কোটিরূপ কোটি কোটি হরি হয়॥
দেব দেবী ভুজঙ্গ কিন্নর আদি যত।
সৃষ্টি কৈলা কোটি কোটি কোটি শত॥
কোটি কোটি ব্রহ্মাণ্ড হইল এক ঠাই।
কেমন হইল মেনে মনে আসে নাই॥
অন্নের পর্বত পরমান্নসরোবর।
ঘৃত মধু দুগ্ধ দধি সাগর সাগর॥
কে রান্ধে কে বাড়ে কেবা দেয় কেবা খায়।
কোলাহল গণ্ডগোল কহা নাহি যায়॥
অনন্ত ব্রহ্মাণ্ড কলরব এক ঠাই।
জয় জয় অন্নপূর্ণ বিনা শব্দ নাই॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

BANGLADARSHAN.COM

শিবের ভিক্ষাযাত্রা

জয় শিব নাচহি পাঁচহি তালা।

বাজত ডমরু পিনাক রসালা॥

নাচত ভূত বাজাওত ভৈরব

গাওত তাল বেতলা।

নন্দী কহে তাতা- কার মনোহর

ভৃঙ্গী বাজাওত গালা॥

গঙ্গা ঝরে জল চাঁদ সুধারস

অনল হলাহল জ্বালা।

ভারতকে হর শঙ্কর মূরতি

নাশ কপাল কপালা॥

ওথায় ত্রিলোকনাথ বলদে চড়িয়া।

ত্রিলোক ভ্রমেন অন্ন চাহিয়া চাহিয়া॥

যেখানে যেখানে হর অন্ন হেতু যান।

হা অন্ন হা অন্ন ভিন্ন শুনিতে না পান॥

ববম্ ববম্ বম ঘন বাজে গাল।

ভভম্ ভভম্ ভম শিঙ্গা বাজে ভাল॥

ডিমি ডিমি ডিমি ডিমি ডমরু বাজিছে।

তাধিয়া তাধিয়া ধিয়া পিশাচ নাচিছে॥

দূরে হৈতে শুনা যায় মহেশের শিঙ্গা।

শিব এল বলে ধায় যত রঙ্গচিঙ্গা॥

কেহ বলে ওই এল শিব বুড়া কাপ।

কেহ বলে বুড়াটি খেলাও দেখি সাপ॥

কেহ বলে জটা হৈতে বার কর জল।

কেহ বলে জ্বাল দেখি কপালে অনল॥

কেহ বলে ভাল করি শিঙ্গাটি বাজাও।

কেহ বলে ডমরু বাজায়ে গীত গাও॥

কেহ বলে নাচ দেখি গাল বাজাইয়া।

ছাই মাটি কেহ গায় দেয় ফেলাইয়া॥

কেহ আনি দেয় ধুতুরার ফুল ফল।

BANGLADARSHAN.COM

কেহ দেয় ভাঙ্গ পোস্ত আফিঙ্গ গরল ॥
আর আর দিন তাহে হাসেন গৌসাই।
ও দিন ওদন বিনা ভাল লাগে নাই ॥
চেত রে চেত রে চিত ডাকে চিদানন্দ।
চেতনা যাহার চিত্তে সেই চিদানন্দ ॥
যে জন চেতনামুখী সেই সদা সুখী।
যে জন অচেতচিত্ত সেই সদা দুখী ॥
এত বলি অন্ন দেহ কহিছেন শিব।
সবে বলে অন্ন নাই বলহ কি দিব ॥
কি জানি কি দৈব আজি হৈল প্রতিকূল।
অন্ন বিনা সবে আজি হয়েছি আকুল ॥
কান্দিছে আপন শিশু অন্ন না পাইয়া।
কোথায় পাইব অন্ন তোমার লাগিয়া ॥
আজি মেনে ফিরে মাগ শঙ্কর ভিখারী।
কালি আস দিব অন্ন আজি ত না পারি ॥
এইরূপে শঙ্কর ফিরিয়া ঘর ঘর।
অন্ন না পাইয়া হৈলা বড়ই কাতর ॥
ক্রমে ক্রমে ত্রিভুবন করিয়া ভ্রমণ।
বৈকুণ্ঠে গেলেন যথা লক্ষ্মীনারায়ণ ॥
আস লক্ষ্মী অন্ন দেহ ডাকেন শঙ্কর।
ভারত কহিছে লক্ষ্মী হইলা ফাঁফর ॥

শিবের প্রতি লক্ষ্মীর উপদেশ

কহে লক্ষ্মী শুন গৌরীপতি।
কহিতে না বাক্য সরে অন্ন নাহি মোর ঘরে
আজি বড় দৈবের দুর্গতি ॥
আমি লক্ষ্মী সৰ্বঠাই মোর ঘরে অন্ন নাই
ইহাতে প্রত্যয় কেবা করে।
শুনিয়া শঙ্কর কন ফিরিলাম ত্রিভুবন

এই কথা সকলের ঘরে॥

গুমান হইল গুঁড়া না মিলিল খুদ কুঁড়া

ফিরিনু সকল পাড়া পাড়া।

হাভাতে যদ্যপি চায় সাগর শুকায়ে যায়

হেদে লক্ষ্মী হৈল লক্ষ্মীছাড়া॥

লক্ষ্মী বলে অন্ন নাই আর যাব কার ঠাই

ভুবনে ভাবিয়া নাহি পাই।

গলে সাপ বান্ধি চাই তবু অন্ন নাহি পাই

কপালে দিলেক বিধি ছাই॥

কত সাপ আছে গায় হাভাতেরে নাহি খায়

গলে বিষ সেহ নাহি বধে।

কপালে অনল জ্বলে সেহ না পোড়ায় বলে

না জানি মরিব কি ঔষধে॥

ঘরে অন্ন নাহি যার মরণ মঙ্গল তার

তার কেন বিলাসের সাদ।

যার নারী সুতা সুত সদা অন্নকষ্টযুত

সর্বদা তাহার অবসাদ॥

দেখিয়া শিবের খেদ লক্ষ্মী কয়ে দিলা ভেদ

কেন শিব করহ বিষাদ।

অন্নপূর্ণা যার ঘরে সে কান্দে অন্নের তরে

এ বড় মায়ার পরমাদ॥

গৌরী অন্নপূর্ণা হয়ে জগতের অন্ন লয়ে

কৈলাসে পাতিয়াছেন খেলা।

যতেক ব্রহ্মাণ্ড আছে সকলি তাঁহার কাছে

তাঁরে কেন করিয়াছ হেলা॥

আমার যুকতি ধর কৈলাস গমন কর

আমি আদি সকলি সেখানে।

তোমারে কবার তরে আমি আছিলাম ঘরে

এই আমি যাই সেইখানে॥

এত বলি হরিপ্রিয়া কৈলাসে রহিলা গিয়া

শিব গেলা ভাবিয়া চিন্তিয়া।

দেখি অন্নদার সাজ শিবের হইল লাজ

BANGLADARSHAN.COM

তত্ত্ব কিছু না পান ভাবিয়া ॥
কত কোটি হরি হর পদ্মাসন পুরন্দর
কত কোটি ব্রহ্মাণ্ড মিলিত।
সুখে নানা রস খায় স্তুতি পড়ে নাচে গায়
দেখি শিব হইলা মোহিত ॥
দেখি কোটি কোটি হরে জ্ঞাণু জ্ঞাণু হৈলা ডরে
অন্নপূর্ণা অন্তরে জানিয়া।
ভারতের উপরোধে বিসর্জন দিয়া ক্রোধে
অন্ন দিলা নিকটে আনিয়া ॥

শিবে অন্নদান

অন্নপূর্ণা দিলা শিবেরে অন্ন।

অন্ন খান শিব সুখসম্পন্ন ॥

কারণ-অমৃত পূরিত করি।

রত্ন-পানপাত্র দিলা ঈশ্বরী ॥

সঘৃত পলান্নে পূরিয়া হাতা।

পরশেন হরে হরিষে মাতা ॥

পঞ্চ মুখে শিব খাবেন কত।

পূরেন উদর সাদের মত ॥

পায়সপয়োধি সপসপিয়া।

পিষ্টকপর্বত কচমচিয়া ॥

চুকু চুকু চুকু চুষ্য চুষিয়া।

কচর মচর চর্ক্য চিবিয়া ॥

লিহ লিহ জিহে লেহ্য লেহিয়া।

চুমুকে চক চক পেয় পিয়া ॥

জয় জয় অন্নপূর্ণা বলিয়া।

নাচেন শঙ্কর ভাবে ঢলিয়া ॥

হরিষে অবশ অলস অঙ্গে।

নাচেন শঙ্কর রঙ্গ তরঙ্গে ॥

BANGLADARSHAN.COM

লটপট জটা লপটে পায়।
ঝর ঝর ঝরে জাহ্নবী তায়॥
গর গর গর গরজে ফণী।
দপ দপ দপ দীপয়ে মণি॥
ধক ধক ধক ভালে অনল।
তর তর তর চাঁদমণ্ডল॥
সর সর সরে বাঘের ছাল।
দলমল দোলে মুণ্ডের মাল॥
তাধিয়া তাধিয়া বাজয়ে তাল।
তাতা থেই থেই বলে বেতাল॥
ববম ববম বাজয়ে গাল।
ডিমি ডিমি বাজে ডমরু ভাল॥
ভভম ভভম বাজয়ে শিঙ্গা।
মৃদঙ্গ বাজয়ে তাধিঙ্গা ধিঙ্গা॥
পঞ্চ মুখে গেয়ে পঞ্চম তালে।
নাচেন শঙ্কর বাজয়ে গালে॥
নাটক দেখিয়া শিব ঠাকুর।
হাসেন অন্নদা মৃদু মধুর॥
অন্নদা অন্ন দেহ এই যাচে।
ভারত ভুলিল ভবের নাচে॥

অন্নপূর্ণামাহাত্ম্য

জয় জগদীশ্বরী জয় জগদম্বে।
ভব ভবরাণী ভব অবলম্বে॥
শিব শিবকায়ী হর হরজায়া
পরিহর মায়া অব অবিলম্বে॥
যদি কর মমতা হত হয় যমতা
দিবি ভুবি সমতা গুহ হেরম্বে॥
তব জন যেবা তসু রিপু কেবা

যম দেই সেবা শিরপরিলম্বে।
ভবজল তরণে রাখহ চরণে
ভারত চরণে করি কাদম্বে ॥

এইরূপে অন্নপূর্ণা আপনা প্রকাশি।
হরিলা যতেক মায়া মহামায়া হাসি ॥
বসিলা গিরিশ গৌরী কৌতুক অশেষ।
সমুখে করেন ক্রীড়া কার্তিক গণেশ ॥
দু দিকে বিজয়া জয়া নন্দী দ্বারপাল।
ডাকিনী যোগিনী ভূত ভৈরব বেতাল ॥
অন্নপূর্ণামহিমা দেখিয়া মহেশ্বর।
প্রকাশ করিলা তন্ত্র মন্ত্র বহুতর ॥
উপাসনা পূজা ধ্যান কবচ সাধন।
ধর্ম অর্থ কাম মোক্ষ ফলে নিয়োজন ॥
বিস্তর অন্নদাকল্পে অল্পে কব কত।
কিঞ্চিৎ কহিনু নিজ বুদ্ধিশুদ্ধিমত ॥
যে জন করয়ে অন্নপূর্ণা উপাসনা।
বিধি হরি হর তায় করয়ে মাননা ॥
ইহলোকে নানা ভোগ করে সেই জন।
পরলোকে মোক্ষ পায় শিবের লিখন ॥
অন্নপূর্ণা মহামায়া মহাবিদ্যামাজ।
যার বরে স্বর্গে লক্ষ্মী ইন্দ্র দেবরাজ ॥
ব্রহ্মার ব্রহ্মত্ব যার করি উপাসনা।
বিষ্ণুর বিষ্ণুত্ব যার করিয়া মাননা ॥
শিবের শিবত্ব যার উপাসনাফলে।
নিগম আগমে যারে আদ্যা শক্তি বলে ॥
দয়া কর দয়াদয়ী দানবদমনী।
দক্ষসুতা দাক্ষায়ণী দারিদ্র্যদলনী ॥
হৈমবতী হরপ্রিয়া হেরম্বজননী।
হেমহীরাহারময়ী হিরণ্যবরণী ॥
হইলা নন্দের সুতা হরিসহায়িনী।
হেরি হাহাকার হর হরিণীহেরিণী ॥

BANGLADARSHAN.COM

কামরিপু কামিনী কামদা কামেশ্বরী।
করণা কটাক্ষ কর কিছু কৃপা করি॥
রাজার আনন্দ কর রাজ্যের কুশল।
যে শুনে এ গীত তার করহ মঙ্গল॥
গায়নে বায়নে মা গো মাগি এই বর।
অল্পে পূর্ণ কর ঘর গলে দেহ স্বর॥
শুনিতে মঙ্গল তব যার ভক্তি হয়।
ধন পুত্র লক্ষ্মী তার স্থির যেন রয়॥
কৃষ্ণচন্দ্র আদেশে ভারতচন্দ্র গায়।
হরি হরি বল সবে পালা হৈল সায়॥

শিবের কাশীবিষয়ক চিন্তা

পুণ্যভূমি বারাণসী বেষ্টিত বরণা অসি
যাহে গঙ্গা আসিয়া মিলিতা।
আনন্দকানন নাম কেবল কৈবল্যধাম

শিবের ত্রিশূলোপরি স্থিতা॥

বাপী যাহে জ্ঞানবাপী নামে মোক্ষ পায় পাপী
মহিমা কহিতে কেবা পারে।

মণিকর্ণী পুষ্করিণী মোক্ষপদবিধায়িনী
সার বস্তু অসার সংসারে॥

দশাশ্বমেধের ঘাট চৌষট্টি যোগিনীপাট
নানা স্থানে নানা মহাস্থান।

তীর্থ তিন কোটি সাড়ে এক ক্ষণ নাহি ছাড়ে
সকল দেবের অধিষ্ঠান॥

মহেশের রাজধানী দুর্গা যাহে মহারাণী
যাহে কালভৈরব প্রহরী।

শমনের অধিকার না হয় স্মরণে যার
ভবসিন্ধু তরিবার তরি॥

যাহে জীব ত্যজি জীব সেই ক্ষণে হয় শিব

পুন নহে জঠরযাতনা।
দেবতা গন্ধৰ্ব্ব যক্ষ দনুজ মনুজ রক্ষ
সবে যার করয়ে মাননা॥
শিবলিঙ্গ সংখ্যাতে যাহে সদা অধিষ্ঠিত
যাহাতে প্রধান বিশ্বেশ্বর।
যত যত যশোধাম প্রকাশি আপন নাম
শিবলিঙ্গ স্থাপিলা বিস্তর॥
দেবতা কিন্নর নর সিদ্ধ সাধ্য বিদ্যাধর
তপস্যা করয়ে মোক্ষ আশে।
দেখিয়া কাশীর শোভা মহেশের মনোলোভা
বিহরেন ছাড়িয়া কৈলাসে॥
সৰ্বসুখময় ঠাই সবে মাত্র অন্ন নাই
দেখিয়া ভাবেন সদাশিব।
অনেকের হৈল বাস সকলের অন্ন আশ
কি প্রকারে অন্ন যোগাইব॥
আপন আহর বিষ ধ্যানে যায় অহর্নিশ
অন্ন সনে নাহি দরশন।
এখানে বসিবে যারা অন্নজীবী হবে তারা
অন্ন বিনা না রবে জীবন॥
এত ভাবি ত্রিলোচন সমাধিতে দিয়া মন
বসিলেন চিন্তায়ুক্ত হয়ে।
অন্নপূর্ণা অধিষ্ঠানে অন্নে পূর্ণ কর স্থানে
ভারত দিলেন যুক্তি কয়ে॥

বিশ্বকর্মার প্রতি পুরী নির্মাণের অনুমতি

ভব ভাবি চিতে পুরী নির্মাইতে
বিশ্বকর্মে কৈলা ধ্যান।
বিশ্বকর্মা আসি প্রবেশিলা কাশী
জোড়হাতে সাবধান॥

বিশ্বকর্মে হর কহিলা সত্বর
শুন রে বাছা বিশাই।
অন্নপূর্ণা আসি বসিবেন কাশী
দেউল দেহ বনাই॥
বিশ্বকর্মা শুনি নিজ পুণ্য গুণি
দেউল কৈলা নির্মাণ।
অন্নদা মূরতি নিরুপম অতি
নিরমায় সাবধান॥
রতন দেউল ভুবনে অতুল
কোটি রবি পরকাশ।
বিবিধ সন্ধান অপূর্ব নির্মাণ
দেখি সুখী কৃতিবাস॥
দেউল ভিতরে মণিবেদীপরে
চিন্তামণির প্রতিমা।
চতুর্ভূষণপ্রদা গড়িল অন্নদা
অনন্ত নামমহিমা॥
মণিময়চ্ছদ গড়ে কোকনদ
অরুণচিকণশোভা।
ভুবনমণ্ডল করয়ে উজ্জ্বল
মহেশের মনোলোভা॥
তাহার উপরি পদাসন করি
অন্নদামূরতি গড়ে।
পদতল রঙ্গে দেখি অষ্ট অঙ্গে
অরুণ চরণে পড়ে॥
অতি নিরমল চরণ যুগল
সুশোভিত নখ ছাঁদে।
দিনে দিনে ক্ষীণ কলঙ্কে মলিন
কত শোভা হবে চাঁদে॥
মণিকরিকর উরু মনোহর
নিতম্বে রত্নকিঙ্কণী।
ত্রিবলীর ভঙ্গে অনঙ্গের অঙ্গে
বান্ধি রাখে মাজা ক্ষীণী॥

BANGLADARSHAN.COM

সূর্য্যকান্ত চন্দ্রকান্ত আদি মণিগণ।
দিয়া কৈল চারি পাড় অতি সুশোভন॥
তুলিল পাতালগঙ্গা ভোগবতীজল।
সুশীতল সুবাসিত গভীর নির্মল॥
গড়িল স্ফটিক দিয়া রাজহংসগণ।
প্রবালে গড়িল ঠোঁট সুরঙ্গ চরণ॥
সূর্য্যকান্ত মণি দিয়া গড়িল কমল।
চন্দ্রকান্ত মণি দিয়া গড়িল উৎপল॥
নীলমণি দিয়া গড়ে মধুকরপাঁতি।
নানা পক্ষী জলচর গড়ে নানা ভাতি॥
ডালুকা ডালুকা গড়ে খঞ্জনী খঞ্জন।
সারসা সারসী গড়ে বক বকীগণ॥
তিত্তিরী তিত্তিরা পানিকাক পানিকাকী।
কুরলী কুরল চক্রবাক চক্রবাকী॥
কাদাখোঁচা দলপিপী কামি কোড়া কঙ্ক।
পানিতর বেণেবউ গড়ে মৎস্যরঙ্ক॥
হাঙ্গর কুন্তীর গড়ে শুশুক মকর।
নানা জাতি মৎস্য গড়ে নানা জলচর॥
চীতল ভেকুট কই কাতলা মৃগাল।
বানি লাটা গডুই উলকা শৌল শাল॥
পাঁকাল খয়রা চেলা তেচক্ষা এলেঙ্গা।
গুতিয়া ভাঙ্গন রাগি ভোলা ভোলচেঙ্গা॥
মাগুর গাগর আড়ি বাটা বাচা কই।
কালবসু বাঁশপাতা শঙ্কর ফলই॥
শিঙ্গী ময়া পাবদা বোয়ালি ডানিকোনা।
চিঙ্গড়ী টেঙ্গরা পুঁটি চান্দাগুঁড়া সোনা॥
গাঙ্গদাড়া ভেদা চেঙ্গ কুড়িশা খলিশা।
খরশুল্লা তপসিয়া গাঙ্গাস ইলিশা॥
চারি পাড়ে বিশ্বকর্মা নির্মায় উদ্যান।
নানা জাতি বৃক্ষ গড়ে সুন্দর বন্ধান॥
অশোক কিংশুক চাঁপা পুন্নাগ কেশর।
করবীর গন্ধরাজ বকুল টগর॥

BANGLADARSHAN.COM

শেহলী পীয়লী দোনা পারুল রঙ্গন।
মালতী মাধবীলতা মল্লিকা কাঞ্চন॥
জবা জুতী জাতী চন্দ্রমল্লিকা মোহন।
চন্দ্রমণি সূর্য্যমণি অতি সুশোভন॥
কনকচম্পক ভূমিচম্পক কেতকী।
চন্দ্রমুখী সূর্য্যমুখী অতসী ধাতকী॥
কদম্ব বাকস বক কৃষ্ণকেলি কুন্দ।
পারিজাত মধুমল্লী ঝিঁটা মুচকুন্দ॥
আম জাম নারিকেল জামীর কাঁটাল।
খাজুর গুবাক শাল পিয়াল তমাল॥
হিজোল তেঁতুল তাল বিল্ব আমলকী।
পাকুড় অশ্বথ বট বালা হরিতকী॥
ইত্যাদি বিবিধ বৃক্ষ ফুলফলধর।
তার শোভা হেতু গড়ে বিহঙ্গ বিস্তর॥
ময়না শালিক টিয়া তোতা কাকাতুয়া।
চাতক চকোর নুরী তুরী রাঙ্গচুয়া॥
ময়ূর ময়ূরী সারী শুক আদি খগ।
কোকিল কোকিলা আদি রসাল বিহগ॥
সীকরা বহরী বাসা বাজ তুরমুতী।
কাহাকুহী লগড় ঝগড় জোড়াধুতী॥
শকুনী গৃধিনী হাড়গিলা মেটেচিল।
শঙ্খচিল নীলকণ্ঠ শ্বেত রক্ত নীল॥
ঠেটী ভেটী ভাটা হরিতাল গুড়গুড়।
নানাজাতি কাক পৈঁচা বাবুই বাদুড়॥
বাকচা হারীত পারাবত পাকরাল।
ছাতারিয়া করকটে ফিঙ্গা দহিয়াল॥
চড়ই মণিয়া পাবদুয়া টুনটুনি।
বুলবুল জল আদি পক্ষী নানা গুণি॥
বউ কথা কহ আর দেশের কি হবে।
বনশোভা যে সব পক্ষীর কলরবে॥
ভীমরুল ডাঁশ মশা বোরলা প্রভৃতি।
গড়িয়া গড়িছে পশু বিবিধ আকৃতি॥

BANGLADARSHAN.COM

সরভ কেশরী বাঘ বারণ গণ্ডার।
ঘোড়া উট মহিষ হরিণ কালসার॥
বানর ভালুক গরু ছাগল শশারু।
বরাহ কুক্কুর ভেড়া খটাস সজারু॥
ঢোলকান খেঁকি খেঁকশেয়ালি ঘোড়ারু।
বারশিঙ্গা বাওটাদি কস্তুরী তুলারু॥
গাধা গোধা হাপা হাউ চমরী শৃগাল।
হোড়ার নকুল গৌলা গবয় বিড়াল॥
কাকলাস ধেড়ে মূষা ছুঁচা আজনাই।
সৃষ্টি হেতু জোড়ে জোড়ে গড়িলা বিশাই॥
বনমানুষাদি গড়ি মনে বাড়ে রঙ্গ।
নানামত নানা জাতি গড়িছে ভুজঙ্গ॥
কেউটে খরিশ কালীগোখুরা ময়াল।
বোড়া চিতি শঙ্খচূড় সূঁচে ব্রহ্মজাল॥
শাঁখিনী চামর কোষা সূতার সপ্ণর।
খড়ীচৌচ অজগর বিষের ভাণ্ডার॥
তক্ষক উদয়কাল ডাঁড়াশ কানাড়া।
লাউডগা কাউশর কুয়ে বেতাছাড়া॥
ছাতারে শীয়ড়চাঁদা নানাজাতি বোড়া।
টেমনা মেটিলী পুঁয়ে হেলে চিতী টোঁড়া॥
বিছা বিছু পিপিড়া প্রভৃতি বিষধর।
সৃষ্টিহেতু জোড়ে জোড়ে গড়িল বিস্তর॥
সরোবর বনশোভা দেখি সুখী শিব।
জীবন্যাসমন্ত্রেতে সবার দিলা জীব॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

BANGLADARSHAN.COM

দেবগণনিমন্ত্রণ

চল কাশী মাঝে সবে যাব।
অন্নদা পূজিবে শিব দেখিবারে পাব॥
মণিকর্ণিকার জলে স্নান করি কুতূহলে
অন্নদামঙ্গল ছলে হরগুণ গাব।
পাপ তাপ হবে ছন্ন নানা রস সুসম্পন্ন
অন্নদা দিবেন অন্ন মহাসুখে খাব॥
শিব শিব শিব কয়ে জ্ঞানবাপীকূলে রয়ে
সুখে রব শিব হয়ে কোথায় না ধাব।
শিবের করুণা হবে দেখিব ভবানীভাবে
ভারত কহিছে তবে হরিভক্তি চাব॥

শিবের আনন্দ অন্নপূর্ণা আরাধনে।
নিমন্ত্রণ করিলা সকল দেবগণে॥
হংসপৃষ্ঠে আইলা সগণ প্রজাপতি।
গণ সহ বিষ্ণু সঙ্গে লক্ষ্মী সরস্বতী॥
গণ সহ গণেশ আইলা গজানন।
দেবসেনা সঙ্গে লয়ে দেব ষড়ানন॥
দেবগণ সঙ্গে লয়ে ইন্দ্র দেবরাজ।
ইন্দ্রাণী আইলা সঙ্গে দেবীর সমাজ॥
নিজগণ সঙ্গে করি অনল আইলা।
পরিবার সঙ্গে যম আসিয়া মিলিলা॥
নৈর্ঋত আইলা সঙ্গে লয়ে নিজগণ।
বার্তা পেয়ে বরুণ আইলা ততক্ষণ॥
সগণ পবনবেগে আইলা পবন।
কুবের আইলা সঙ্গে লয়ে নিজগণ॥
শিবের বিশেষমূর্তি আইলা ঈশান।
মূর্তিভেদে প্রজাপতি আইলা বেগবান্॥
আইলা ভূজঙ্গপতি ত্যজিয়া পাতালে।
আদর করিলা শিব দেখি দিকপালে॥
দ্বাদশ মূর্তি সহ আইলা ভাস্কর।

BANGLADARSHAN.COM

ষোল কলা সহিত আইলা শশধর॥
আপন মঙ্গল হেতু মঙ্গল আইলা।
বিবুধ সহিত বুধ আসিয়া মিলিলা॥
দেবগণগুরু আইলা গুরু ভট্টাচার্য্য।
দৈত্যগুরু মহাকবি আইলা শুক্রাচার্য্য॥
মন্দগতি মহাবেগে আইলা শনৈশ্চর।
আইল রাহু কেতু অর্ধ অর্ধ কলেবর॥
সিদ্ধ সাধ্য পিতৃ বিশ্বদেব বিদ্যাধর।
অঙ্গুর গন্ধর্ব্ব যক্ষ রাক্ষস কিন্নর॥
দেবঋষি ব্রহ্মঋষি রাজঋষিগণ।
একে একে সবে শিবে দিলা দরশন॥
চারি ভাই সনক সনন্দ সনাতন।
সনৎকুমার দেখা দিলা ততক্ষণ॥
বশিষ্ঠ প্রচেতা ভৃগু পুলস্ত্য পুলহ।
নারদ অঙ্গিরা অত্রি দক্ষ ক্রতু সহ॥
আইলেন পিতা পুত্র পরাশর ব্যাস।
শুকদেব আইলা যাহে পুরাণ প্রকাশ॥
যম আপস্তম্ব শঙ্খ লিখিত গৌতম।
দুর্ব্বাসা জৈমিনি গর্গ কপিল কর্দম॥
কাত্যায়ন যাজ্ঞবল্ক্য অসিত দেবল।
জামদগ্ন্য ভরদ্বাজ ধৈয়ানে অটল॥
দধীচি অগস্ত্য কর্ণ সৌভরি লোমশ।
বিশ্বামিত্র ঋষ্যশৃঙ্গ বাল্মীকি তাপস॥
ভার্গব চ্যবন ঔর্ব্ব মনু শাতাতপ।
উত্কল ভরত ধৌম্য কশ্যপ কাশ্যপ॥
নৈমিষারণ্যের ঋষি শৌনকাদিগণ।
বালখিল্যগণ আইল না হয় গণন॥
জয় শব্দ নমঃ শব্দ শঙ্খ ঘণ্টারব।
বেদগান স্তুতি পাঠ মহামহোৎসব॥
অন্নপূর্ণাপুরী আর মূরতি দেখিয়া।
পরস্পর সকলে কহেন বাখানিয়া॥
তোমার কৃপার কথা শঙ্কর কি কব।

BANGLADARSHAN.COM

তোমা হৈতে অন্নপূর্ণা দেখি সুখী হব ॥
ব্রহ্মময়ী অন্নপূর্ণা ধ্যানে অগোচর।
পরমেশী পরম পুরুষ পরাৎপর ॥
এত দিন যাঁর মূর্তি না দেখি নয়নে।
এত দিন যাঁর ধ্যান না শুনি শ্রবণে ॥
নিগমে আগমে গৃঢ় যাঁহার ভজন।
ধর্ম অর্থ কাম মোক্ষ ফলে নিয়োজন ॥
ইহলোকে ভোগ পরলোকে মোক্ষ হয়।
কেবল কৈবল্যরূপ সর্বশাস্ত্রে কয় ॥
হেন মূর্তি প্রকাশ করিলা তুমি শিব।
তোমার মহিমা সীমা কেমনে কহিব ॥
ভবদুঃখসাগরে সকলে কৈলা পার।
বিশ্বনাথ বিনা কারে লাগে বিশ্বভার ॥
তন্ত্রে অন্নপূর্ণামন্ত্র তুমি প্রকাশিলা।
মূর্তি প্রকাশি তাহা পূরণ করিলা ॥
মূর্তি দেখি পরস্পর কহেন সকলে।
নির্মাণসদৃশ ফল হয় ভাগ্যবলে ॥
শঙ্কর কহেন সবে কহিলা উত্তম।
এখনো আমার মনে নাহি ঘুচে ভ্রম ॥
যদি মোর ভাগ্যে অন্নপূর্ণা দয়া করে।
তবে ত সার্থক নহে চেষ্টায় কি করে ॥
করিয়াছি পুরী বটে হয়েছে প্রতিমা।
তাঁর অধিষ্ঠান হয় তবে ত মহিমা ॥
এত বলি মহাদেব আরম্ভিলা তপ।
কৈলা পুরশ্চরণ কতেক কত জপ ॥
তপস্যায় মহাযোগী বসিলা শঙ্কর।
রচিলা ভারতচন্দ্র রায় গুণাকর ॥

BANGLADARSHAN.COM

শিবের পঞ্চতপ

তপস্বী হইলা হর অনন্দা ভাবিয়া।
লোভ মোহ কাম ক্রোধ আদি তেয়াগিয়া॥
জটা ভস্ম হাড়মালা শোভা হৈল বড়।
ব্রহ্মরূপ অন্তর্পূর্ণা ধ্যানে হৈলা দড়॥
বিছাইয়া মৃগছাল বসিলা আসনে।
করে লয়ে জপমালা মুদ্রিত নয়নে॥
দিগম্বর বিভূতিভূষিত কলেরব।
গলে যোগপট্ট উপবীত বিষধর॥
বৈশাখে দারুণ রৌদ্রে তপস্যা দুষ্কর।
চৌদিকে জ্বালিয়া অগ্নি উপরে ভাস্কর॥
জ্যৈষ্ঠ মাসে এইরূপে পঞ্চতপ করি।
অন্তর্পূর্ণা ধ্যানে যায় দিবস শর্করী॥
আষাঢ়ে বরিষে মেঘ শিলা বজ্রাঘাত।
একাসনে বসিয়া রজনীদিনপাত॥
শ্রাবণে দারুণ বৃষ্টি রজনী বাসর।
একাসনে অনশনে ধ্যান নিরন্তর॥
ভাদ্র মাসে আট দিকে পরিপূর্ণ বান।
রজনী দিবস বসি একাসনে ধ্যান॥
আশ্বিনে অশেষ কষ্ট করেন কঠোর।
ছাড়িয়া আহার নিদ্রা তপ অতি ঘোর॥
কার্ত্তিকে কঠোর বড় কহিবারে দায়।
অনশনে রজনী দিবস কত যায়॥
অতিশয় উগ্র অগ্রহায়ণে নীহার।
উগ্র তপ করে উগ্র কহিতে অপার॥
পৌষ মাসে দারুণ হিমালী পরকাশ।
রাত্রি দিন জলে বসি নিত্য উপবাস॥
বাঘের বিক্রম সম মাঘের শিশির।
রাত্রি দিন জলে বসি কম্পিত শরীর॥
ফাল্গুনে দারুণ তপ করেন শঙ্কর।

BANGLADARSHAN.COM

উদয়াস্ত অস্তোদয় করিলা বিস্তর॥
চৈত্রের বিচিত্র তপ কহিবেক কেবা।
উর্দ্ধপদে অধোমুখে অনলের সেবা॥
ভাবিয়া ভাবিয়া অনুভব করি ভব।
পঞ্চ মুখে বিবিধ বিধানে কৈলা স্তব॥
অন্নপূর্ণা অন্নদাত্রী অবতীর্ণা হও।
কাশীতে প্রকাশ হয়ে করিয়াছি স্থান॥
আনন্দকানন কাশী করিয়াছি স্থান।
তব অধিষ্ঠান বিনা কেবল শ্মশান॥
তুমি মূলপ্রকৃতি সকল বিশ্বমূল।
সেই ধন্য তুমি যারে হও অনুকূল॥
তুমি সকলের সার অসার সকল।
যেখানে তোমার দয়া সেখানে মঙ্গল॥
ধর্ম অর্থ কাম মোক্ষ তোমার ভজনে।
সেই ধন্য তুমি দয়া কর যেই জনে॥
সত্ত্বরজস্তুমোগুণ প্রসবিয়া তুমি।
সৃষ্টি কৈলা সুরলোক রসাতল ভূমি॥
বিধি বিষ্ণু আমি আদি নানা মূর্তি ধর।
সৃষ্টি স্থিতি প্রলয় লীলায় নিত্য কর॥
আনন্দকানন কাশী সানন্দ করিয়া।
বিহার করহ মোরে সদয়া হইয়া॥
এইরূপ তপস্যায় গেল কত কাল।
শরীরে জন্মিল শাল পিয়াল তমাল॥
চর্ম মাংস আদি গেল অস্থি মাত্র শেষ।
তথাপি না হয় অন্নদার দয়ালেশ॥
এইরূপ তপ করে যত সহচর।
রচিল ভারতচন্দ্র রায় গুণাকর॥

BANGLADARSHAN.COM

ব্রহ্মাদির তপ

শিবের দেখিয়া তপ করিতে অন্নদাজপ
ব্রহ্মা হইলেন ব্রহ্মচারী।
একাসনে অনশনে অন্নদার ধ্যান মনে
অক্ষসূত্র কমণ্ডলুধারী॥
গদা চক্র তেয়াগিয়া পাঞ্চজন্য বাজাইয়া
অন্নদা উদ্দেশে পদ্য দিয়া।
অনশনে যোগ ধরি তপস্যা করেন হরি
রমা বাণী সংহতি করিয়া॥
সুখমুণ্ডে হানি বাজ তপ করে দেবরাজ
সহস্রলোচনে জল ঝরে।
সঙ্গে লয়ে দেবীগণে অন্নদা ভাবিয়া মনে
ইন্দ্রাণী দারুণ তপ করে॥
উর্ধ্বে দুই পদ ধরি হেটে অগ্নি দীপ্ত করি
অগ্নি করে অগ্নিসেবা তপ।
একাসনে অনশনে অন্নদা ধৈয়ান মনে
সম শীত বরিষা আতপ॥
ছাড়ি নিজ অধিকার সঙ্গে লয়ে পরিবার
শমন দারুণ তপ করে।
দারুণ তপের ক্লেশ অস্তি হৈল অবশেষ
বল্লীক জন্মিল কলেবরে॥
নৈর্ধৃত রাক্ষস রীত কঠোর তপেতে প্রীত
নিজ মুণ্ড দেয় বলিদান।
পুনর্বার মাথা হয় নিজ রক্ত মাংসময়
বলি দিয়া করয়ে ধৈয়ান॥
বরণ আপন পাশ গলায় বান্ধিয়া ফাঁস
প্রাণ বলিদান দিতে মন।
অন্নদার অনুগ্রহে পরাণ বিয়োগ নহে
অস্ত্রিমধ্যে অস্ত্যথ জীবন॥
পবন আহার করি নিয়মে পরাণ ধরি

পদব করয়ে ঘোর তপ।
উনপঞ্চাশত ভাগে এক ভাবে অনুরাগে
দিবা নিশি অন্নপূর্ণা জপ॥
কুবের ছাড়িয়া ভোগ আশ্রয় করিয়া যোগ
অহর্নিশ একাসনে ধ্যান।
দারুণ তপের ক্লেশ অস্তি চর্ম্ম অবশেষ
সমাধি ধরিয়া আছে জ্ঞান॥
শিবের বিশেষ কায় ঈশানের তপস্যায়
ত্রিলোক হইল টলমল।
কপালে অনল জ্বালি শিরোগৃহত ঘৃত ঢালি
ধ্যান ধারণায় অচঞ্চল॥
প্রজাপতি রূপভেদে উচ্চারিয়া চারি বেদে
উর্ধ্বপতি উর্ধ্বমুখে জপে।
দিক দিক ভেদ নাই টলমল সর্বঠাই
ঘোর অন্ধকার ঘোর তপে॥
সহস্রমুখের স্তবে নিজগণ কলরবে
তপস্যা করয়ে নাগরাজ।
গ্রহ তারা রাশিগণ ব্রহ্মঋষি যত জন
বিদ্যাধর কিন্নরসমাজ॥
যত দেবঋষিগণ সিদ্ধ সাধ্য পুণ্যজন
রাজঋষি মহর্ষি সকল।
একাসনে অনশনে তপস্যা অনন্যমনে
দেহে তরু জন্মিল সফল॥
সকলের তপস্যায় দয়া হৈল অন্নদায়
অবতীর্ণা হইলা কাশীতে।
সকলেরে দিতে বর প্রতিমায় কৈলা ভর
সুখাদৃষ্টে হাসিতে হাসিতে॥
সকলে চেতনা পেয়ে চৌদিকে দেখেন চেয়ে
অনুকম্পা হৈল অনুভব।
দূরে গেল হাহাকার জয় শব্দ নমস্কার
ভুবন ভরিল কলরব॥
চারি সমাজের পতি কৃষ্ণচন্দ্র মহামতি

BANGLADARSHAN.COM

দ্বিজরাজ কেশরী রাঢ়ীয়।
তার সভাসদবর কহে রায় গুণাকর
অন্নপূর্ণা পদছায়া দিয়॥

অন্নপূর্ণার অধিষ্ঠান

কলকোকিল অলিকুল বকুলফুলে।
বসিলা অন্নপূর্ণা মণিদেউলে॥
কমলপরিমল লয়ে শীতল জল
পবনে চলচল উছলে কূলে।
বসন্তরাজা আনি ছয় রাগিণীরাণী
করিলা রাজধানী অশোকমূলে॥
কুসুমে পুন পুন ভ্রমর গুন গুন
মদন দিল গুণ ধনুক হলে।
যতেক উপবন কুসুমে সুশোভন
মধুমুদিত মন ভারত ভূলে॥

মধু মাস প্রফুল্ল কুসুম উপবন।
সুগন্ধি মধুর মন্দ মলয় পবন॥
কুহু কুহু কুহু কুহু কোকিল হুঙ্কারে।
গুন গুন গুন গুন ভ্রমর ঝঙ্কারে॥
সুশোভিত তরুণতা নবদলপাতে।
তর তর থর থর ঝর ঝর বাতে॥
অলি পিয়ে মকরন্দ কমলিনীকোলে।
সুখে দোলে মন্দ বায়ে জলের হিল্লোলে॥
ঘরে ঘরে নানা যন্ত্রে বসন্তের গান।
সঙ্গে ছয় রাগিণী বসন্ত মূর্তিমান॥
শুক্ক তরু শুক্ক লতা রসেতে মুঞ্জরে।
মঞ্জরীতে মুকুল আকুল মন করে॥
তরুকুল প্রফুল্ল কুসুমছলে হাসে।
তাহে শোভে মধুকর মধুকরী পাশে॥

ধন্য ঋতু বসন্ত সুধন্য চৈত্র মাস।
ধন্য শুরুপক্ষ যাহে জগত উল্লাস॥
তাহাতে অষ্টমী ধন্যা ধন্যা নাম জয়া।
অর্ধচন্দ্র ভালে শোভে সাক্ষাৎ অভয়া॥
অবতীর্ণা অন্নপূর্ণা হইলা কাশীতে।
প্রতিমায় ভর করি লাগিলা হাসিতে॥
মণিবেদীপরে চিন্তামণির প্রতিমা।
বিশ্বকর্ষ্মসুনির্মিত অপার মহিমা॥
চন্দ্র সূর্য্য অনল জিনিয়া প্রভা যার।
দেবী অধিষ্ঠানে হৈল কোটি গুণ তার॥
প্রতিমা প্রভাবে যত দেবঋষিগণ।
ভূতলে পড়িলা সবে হয়ে অচেতন॥
দৃষ্টিসুধাবৃষ্টিতে সকলে জ্ঞান দিয়া।
কহিতে লাগিলা দেবী ঈষদ্ হাসিয়া॥
শুন শুন যত দেবঋষি আদিগণ।
এতেক কঠোর তপ কৈলা কি কারণ॥
কম্পমান কলেবর করি যোড়কর।
সমুখে রহিলা সবে ভয়ে নিরুত্তর॥
করণা আকর মাতা দয়া হৈল চিতে।
কহিতে লাগিলা দেবী হাসিতে হাসিতে॥
চিরদিন তপস্যায় পাইয়াছ দুখ।
অনশনে সকলের সুখায়েছে মুখ॥
এস এস বাছা সব সুখে অন্ন খাও।
শেষে মনোনীত বর দিব যাহা চাও॥
এত বলি অন্নদা সকলে দেন অন্ন।
অন্ন খান সবে সুখে আনন্দসম্পন্ন॥
বাম করে পানপাত্র রতননির্মিত।
কারণ অমৃত পরিপূর্ণ অতুলিত॥
সঘৃত পলান্নে পরিপূর্ণ রত্নহাতা।
ডানি করে ধরি অন্ন পরশেন মাতা॥
কোথায় রন্ধন কেহ দেখিতে না পান।
পরশেন কখন না হয় অনুমান॥

BANGLADARSHAN.COM

ইন্দ্রাদি দিক্‌পাল দশ।

কিন্নরগণ গায় অঙ্গুর নাচে তায়

গন্ধর্ভ করে নানা রস॥

নারদ আদি যত দেবর্ষি শত শত

চৌদিকে করে বেদ গান।

বিবিধ উপাচার অশেষ উপহার

অনেকবিধ বলিদান॥

অন্নদা জয় জয় সকল দেবে কয়

ভুবন ভরি কোলাহল।

আনন্দে শূলপাণি করিয়া যোড়পাণি

পূজেন চরণকমল॥

দেউলবেদীপর প্রতিমা মনোহর

তাহাতে অধিষ্ঠিত মাতা।

সর্বতোভদ্র নাম মণ্ডল চিত্রধাম

লিখিলা আপনি বিধাতা॥

সমুখে হেমঘট আচ্ছাদি চারু পট

পড়িয়া স্বস্তি ঋদ্ধি বিধি।

সঙ্কল্প সমাচারি গন্ধাধিবাস করি

বিধানবিজ্ঞ ভাল বিধি॥

পূজিয়া গজানন ভাস্কর ত্রিলোচন

কেশব কৌষিকী চরণ।

পূজিয়া নব গ্রহ দিক্‌পাল দশ সহ

বিবিধ আবরণগণ॥

চরণ সরসিজ পূজিয়া জপি বীজ

নৈবেদ্য দিয়া নানামত।

মহিষ মেঘ ছাগ প্রভৃতি বলিভাগ

বিবিধ উপচার যত॥

সমাপি হোমক্রিয়া অন্নাদি নিবেদিয়া

মঙ্গল ইতিহাস গানে।

বাজায়ে বাদ্যগণ করিয়া জাগরণ

দক্ষিণা বিবিধ বিধানে॥

পূজার সমাধানে প্রণামি সাবধানে

BANGLADARSHAN.COM

সকলে পাইলেন বর।
অন্নদা পদতলে বিনয় করি বলে
ভারত রায় গুণাকর॥

অন্নদার বরদান

ভবানী বাণী বল একবার।
ভবানী ভবানী সুমধুর বাণী
ভবানী ভবের সার॥

দেবগণে দিয়া দেবী মনোনীত বর।
শিবেরে কহেন শিবা শুনহ শঙ্কর॥
এই বারাণসী পুরী করিয়াছ তুমি।
ইহার পরশপুণ্যে ধন্য হৈল তুমি॥
এই যে প্রতিমা মোর করিলা প্রকাশ।
এই স্থানে সর্বদা আমার হৈল বাস॥
কলিকালে এ পুরী হইবে অদর্শন।
মোর অবলোকন রহিবে সর্বক্ষণ॥
এই চৈত্র মাস হৈল মোর ব্রতমাস।
শুরু পক্ষ মোর পক্ষ তুমি ব্রতদাস॥
এই তিথি অষ্টমী আমার ব্রততিথি।
ধন্য সে এ দিনে মোরে যে করে অতিথি॥
অষ্টাহ মঙ্গল যেই শুনে ইতিহাস।
তাহার নিবাসে সদা আমার নিবাস॥
একমনে মোর গীত যে করে মাননা।
আমি পূর্ণ করি তার মনের কামনা॥
চৈত্র মাসে শুরু পক্ষে অষ্টমী পাইয়া।
গাইবে সঙ্গীত মোর সঙ্কল্প করিয়া॥
দ্বিতীয় দেখি নব শশীর উদয়।
আরম্ভ করিবে গীত দিয়া জয় জয়॥
অষ্টমীর রজনীতে গেয়ে জাগরণ।

নবমীতে অষ্টমঙ্গলায় সমাপন॥
অচলা প্রতিমা মোর ঘরে যে রাখিবে।
ধন পুত্র লক্ষ্মী তার অচলা হইবে॥
ধাতুময়ী মোর বারি প্রতিষ্ঠা করিয়া।
যেই জন রাখে ঘরে প্রত্যহ পূজিয়া॥
তার ঘরে সদা হয় আমার বিশ্রাম।
করতলে তার ধর্ম অর্থ মোক্ষ কাম॥
কামনা করিয়া কেহ আমার মঙ্গল।
গাওয়ায় যদ্যপি শুন তার ক্রম ফল॥
আরস্তিয়া শুক্রবারে বিধি ব্যবস্থায়।
সমাপিবে শুক্রবারে অষ্টমঙ্গলায়॥
পালা কিম্বা জাগরণ যে করে মাননা।
গাইবে যে দিন ইচ্ছা পূরিবে কামনা॥
যেই জন উপাসনা করিবে আমার।
ধর্ম অর্থ কাম মোক্ষ করতলে তার॥
বর পেয়ে মহানন্দ হইলা মহেশ।
করিলা বিস্তর স্তুতি অশেষ বিশেষ॥
বিদায় হইয়া যত দেবঋষিগণ।
আপন আপন স্থানে করিলা গমন॥
নিজ নিজ ঘরে সবে মহাকুতূহলে।
করিলা অন্নদাপূজা অষ্টাহ মঙ্গলে॥
অন্নে পূর্ণ হইল ভুবন চতুর্দশ।
সকলে করয়ে ভোগ নানামত রস॥
কৃপা কর কৃপাময়ি কাতর কিঙ্করে।
করণা আকর বিনা কেবা কৃপা করে॥
মহামায়া মহেশমহিলা মহোদরী।
মহিষমর্দিনী মোহরূপা মহেশ্বরী॥
নন্দনন্দনের প্রতি হইয়া সহায়।
নন্দের নন্দিনী হয়ে গেলা মথুরায়॥
কুরুক্ষেত্রে হৈল কুরুপাণ্ডবের রণ।
যাহে অবতরি হরি ভারাবতারণ॥
আর্য্যা বলি তোমারে অর্জুন কৈলা স্তব।

BANGLADARSHAN.COM

যে কালে সারথি তার হইলা কেশব॥
সত্ত্ব রজঃ তম তিন গুণের জননী।
অপার সংসার পারে তুমি নারায়ণী॥
রাজার মঙ্গল কর রাজ্যের কুশল।
যে শুনে মঙ্গল তার করহ মঙ্গল॥
কৃষ্ণচন্দ্র আজ্ঞায় ভারতচন্দ্র গায়।
হরি হরি বল সবে পালা হৈল সায়॥

ব্যাসবর্ণন

ব্যাস নারায়ণ অংশ ঋষিগণ অবতংস
যাঁহা হইতে আঠার পুরাণ।
ভারত পঞ্চম বেদ নানা মত পরিচ্ছেদ
বেদভাগ বেদান্ত বাখান॥
সদা বেদপরায়ণ প্রকাশিলা পারায়ণ
শিষ্যগণ বৈষ্ণবসংহতি।
পিতা যাঁর পরাশর শুকদেব বংশধর
জননী যাঁহার সত্যবতী॥
দাঁড়াইলে জটাভার চরণে লুটায় তাঁর
কক্ষলোমে আচ্ছাদয়ে হাঁটু।
পাকা গৌপ পাকা দাড়ি পায়ে পড়ে দিলে ছাড়ি
চলনে কতেক আঁটুবাঁটু॥
কপালে চড়ক ফোঁটা গলে উপবীত মোটা
বাহুমূলে শঙ্খচক্ররেখা।
সর্বাঙ্গে শোভিত ছাবা কলি মৃগ বাঘথাবা
সারি সারি হরিনাম লেখা॥
তুলসীর কর্ণি গলে লস্বি মালা করতলে
হাতে কানে থরে থরে মালা।
কোশাকুশী কুশাসন কক্ষতলে সুশোভন
তাহে কৃষ্ণসার মৃগছালা॥

কটিতটে ডোর ধরি তাহাতে কপীন পরি
বহিব্বাসে করি আচ্ছাদন।
কমণ্ডলু তুম্বীফল করঙ্গ পিবারে জল
হাতে আশা হিঙ্গুলবরণ॥
এই বেশে শিষ্যগণ সঙ্গে ফিরে অনুক্ষণ
পাঁজি পুঁথি বোঝা বোঝা লয়ে।
নিগম আগম মত পুরাণ সংহিতা যত
তর্কীতর্কি নানামত কয়ে॥
কে কোথা কি করে দান কে কোথা কি করে ধ্যান
পূজা করে কেবা কিবা দিয়া।
কে কোথা কি মন্ত্র লয় কোথা কোন যজ্ঞ হয়
আগে ভাগে উত্তরেন গিয়া॥
জগতের হিতে মন উর্দ্ধবাহু হয়ে কন
ধর্ম্মে মতি হউক সবার।
ধন নাহি স্থির রয় দারা আপনার নয়
সেই ধর্ম্ম পরলোকে সার॥
এইরূপে শিষ্য সঙ্গে সর্ব্বদা ফিরেন রঙ্গে
চিরজীবী নরাকার লীলা।
একদিন দৈববশে শিষ্য সহ শাস্ত্ররসে
নৈমিষ কাননে উত্তরিলে॥
শৌনকাদি ঋষিগণ পূজা করে ত্রিলোচন
গালবাদ্যে বিল্বপত্র দিয়া।
গলায় রুদ্রাক্ষমাল অর্দ্ধচন্দ্রে শোভে ভাল
কলেবরে বিভূতি মাখিয়া॥
শিব ভর্গ ত্রিলোচন বৃষধ্বজ পঞ্চগনন
চন্দ্রচূড় গিরিশ শঙ্কর।
ভব শর্ক্ব ব্যোমকেশ বিশ্বনাথ প্রমথেশ
দেবদেব ভীম গঙ্গাধর॥
ঈশ্বর ঈশান ঈশ কাশীশ্বর পার্ব্বতীশ
মহাদেব উগ্র শূলধর।
বিরূপাক্ষ দিগম্বর ত্র্যম্বক ভূতেশ হর
রুদ্র পুরহর স্মরহর॥

BANGLADARSHAN.COM

এইরূপে ঋষি যত শিবের সেবায় রত
দেখি ব্যাস নিষেধিয়া কন।
ভারত পুরাণে কয় ব্যাসের কি আন্তি হয়
বুঝা যাবে আন্তি সে কেমন॥

শিবপূজা নিষেধ

কি কর নর হরি ভজ রে।
ছাড়িয়া হরির নাম কেন মজ রে॥
তরিবারে পরিণাম হর জপে হরিনাম
হরি ভজি পূর্ণকাম কমলজ রে।
ভব ঘোর পারাবার হরিনাম তরী তার
হরিনাম লয়ে পার হৈল গজ রে॥
ধর্ম অর্থ মোক্ষ কাম এ চারি বর্গের ধাম
বেদে বলে হরি নাম সুখ যজ রে।
গুরুবাক্য শিরে ধরি রহিয়াছি সার করি
ভারতের ভূষা হরি-পদরজ রে॥

বেদব্যাস কহেন শুনহ ঋষিগণ।
কি ফলে বিফল কর শিবের সেবন॥
সর্ব শাস্ত্র দেখিয়া সিদ্ধান্ত কৈনু এই।
ভজনীয় সে জন যে জন মোক্ষ দেই॥
অন্যের ভজনে হয় ধর্ম অর্থ কাম।
মোক্ষফল কেবল কৈবল্য হরিনাম॥
অন্য অন্য ফল পাবে ভজি অন্য জনে।
মোক্ষ ফল পাবে যদি ভজ নারায়ণে॥
নিরাকার ব্রহ্ম তিন রূপেতে সাকার।
সত্ত্বরজস্তমোগুণ প্রকৃতি তাহার॥
রজোগুণে বিধি তাহে লোভের উদয়।
তমোগুণে শিবরূপ অহঙ্কারময়॥
সত্ত্বগুণে নারায়ণ কেবল চিন্ময়।

যুক্তি করি দেখি বিষ্ণুঃ বিনা মুক্তি নয়॥
তমোগুণে অধোগতি অজ্ঞানের পাকে।
মধ্যগতি রজোগুণে লোভে বান্ধা থাকে॥
সত্ত্বগুণে তত্ত্বজ্ঞান করতলে মুক্তি।
অতএব হরি ভজ এই সার যুক্তি॥
সত্য সত্য এই সত্য আরো সত্য করি।
সর্বশাস্ত্রে বেদ মুখ্য সর্ব দেবে হরি॥
বেদে রামায়ণে আর সংহিতা পুরাণে।
আদি অন্তে মধ্যে হরি সকলে বাখানেে॥
এত শূনি শৌনকাদি লাগিলা কহিতে।
কি কহিলা ব্যাসদেব না পারি সহিতে॥
নয়ন মুদিয়া দেখি বিশ্ব তমোময়।
ইথে বুঝি ব্রহ্মরূপ তম বিনা নয়॥
তমোগুণে অহঙ্কার দোষ কিবা দিবে।
অহঙ্কার নহিলে কি ভেদ ব্রহ্ম জীবে॥
সত্ত্বরজঃ প্রভাব ক্ষণেক বিনা নয়।
তমের প্রভাব দেখি চিরকাল রয়॥
রজোগুণে সৃষ্টি তাহে কেবল উদ্ধব।
সত্ত্বগুণে পালন বিবিধ উপদ্রব॥
তমোগুণে প্রলয় কৈবল্য পরিণাম।
বুব্বহ লক্ষণে আর মোক্ষ কার নাম॥
রজোগুণে কৌমার যৌবন সত্ত্বগুণে।
তমোগুণে জরা দেখি গুরু কোটিগুণে॥
রজোগুণে বিধি তাঁর নাভিতটে স্থান।
সত্ত্বগুণে বিষ্ণুর হৃদয়ে অধিষ্ঠান॥
তমোগুণে শিব তাঁর ললাটে আলায়।
ভাবি দেখি তমোগুণ কত উচ্চ হয়॥
তুমি ব্যাস রচিয়াছ আঠার পুরাণ।
তথাপি এমন কহ এ বড় অজ্ঞান॥
সকলে প্রত্যয় করি তোমার কথায়।
তোমার এমন কথা এ ত বড় দায়॥
এই কথা কহ যদি কাশী মাঝে গিয়া।

BANGLADARSHAN.COM

কি জানি কাহারে আজি কার হয় ক্রোধ॥
ভারত কহিছে ব্যাস চলিলা কাশীতে।
ভ্রান্ত কি অভ্রান্ত এই ভ্রান্তি ঘুচাইতে॥

হরিনামাবলী

জয় কৃষ্ণ কেশব রাম রাঘব
কংসদানব ঘাতন।

জয় পদুলোচন নন্দনন্দন
কুঞ্জকানন রঞ্জন॥

জয় কেশিমর্দন কৈটভর্দন
গোপিকাগণ মোহন।

জয় গোপবালক বৎসপালক
পূতনাবক নাশন॥

জয় গোপবল্লভ ভক্তসল্লভ
দেবদুর্লভ বন্দন।

জয় বেণুবাদক কুঞ্জনাটক
পদানন্দক মগুন॥

জয় শান্তকালিয় রাধিকাপ্রিয়
নিত্য নিঞ্জিয় মোচন।

জয় সত্য চিন্ময় গোকুলালয়
দ্রৌপদীভয় ভঞ্জন॥

জয় দৈবকীসুত মাধবাচ্যুত
শঙ্করস্তুত বামন।

জয় সর্ব্বতোজয় সজ্জনোদয়
ভারতশ্রয় জীবন॥

BANGLADARSHAN.COM

ব্যাসের বারাণসী প্রবেশ

এইরূপে ব্যাস গিয়া বারাণসী প্রবেশিয়া
আদিকেশবেরে প্রণমিয়া।
সংহতি বৈষ্ণবগণ হরিনাম সংকীৰ্তন
নানা রসে নাচিয়া গাইয়া॥
কীৰ্ত্তনিয়াগণ সঙ্গে গান করে নানা রঙ্গে
বাল্য গোষ্ঠ দান বেশ রাস।
পূৰ্ব্বরঙ্গ রসোদগার মাথুর বিরহ আর
হরিভক্তি যাহাতে প্রকাশ॥
বাজে খোল করতাল কেহ বলে ভাল ভাল
কেহ কাঁদে ভাবে গদগদ।
বীণা বাঁশী আদি যন্ত্রে বেদ পুরাণাদি তন্ত্রে
নানামতে গান বিষ্ণুপদ॥
কীৰ্ত্তনে ঢালিয়া দেহ গড়াগড়ি দেয় কেহ
কেহ তারে ধরে দেয় কোল।
উর্দ্ধভুজে উর্দ্ধপদে কেহ নাচে প্রেমমদে
কেহ বলে হরি হরি বোল॥
গোপকুলে অবতরি যে যে ক্রীড়া কৈলা হরি
আদি অন্ত মধ্যে সে সকল।
একমনে ব্যাস কন শুনেন ভকতগণ
আনন্দে লোচনে ঝরে জল॥
গোলোকেতে গোপীনাথ রাধা আদি গোপী সাথ
শ্রীদামাদি সহচরগণ।
নন্দ যশোদাদি যত সবে নিত্য অনুগত
কপিলাদি যতেক গোধন॥
সুধাসমুদ্রের মাজে চিন্তামণি বেদী সাজে
কল্পতরু কদম্বকানন।
নানা পুষ্প বিকসিত নানা পক্ষী সুশোভিত
সদানন্দময় বৃন্দাবন॥
কাম সদা মূৰ্ত্তিমান ছয় ঋতু অধিষ্ঠান

রাগিণী ছত্রিশ আর যত।
ব্রজাঙ্গনাগণ সঙ্গে সदा রাসরসরঙ্গে
নৃত্য গীত বাদ্য নানামত॥
গোলোক সম্পদ লয়ে ভকতে সদয় হয়ে
অবতীর্ণ হৈলা ভূমণ্ডলে।
কংস আদি দুষ্টগণ করিবারে নিপাতন
দৈবকীর্জঠরে জন্ম ছলে॥
বসুদেব কংসভয় নন্দের মন্দিরে লয়
খ্যাত হৈলা নন্দের নন্দম।
পূতনা বধিতে চলে বিষস্তনপান ছলে
কৃষ্ণ তার বধিলা জীবন॥
শকট ভাঙ্গিয়া রঞ্জি যমল অর্জুন ভঞ্জি
তৃণাবর্গে নিধন করিলা।
মৃত্তিকা ভক্ষণ ছলে যশোদারে কুতূহলে
বিশ্বরূপ মুখে দেখাইলা॥
ননী চুরি কৈলা হরি যশোদা আনিল ধরি
উদুখলে লইলা বন্ধন।
গোচারণে বনে গিয়া বকাসুরে বিনাশিয়া
অঘ অরিষ্টের বিনাশন॥
বধ কৈলা বৎসাসুর কেশীরে করিলা চুর
বল হাতে প্রলম্ব বধিলা।
ইন্দ্রযজ্ঞ ভঙ্গ করি গোবর্দ্ধন গিরি ধরি
বৃষ্টিজলে গোকুল রাখিলা॥
ব্রজ পোড়ে দাবানলে পান করিলেন ছলে
করিলেন কালিয়দমন।
সহচর পাঠাইয়া যজ্ঞ অন্ন আনাইয়া
করিলেন কাননে ভোজন॥
বিধাতা মন্ত্রণা করি শিশু বৎসগণ হরি
রাখিলেন পর্বতগুহায়।
নিজ দেহ হৈতে হরি শিশু বৎসগণ করি
বিধাতারে মোহিলা মায়ায়॥
গোপের কুমারী যত করে কাত্যায়নীব্রত

হরি লৈলা বসন হরিয়া।
কার্তিকী পূর্ণিমা পেয়ে মধুর মুরলী গেয়ে
রাসক্রীড়া গোপিনী লইয়া॥
করিতে আপন ধ্বংস অত্রুরে পাঠায়ে কংস
হরি লয়ে গেল মথুরায়।
ধোপা বধি বস্ত্র পরি কুজারে সুন্দরী করি
সুশোভিত মালীর মালায়॥
দ্বারে হস্তী বিনাশিয়া চাগুরাদি নিপাতিয়া
কংসাসুরে করিলা নিধন।
বসুদেব দৈবকীরে নতি কৈলা নতশিরে
দূর করি নিগড়বন্ধন॥
উগ্রসেনে রাজ্য দিয়া পড়িলা অবস্তী গিয়া
দ্বারকাবিহার নানামতে।
অপার এ পারাবার কতেক কহিব তার
বিখ্যাত ভারত ভাগবতে॥

BANGLADARSHAN.COM

ব্যাসের শিবনিন্দা

হরি হরে করে ভেদ। নর বুঝে না রে।
অভেদ কহে চারি বেদ॥
অভেদ ভাবে যেই পরম জ্ঞানী সেই
তারে না লাগে পাপক্লেদ।
যে দেহে হরি হরে অভেদরূপে চরে
সে দেহে নাহি তাপ স্বেদ॥
একই কলেবর হইলা হরি হর
বুঝিতে প্রেম পরিচ্ছেদ।
যে জানে দুইরূপে সে মজে মোহকূপে
ভারতে নাহি এই খেদ॥

এইরূপে বেদব্যাস কয়ে হরিগুণ।

উর্দ্ধভুজে কহেন সকল লোক শুন॥

সত্য সত্য এই সত্য কহি সত্য করি।
সর্বশাস্ত্রে বেদ সার সর্ববেদে হরি॥
হর আদি আর যত ভোগের গোসাঁই।
মোক্ষদাতা হরি বিনা আর কেহ নাই॥
এই বাক্যে ব্যাস যদি নিন্দিতা শঙ্করে।
শিবের হইল ক্রোধ নন্দী আগুসরে॥
ক্রোধদৃষ্টে নন্দী যেই ব্যাসেরে চাহিল।
ভুজস্তু কণ্ঠরোধ ব্যাসের হইল॥
চিত্রের পুত্তলি প্রায় রহিলেন ব্যাস।
শৈবগণে কত মত করে উপহাস॥
চারি দিকে শিষ্যগণ কাঁদিয়া বেড়ায়।
কোন মতে উদ্ধারের উপায় না পায়॥
গোবিন্দ জানিল ব্যাস পড়িলা সঙ্কটে।
কুণ্ঠভাবে উত্তরিল ব্যাসের নিকটে॥
বিস্তর ভর্ষিয়া বিষ্ণু ব্যাসেরে কহিলা।
আমার বন্দনা করি শিবেরে নিন্দিতা॥
যেই শিব সেই আমি যে আমি সে শিব।
শিবের করিলা নিন্দা কি আর বলিব॥
শিবের প্রভাবলে আমি চক্রধারী।
শিবের প্রভাব হৈতে লক্ষ্মী মোর নারী॥
শিবেরে যে নিন্দা করে আমি তারে রুষ্ট।
শিবেরে যে পূজা করে আমি তারে তুষ্ট॥
মোর পূজা বিনা শিবপূজা নাহি হয়।
শিবপূজা না করিলে মোর পূজা নয়॥
যে কৈলা সে কৈলা ইতঃপর মান শিবে।
শিবস্তব কর তবে উদ্ধার পাইবে॥
শুনিয়া ইঙ্গিতে ব্যাস কহিলা বিষ্ণুরে।
কেমনে করিব স্তুতি বাক্য নাহি স্মুরে॥
গোবিন্দ ব্যাসের কণ্ঠে অঙ্গুলি ছুঁইয়া।
বৈকুণ্ঠে গেলেন কণ্ঠরোধ ঘুচাইয়া॥
শঙ্করে বিস্তর স্তুতি করিলেন ব্যাস।
কতক কহিব কাশীখণ্ডেতে প্রকাশ॥

BANGLADARSHAN.COM

প্রত্যক্ষ হইয়া নন্দী ব্যাসে দিলা বর।
যে স্তব করিলা ইথে বড় তুষ্ট হর॥
এই স্তব যে জন পড়িবে একমনে।
ধর্ম অর্থ কাম মোক্ষ হবে সেই জনে॥
এত শুনি বেদব্যাস পরল উল্লাস।
তদবধি শিবভক্ত হইলেন ব্যাস॥
মুছিয়া ফেলিলা হরিমন্দির তিলকে।
অর্ধচন্দ্রফোঁটা কৈলা কপালফলকে॥
ছিড়িয়া তুলসীকণ্ঠী লম্বিমালী যত।
পরিলা রুদ্রাক্ষমালা শৈব অনুগত॥
ফেলিয়া তুলসীপত্র বিল্বপত্র লয়ে।
ছাড়িলা হরির গুণ হরগুণ কয়ে॥
ব্যাস কৈলা প্রতিজ্ঞা যে হৌক পরিণাম।
অদ্যাবধি আর না লইব হরিণাম॥
এইরূপে ব্যাসদেব কাশীতে রহিলা।
অন্নদামঙ্গল দ্বিজ ভারত রচিলা॥

BANGLADARSHAN.COM

ব্যাসের ভিক্ষাবারণ

হর শশাঙ্কশেখর দয়া কর।

বিভূতিভূষিত কলেবর॥

তরঙ্গভঙ্গিত

ভুজঙ্গরঙ্গিত

কপর্দমর্দিত জটাধর।

কুবের বান্ধব

বিভূতিবৈভব

ভবেশ ভৈরব দিগম্বর॥

ভুজঙ্গকুণ্ডল

পিশাচমণ্ডল

মহাকুতূহল মহেশ্বর।

রজঃপ্রভায়ত

পদাম্বুজানত

সুদীন ভারত শুভঙ্কর॥

এইরূপে বেদব্যাস রহিলা কাশীতে।
নন্দীরে কহেন শিব হাসিতে হাসিতে॥
দেখ দেখ অহে নন্দি ব্যাসের দুর্দৈব।
ছিল গৌড়া বৈষ্ণব হইল গৌড়া শৈব॥
যবে ছিল বিষ্ণুভক্ত মোরে না মানিল।
যদি হৈল মোর ভক্ত বিষ্ণুরে ছাড়িল॥
কি দোষে মুছিল হরিমন্দির ফোঁটায়।
কি দোষে ফেলিল ছিঁড়ি তুলসীমালায়॥
হের দেখ তুলসীপত্রের গড়াগড়ি।
বিল্পপত্র লইয়া দেখহ রড়ারড়ি॥
হের দেখ টানিয়া ফেলিল শালগ্রাম।
রাগে মত্ত হইয়া ছাড়িল হরিনাম॥
মোর ভক্ত হয়ে যেবা নাহি মানে হরি।
আমি ত তাহার পূজা গ্রহণ না করি॥
হরিভক্ত হয়ে যেবা না মানে আমারে।
কদাচ কমলাকান্ত না চাহেন তারে॥
হরি হর দুই মোরা অভেদশরীর।
অভেদে যে জন ভজে সেই ভক্ত ধীর॥
রুদ্রাক্ষ তুলসীমালা যেই ধরে গলে।
তার গলে হরিহরে থাকি কুতূহলে॥
অভেদ দুজনে মোরা ভেদ করে ব্যাস।
উচিত না হয় যে কাশীতে করে বাস॥
চঞ্চল ব্যাসের মন শেষে যাবে জানা।
কাশীতে ব্যাসের অন্ত শিব কৈলা মানা॥
স্নান পূজা সমাপিয়া ব্যাস ঋষিবর।
ভিক্ষাহেতু গেলা এক গৃহস্থের ঘর॥
ব্যাসে ভিক্ষা দিতে গৃহী হইল উদ্যত।
কিঞ্চিৎ না পায় দ্রব্য হৈল বুদ্ধিহত॥
ভিক্ষার বিলম্ব দেখি ব্যাস তপোধন।
গৃহস্থেরে গালি দিয়া করিলা গমন॥
বালক কুকুর লয়ে তারে তাড়াতাড়ি।
ব্যাসদেব গেলা অন্য গৃহস্থের বাড়ী॥

BANGLADARSHAN.COM

ব্যাসেরে দেখিয়া গৃহী করিয়া যতন।
ভিক্ষা দিতে ঘর হৈতে আনে আয়োজন॥
শিবের মায়ায় কেহ দেখিতে না পায়।
হাত হৈতে হরিয়া ভৈরব লয়ে যায়॥
রিক্তহস্ত গৃহস্থ দাঁড়ায় বুদ্ধিহত।
মর্ম না বুঝিয়া ব্যাস কটু কন কত॥
এইরূপে ব্যাসদেব যান যার বাড়ী।
ভিক্ষা নাহি পান আর লাভ তাড়াতাড়ি॥
সবে বলে ব্যাস তুমি বড় লক্ষ্মীছাড়া।
অন্ন উড়ি যায় তুমি যাহ যেই পাড়া॥
কেহ বলে যাও মেনে মুখ না দেখাও।
কেহ বলে আপনার নামটি লুকাও॥
এইরূপে গৃহস্থের সঙ্গে গণ্ডগোল।
ক্ষুধায় ব্যাকুল ব্যাস হৈলা উতরোল॥
পাড়া পাড়া ঘরে ঘরে ফিরিয়া ফিরিয়া।
শিষ্যগণ ঠাঁই ঠাঁই পড়িছে ঘুরিয়া॥
আশ্রমে নিশ্বাস ছাড়ি চলিলেন ব্যাস।
শিষ্য সহ সে দিন করিলা উপবাস॥
পরদিন ভিক্ষাহেতু শিষ্য পাঠাইলা।
ভিক্ষা না পাইয়া সবে ফিরিয়া আইলা॥
মহাক্রোধে ব্যাসদেব অজ্ঞান হইলা।
কাশীখণ্ডে বিখ্যাত কাশীতে শাপ দিলা॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

কাশীতে শাপ

আমারে শঙ্কর দয়া কর হে।

শরণ লয়েছি শুনি দয়া কর হে॥

তুমি দীনদয়াময়

আমি দীন অতিশয়

তবে কেন দয়া নয় দেখিয়া কাতর হে।
তব পদে আশুতোষ পদে পদে মোর দোষ
জানি কেন কর রোষ পামর উপর হে॥
পিশাচে তোমার প্রীতি মোর পিশাচের রীতি
তবে কেন মোর নীতি দেখে ভাব পর হে।
ভারত কাতর হয়ে ডাকে শিব শিব কয়ে
ভবনদী পারে লয়ে দূর কর ডর হে॥

ধন বিদ্যা মোক্ষ অহঙ্কারে কাশীবাসী।
আমারে না দিল ভিক্ষা আমি উপবাসী॥
তবে আমি বেদব্যাস এই দিনু শাপ।
কাশীবাসী লোকের অক্ষয় হবে পাপ॥
অন্যত্র যে পাপ হয় তাহা খণ্ডে কাশী।
কাশীতে যে পাপ হবে হবে অবিনাশী॥
ক্রমে তিন পুরুষের বিদ্যা না হইবে।

ক্রমে তিন পুরুষের ধন না রহিবে॥
ক্রমে তিন পুরুষের মোক্ষ না হইবে।
যদি বেদ সত্য তবে অন্যথা নহিবে॥

শাপ দিয়া পুনরপি চলিলা ভিক্ষায়।
ভিক্ষা না পাইয়া বড় ঠেকিলেন দায়॥
ঘরে ঘরে ফিরি ফিরি ভিক্ষা না পাইয়া।
আশ্রমে চলিলা ভিক্ষাপাত্র ফেলাইয়া॥
হেন কালে অন্নপূর্ণা দেখিতে পাইলা।
ব্যাসদেবে অন্ন দিতে আপনি চলিলা॥
জগতজননী মাতা সবারে সমান।
শক্তিরূপে সকল শরীরে অধিষ্ঠান॥
আকাশ পবন জল অনল অবনী।
সকলে সমান যেন অন্নদা তেমনি॥
সকলে সমান যেন চন্দ্র সূর্য্য তারা।
তেমনি সকলে সমা অন্নপূর্ণা সারা॥
মেঘে করে যেমন সকলে জলপান।
তেমনি অন্নদা দেবী সকলে সমান॥

BANGLADARSHAN.COM

তরু যেন ফল ধরে সবার লাগিয়া।
তেমনি সকলে অন্নপূর্ণা অন্ন দিয়া॥
হরি হর প্রভৃতিরো শত্রু মিত্র আছে।
শত্রু মিত্র এক ভাব অন্নদার কাছে॥
চলিলেন অন্নপূর্ণা ব্যাসে করি দয়া।
আগে আগে যায় জয়া পশ্চাতে বিজয়া॥
হেন কালে পথে আসি কহেন মহেশ।
কোথায় চলেছ তুয়ে কার্তিক গণেশ॥
ক্রোধভরে কন দেবী পিছু কেন ডাক।
ব্যাসে অন্ন দিয়া আসি ঘরে বসি থাক॥
একে বুড়া তাহে ভাস্কী ধুতুরায় ভোল।
অল্প অপরাধে কর মহাগুণগোল॥
তিন দিন ব্যাসেরে দিয়াছ উপবাস।
ব্রহ্মহত্যা হইবে তাহাতে নাহি ত্রাস॥
একবার ক্রোধেতে ব্রহ্মার মাথা লয়ে।
অদ্যপি সে পাপে ফির মুণ্ডধারী হয়ে॥
কি হেতু করিলে মানা ব্যাসে অন্ন দিতে।
সে দিল কাশীতে শাপ কে পারে খণ্ডিতে॥
এখনো যদ্যপি ব্যাস অন্ন নাহি পায়।
আর বার দিবে শাপ পেটের জ্বালায়॥
আমি অন্নপূর্ণা আছি কাশীতে বসিয়া।
আমার দুর্নাম হবে না দেখ ভাবিয়া॥
এত বলি অন্নপূর্ণা ক্রোধভরে যান।
সঙ্গে সঙ্গে যান শিব ভয়ে কম্পমান॥
সভয় দেখিয়া ভীমে হাসেন অভয়া।
বুড়াটির ঠাট হেদে দেখ লো বিজয়া॥
ভারত কহিছে ইথে সাক্ষী কেন মান।
তোমার ঘরের ঠাট তোমরা সে জান॥

BANGLADARSHAN.COM

অন্নদার মোহিনী রূপ

এ কি রূপ অপরূপ ভঙ্গিমা।
চরণে অরুণরঙ্গিমা ॥
হইতে সৌসর শম্ভু হৈলা হর
দেখি পয়োধর তুঙ্গিমা।
থাকিতে অধরে সুধা সাধ করে
সুধাকরে ধরে কালিমা ॥
ফুলধনুতনু লাজে তেজে ধনু
দেখি ভুরু ধনু বক্রিমা।
রূপ অনুভবে মোহ হয় ভবে
ভারত কি কবে মহিমা ॥

মায়া করি জয়া বিজয়ারে লুকাইয়া।
দেখা দিলা ব্যাসদেবে মোহিনী হইয়া ॥
কোটি শশী জিনি মুখ কমলের গন্ধ।
ঝাঁকে ঝাঁকে অলি উড়ে মধুলোভে অন্ধ ॥
ভুরু দেখি ফুলধনু ধনু ফেলাইয়া।
লুকায় মাজার মাঝে অনঙ্গ হইয়া ॥
উন্নত স্বয়ম্ভু শম্ভু কুচ হৃদিস্থলে।
ধরেছে কামের কেশ রোমাবলি ছলে ॥
অকলঙ্ক হইতে শশাঙ্ক আশা লয়ে।
পদনখে রহিয়াছে দশগুণ হয়ে ॥
মুকুতা যতনে তনু সিন্দূরে মাজিয়া।
হার হয়ে হারিলেক বুক বিঙ্কাইয়া ॥
বিননিয়া চিকণিয়া বিনোদ কবরী।
ধরাতলে ধায় ধরিবারে বিষধরী ॥
চক্ষে যিনি মৃগ ভালে মৃগমদবিন্দু।
মৃগ কোলে করিয়া কলঙ্কী হৈল ইন্দু ॥
অরুণেরে রঙ্গ দেয় অধর রঙ্গিমা।
চঞ্চলা চঞ্চলা দেখি হাস্যের ভঙ্গিমা ॥
রতন কাঁচুলি শাড়ী বিজুলী চমকে।

মণিময় আভরণ চমকে ঝমকে ॥
কথায় পঞ্চম স্বর শিখিবার আশে।
ঝাঁকে ঝাঁকে কোকিল কোকিলা চারি পাশে ॥
কঙ্কণঝঙ্কার হৈতে শিখিতে ঝঙ্কার।
ঝাঁকে ঝাঁকে ভ্রমর ভ্রমরী অনিবার ॥
চক্ষুর চলন দেখি শিখিতে চলনি।
ঝাঁকে ঝাঁকে নাচে কাছে খঞ্জন খঞ্জনী ॥
নিরূপম সে রূপ কিরূপ কব আমি।
যে রূপ দেখিয়া কামরিপু হন কামী ॥
এইরূপে অল্পপূর্ণা সদয়া হইয়া।
দেখা দিলা ব্যাসদেবে নিকটে আসিয়া ॥
মায়াময় একখানি পুরী নির্মাইয়া।
অতিবৃদ্ধ করি হরে তাহাতে রাখিয়া ॥
আপনি দাঁড়িয়ে দ্বারে পরমসুন্দরী।
কহিতে লাগিলা ব্যাসে ভক্তিভাব করি ॥
শুন ব্যাস গোসাঁই আমার নিবেদন।
নিমন্ত্রণ মোর বাড়ী করিবা ভোজন ॥
বৃদ্ধ মোর গৃহস্থ অতিথিভক্তিমান।
অতিথিসেবন বিনা জল নাহি খান ॥
তপস্বী তোমারে দেখি অতিথি ঠাকুর।
তুরায় আইস বেলা হইল প্রচুর ॥
শুনিয়া ব্যাসের মনে আনন্দ হইল।
কোথা হৈতে হেন জন কাশীতে আইল ॥
অল্প বিনা তিন দিন মোরা উপবাসী।
কোথা হৈতে পুণ্যরূপা উত্তরিলা আসি ॥
নিরূপমরূপা তুমি নিরূপমবয়া।
নিরূপমগুণা তুমি নিরূপমদয়া ॥
তখনি পাইনু ভিক্ষা কহিলা যখনি।
পরিচয় দেহ মোরে কে বট আপনি ॥
বিষ্ণুর বৈষ্ণবী কিবা ভবের ভবানী।
ব্রহ্মার ব্রহ্মাণী কিবা ইন্দ্রের ইন্দ্রাণী ॥
দেখিয়াছি এ সকলে সে সকলে জানি।

BANGLADARSHAN.COM

ততোধিক প্রভা দেখি তাই অনুমানি॥
শুনিয়াছি অন্নপূর্ণা কাশীর ঈশ্বরী।
সেই বুঝি হবে তুমি হেন মনে করি॥
প্রতি ঘরে ফিরি ভিক্ষা নাহি পায় যেই।
অন্নপূর্ণা বিনা তারে অন্ন কেবা দেই॥
এত শুনি অন্নপূর্ণা সহাস্য অন্তরে।
কহিতে লাগিলা ব্যাসে মৃদুমধুস্বরে॥
কোথা অন্নপূর্ণা কোথা তুমি কোথা আমি।
শীঘ্র আসি অন্ন খাও দুঃখ পান স্বামী॥
এত বলি ব্যাসদেবে সশিষ্যে লইয়া।
অন্ন দিলা অন্নপূর্ণা উদর পূরিয়া॥
চৰ্ক্য চূষ্য লেহ্য পেয় আদি রস যত।
ভোজন করিলা সবে বাসনার মত॥
ভোজনান্তে আচমন সকলে করিলা।
হরপ্রিয়া হরীতকী মুখশুদ্ধি দিলা॥
বসিলেন ব্যাসদেব শিষ্যগণ সঙ্গে।
হেন কালে বৃদ্ধ গৃহী জিজ্ঞাসেন রঙ্গে॥
ভারত কহিছে ব্যাস সাবধান হৈও।
বুড়া নহে বিশ্বনাথ বুঝে কথা কৈও॥

BANGLADARSHAN.COM

শিবব্যাসে কথোপকথন

নগনন্দিনি	সুরবন্দিনি
	রিপুনিন্দিনি গো।
জয়কারিণি	ভয়হারিণি
	ভবতারিণি গো॥
জটজালিনি	শিরমালিনি
শশিভালিনি	সুখশালিনি
	করবালিনি গো।
শিবগেহিনি	শিবদেহিনি

অট্ট অট্ট হাসে মুণ্ডমালা দলমল ॥
দেহ হৈতে বাহির হইল ভূতগণ।
ভৈরবের ভীম নাদে কাঁপে ত্রিভুবন ॥
মহাক্রোধে মহারুদ্র ধরিয়া পিনাক।
শূল আন শূল আন ঘন দেন ডাক ॥
বধিতে নারেন অন্নপূর্ণার কারণে।
ভৎসিয়া ব্যাসেরে কন তর্জন গর্জনে ॥
হরি হর দুই মোরা অভেদশরীর।
অভেদ যে জন ভজে সেই ভক্ত ধীর ॥
বেদব্যাস নাম পেয়ে নাহি মান বেদ।
কি মর্ম্ম বুঝিয়া হরি হরে কর ভেদ ॥
সেই পাপে তোর বাস না হবে কাশীতে।
আমি মানা করিলাম তোরে ভিক্ষা দিতে ॥
মনে ভাবি বুঝিলে জানিতে সেই পাপ।
কোন্ দোষে আমার কাশীতে দিলি শাপ ॥
কি দোষ করিল তোর কাশীবাসিগণ।
কেন শাপ দিলি অরে বিটলা বামন ॥
এ স্থানে বাসের যোগ্য তুমি কভু নও।
এই ক্ষণে বারাণসী হৈতে দূর হও ॥
অরে রে ভৈরবগণ ব্যাসে কর দূর।
পুন যেন আসিতে না পায় কাশীপুর ॥
ব্যাসদেব রুদ্ররূপী দেখি মহেশ্বরে।
ভয়ে কম্পমান তনু কাঁপে থর থরে ॥
অন্নপূর্ণা ভগবতী দাঁড়াইয়া পাশে।
চরণে ধরিয়া ব্যাস কহে মৃদুভাষে ॥
অন্ন দিয়া অন্নপূর্ণা বাঁচাইলা প্রাণ।
বাঁচাও শিবের ক্রোধে নাহি দেখি ত্রাণ ॥
জনক হইতে স্নেহ জননীর বাড়া।
মার কাছে পুত্র যায় বাপে দিলে তাড়া ॥
জগৎপিতা মহাদেব তুমি জগন্নাতা।
হরি হর বিধাতার তুমি সে বিধাতা ॥
শিবের হইল তমোগুণের উদয়।

BANGLADARSHAN.COM

যেই তমোগুণোদয়ে করেন প্রলয়॥
পশুবুদ্ধি শিশু আমি কিবা জানি মর্শ্ব।
বুঝিতে নারিনু কিবা ধর্ম কি অধর্ম॥
পড়িনু পড়ানু যত মিছা সে সকল।
সত্য সেই সত্য তব ইচ্ছাই কেবল॥
শিব কৈলা অন্ন মানা তুমি অন্ন দিলে।
এ সঙ্কটে কে রাখিবে তুমি না রাখিলে॥
শঙ্করের ত্রোধ হৈল না জানি কি ঘটে।
শঙ্করি করুণা কর এ ঘোর সঙ্কটে॥
তোমার কথার বশ শঙ্কর সর্বদা।
কাশীবাস যায় মোর রাখ গো অন্নদা॥
ব্যাসের বিনয়ে দেবী সদয়া হইলা।
শিবেরে করিয়া শান্ত ব্যাসে বর দিলা॥
অলঙ্ঘ্য শিবের আজ্ঞা না হয় অন্যথা।
কাশীবাস ব্যাস তুমি না পাবে সর্বথা॥
আমার আজ্ঞায় চতুর্দশী অষ্টমীতে।
মণিকর্ণিকার স্নানে পাইবে আসিতে॥
এত বলি হর লয়ে কৈলা অন্তর্দান।
নিশ্বাস ছাড়িয়া ব্যাস কাশী হৈতে যান॥
ছাড়িয়া যাইতে কাশী মন নাহি যায়।
লুকায়ে রহেন যদি ভৈরবে খেদায়॥
বেতাল ভৈরবগণ করে তাড়াতাড়ি।
শিষ্য সহ ব্যাসদেব গেলা কাশী ছাড়ি॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

BANGLADARSHAN.COM

ব্যাসের কাশীনির্মাণোদ্যোগ

কাশীতে না পেয়ে বাস মনোদুখে বেদব্যাস
বসিলেন ছাড়িয়া নিশ্বাস।

তুচ্ছ লোক আছে যারা কাশীতে রহিল তারা
আমার না হৈল কাশীবাস ॥

এ বড় রহিল শোক কলঙ্ক ঘুষিবে লোক
ব্যাস হৈলা কাশী হৈতে দূর।

নাম ডাক ছিল যত সকলি হইল হত
ভাঙ্গড় করিল দর্প চুর ॥

তেজোবধ হয় যার প্রাণবধ ভাল তার
কোনখানে সমাদর নাই।

সবে করে উপহাস ইনি সেই বেদব্যাস
কাশীতে না হৈল যার ঠাই ॥

যদি করি বিষপান তথাপি না যাবে প্রাণ
অনলে সলিলে মৃত্যু নাই।

সাপে বাঘে যদি খায় মরণ না হবে তায়
চিরজীবী করিলা গোসাঁই ॥

ভবিতব্য ছিল যাহা অদৃষ্টে করিল তাহা
কি হবে ভাবিলে আর বসি।

তবে আমি বেদব্যাস এইখানে পরকাশ
করিব দ্বিতীয় বারাণসী ॥

করিয়াছি যত তপ করিয়াছি যত জপ
সকলি করিনু ইথে পণ।

নিজ নাম জাগাইব এইখানে প্রকাশিব
কাশীর যে কিছু আয়োজন ॥

কাশীতে মরিলে জীব রামনাম দিয়া শিব
কত কষ্টে মোক্ষ দেন শেষে।

এখানে মরিবে যেই সদ্যমুক্ত হবে সেই
না ঠেকিবে আর কোন ক্লেশে ॥

অসাধ্য সাধন যত তপস্যায় হয় কত

গঙ্গার নিকট ব্যাসের অভ্যর্থনা

ব্যাস কন গঙ্গে চল মোর সঙ্গে
আমি এই অভিলাষী।
কাশী মাঝে ঠাই শিব দিল নাই
করিব দ্বিতীয় কাশী॥
তমোগুণী শিব তারে কি বলিব
মত্ত ভাঙ্গ ধুতুরায়।
ডাকিনীবিহারী সদা কদাচারী
পাপ সাপগুলা গায়॥
শ্মশানে বেড়ায় ছাই মাখে গায়
গলে মুণ্ডঅঙ্ঘ্রিমালা।
বলদ বাহন সঙ্গে ভূতগণ
পরে ব্যাঘ্র হস্তি ছালা॥
যত অমঙ্গল সকল মঙ্গল
তাহারে বেড়িয়া ফিরে।
কেবল আপনি পতিতপাবনী
তুমি আছ তেঁই শিরে॥
জটায় তাহার তব অবতার
তাই সে সকলে মানে।
তোমার মহিমা বেদে নাহি সীমা
অন্য জন কিবা জানে॥
যত অমঙ্গল শিবে সে সকল
মঙ্গল তোমার প্রেম।
নানা দোষময় লোহা যেন হয়
পরশ পরশি হেম॥
যে কারণ নীর ব্রহ্মাণ্ড বাহির
যাহাতে ব্রহ্মাণ্ড ভাসে।
বিধি হরি হর আদি চরাচর
কত হয় কত নাশে॥
সে কারণ নীর তোমার শরীর

BANGLADARSHAN.COM

তুমি ব্রহ্ম সনাতন।

সৃজন পালন নাশের কারণ

তোমা বিনা কোন জন॥

যেই নিরঞ্জন চিত্ররূপী হন

জনার্দন যারে কয়।

দ্রবরূপে সেই গঙ্গা তুমি এই

ইহাতে নাহি সংশয়॥

তোমা দরশনে মোক্ষ সেই ক্ষণে

না জানি স্নানের ফল।

প্রায়শ্চিত্তভয় সেখানে কি হয়

যেখানে তোমার জল॥

তুমি নারায়ণী পতিতপাবনী

কামনা পূরাও মোর।

মোর সঙ্গে আসি প্রকাশহ কাশী

তারহ সঙ্কট ঘোর॥

যে মরে কাশীতে তারে মোক্ষ দিতে

রামনাম দেন শিব।

আর কত দায় ভোগ হয় তায়

তবে মোক্ষ পায় জীব॥

কাশীতে আমার কৃপায় তোমার

এমনি হইতে চাহে।

যে মরে যখনি নিৰ্বাণ তখনি

বিচার না রবে তাহে॥

ব্যাসের এমন শুনিয়া বচন

গঙ্গার হইল হাসি।

ভারত কহিছে মোরে না সহিছে

তুমি কি করিবে কাশী॥

BANGLADARSHAN.COM

ব্যাসের প্রতি গঙ্গার উক্তি

কহিছেন গঙ্গা শুন হে ব্যাস।
কেন করিয়াছ হেন প্রয়াস॥
কে তুমি কি শক্তি আছে তোমার।
শিব বিনা কাশী কে করে আর॥
কণ্ঠে কালকূট যেই ধরিল।
লীলায় অন্ধক সেই বধিল॥
কটাক্ষে কামেরে নাশিল যেই।
কামিনী লইয়া বিহরে সেই॥
সেই বিশ্বনাথ বিশ্বের সার।
ভব নাম ভব করিতে পার॥
যাঁহার জটায় পাইয়া ধাম।
গঙ্গা গঙ্গা মোর পবিত্র নাম॥
কারণজল মোরে বল যেই।
কারণজলের কারণ সেই॥
না ছিল সৃষ্টির আদি যখন।
কাশীপতি কাশী কৈলা তখন॥
থুইলা আপন শূলের আগে।
পৃথিবীর দোষ গুণ না লাগে॥
করিবেন যবে প্রলয় হর।
রাখিবেন কাশী শূলউপর॥
তবে যে দেখহ ভূমিতে কাশী।
পদুপত্রে যেন জল বিলাসি॥
জলে মিশি থাকে পদের পাত।
জলনাশে নহে তার নিপাত॥
তবে যে কহিলা তারক নামে।
মোক্ষ দেন শিব কাশীর ধামে॥
তুমি কি বুঝিবা তার চলনি।
আপনার নাম দেন আপনি॥
আমার বচন শুন হে ব্যাস।

BANGLADARSHAN.COM

জহু মুনি করে ধরি পিলেক গণ্ডুষ করি
কোথা ছিল তোর গুণগ্রাম।
সে দোষ খুইয়া দূরে জানাইনু তিন পুরে
জাহুবী বলিয়া তোর নাম॥
শান্তনু রাজারে লয়ে ছিলি তার নারী হয়ে
তার সাক্ষী ভীষ্ম তোর বেটা।
শান্তনুরে করি সারা হয়েছ শিবের দারা
তোর সমা পুণ্যবতী কেটা॥
পেয়েছ শিবের জটা তাহাতে সাপের ঘটা
কপালে বহির তাপ লাগে।
চণ্ডী করে গণ্ডগোল ভূতভৈরবের রোল
কোন সুখে আছ কোন রাগে॥
স্বভাবতঃ নীচগতি সতত চঞ্চলমতি
কভু নাহি পতির নিয়ম।
যে ভাল ভজিতে পারে পতি ভাব কর তারে
সিন্ধু সঙ্গে সম্প্রতি সঙ্গম॥
বেশ্যাধর্ম লয়ে আছ জাতি কুল নাহি বাছ
রূপ গুণ যৌবন না চাও।
মা বলিয়া সেবা দেই ক্ষীর পান করে যেই
পতি কর কোলে মাত্র পাও॥
আপনার পক্ষ জানি কহিলাম তোরে আনি
তুমি তাহে বিপরীত কহ।
তুমি মোর কি করিবা তোমার শকতি কিবা
বিষ্ণুপদোদক বিনা নহ॥
শাপ দিয়া করি ছাই অথবা গণ্ডুষ খাই
ব্রাহ্মণেরে তোর অল্প জ্ঞান।
সিন্ধু তোর পতি যেই ব্রহ্মতেজ জানে সেই
অগস্ত্য করিয়াছিল পান॥
ব্যাসদেব এইরূপ মজিয়া কোপের কূপে
গঙ্গার করিলা অপমান।
ভারত সভয়ে কহে মোরে যেন দয়া রহে
স্তুতি নিন্দা গঙ্গার সমান॥

BANGLADARSHAN.COM

গঙ্গাকৃত ব্যাসতিরস্কার

গঙ্গার হইল ক্রোধ ব্যাসের বচনে।
ব্যাসেরে ভৎসনা কন মহাক্রোধ মনে॥
শুন শুন ওহে ব্যাস বিস্তর কহিলা।
এই অহঙ্কারে কাশীবাস না পাইলা॥
নর হয়ে নারায়ণ হৈতে চায় যেবা।
শিবনিন্দা যে করে তাহার গঙ্গা কেবা॥
তোর প্রকাশিতা আমি কেমনে কহিলি।
বেদমত পুরাণেতে আমারে বর্ণিলি॥
যতেক প্রসঙ্গ লয়ে করেছ পুরাণ।
আমার প্রসঙ্গ আছে তেঁই সে প্রমাণ॥
তুমি বুঝিয়াছ আমি শান্তনুর নারী।
সমুদ্রে মিলেছি বলি নারী হৈনু তারি॥
সংসারে যতেক নারী মোর অংশ তারা।
শিবঅংশ সংসারে পুরুষ আছে যারা॥
প্রকৃতি পুরুষ মোরা তুই কি জানিবি।
আর কত দিন পড় তবে সে বুঝিবি॥
আমার জাতির দায় কে ধরিবে তোরে।
কোন জাতি তোমার বুঝাও দেখি মোরে॥
বেদের পঞ্চতু দিয়া ভারত পুরাণ।
রচিয়াছ আপনি পরমজ্ঞানবান॥
তাহে কহিয়াছ আপনার জন্ম কর্ম্ম।
ভাবিয়া দেখহ দেখি তাহার কি মর্ম্ম॥
পরাশর ব্রহ্মঋষি তোর পিতা যেই।
ব্রাহ্মণের লক্ষণে ব্রাহ্মণ বটে সেই॥
মৎস্যগঙ্গা দাসকন্যা ব্রাহ্মণী ত নহে।
তার গর্ভে জন্ম তোর ব্রাহ্মণ কে কহে॥
পরাশর অপসর তোর জন্ম দিয়া।
শান্তনু তোমার মায়ে পুন কৈল বিয়া॥
বৈপিত্র দু ভাই তাহে জন্মিল তোমার।

BANGLADARSHAN.COM

একটি বিচিত্রবীৰ্য্য চিত্ৰাঙ্গদ আর॥
অম্বালিকা অম্বিকা বিবাহ কৈল তারা।
যৌবনে মরিল দুটি বউ রৈল সারা॥
পুত্র হেতু সত্যবতী তোমার জননী।
তোমারে দিলেন আজ্ঞা যেমন আপনি॥
তুমি রণ্ডা ভ্রাতৃবধূ করিয়া গমন।
জন্মাইল ধৃতরাষ্ট্র পাণ্ডু দুই জন॥
কুন্তী মাদ্রী দুই নারী পাণ্ডু কৈল বিয়া।
সম্ভোগে রহিত হৈল শাপের লাগিয়া॥
ভেবে মরে কুন্তী মাদ্রী করিব কেমন।
তুমি তাহে বিধি দিলা আপনি যেমন॥
ধৰ্ম্ম বায়ু ইন্দ্র আর অশ্বিনীকুমার।
উপপতি হৈতে পাঁচ পুত্র হৈল তার॥
যুধিষ্ঠির ভীম আর অর্জুন নকুল।
সহদেব এই পঞ্চ পাণ্ডব অতুল॥
তুমি তাহে আপনার মত বিধি দিয়া।
পাঁচ বরে এক দ্রৌপদীকে দিলা বিয়া॥
জন্ম কৰ্ম্ম কথা সব সমান তোমার।
তুমি কলঙ্কের ডালি কলঙ্ক আমার॥
ব্রহ্মশাপ কি দিবি কি তোরে মোর ভয়।
ব্রহ্মশাপ সেই দেয় ব্রাহ্মণ যে হয়॥
ব্রহ্মশাপ কিবা দিবি কে তোরে ডরায়।
ব্রহ্মহত্যা আদি পাপ মোর নামে যায়॥
তুই কি জানিবি ব্রহ্মা তোর পিতামহ।
সে জানে মহিমা মোর তারে গিয়া কহ॥
এত বলি ক্রোধে গঙ্গা কৈলা অন্তর্দান।
গালি খেয়ে ব্যাসদেব হৈলা হতজ্ঞান॥
ভারত কহিছে ব্যাস ধিরি ধিরি ধিরি।
গিয়াছিল যথা হৈতে তথা গেলা ফিরি॥
দীনদয়াময়ী দেবী দয়া কর দীনে।
দারিদ্র দুর্গতি দূর কর দিনে দিনে॥
ধৰ্ম্ম তার ধরা তার ধন তার ধান।

BANGLADARSHAN.COM

ধ্যানে ধরে যে তোমারে সেই সে ধীমান॥
নারসিংহী নৃমুণ্ডমালিনী নারায়ণী।
নগেন্দ্রনন্दिनी नीलनलिननयनी॥
कृष्णचन्द्र आज्ञाय भारतचन्द्र गाय।
हरि हरि बल सबे पाला हेल साय॥

বিশ্বকর্মার নিকট ব্যাসের অভ্যর্থনা

আসনে বসিয়া উনুনা হইয়া
ভাবেন ব্যাস গোসাঁই।
এই বড় শোক হাসিবেক লোক
মোর কাশী হৈল নাই॥
বিশ্বকর্মা আছে তারে আনি কাছে
সে দিবে পুরী গড়িয়া।
মোক্ষের উপায় শেষে করা যায়
ব্রহ্মার বর লইয়া॥
করি আচমন যোগে দিয়া মন
বিশ্বকর্মে কৈলা ধ্যান।
জানিয়া অন্তরে বিশাই সত্বরে
আসি কৈলা অধিষ্ঠান॥
বিশাই দেখিয়া সানন্দ হইয়া
বিনয়ে কহেন ব্যাস।
তুমি বিশ্বকর্মা জান বিশ্বমর্ম
তোমাতে বিশ্ব প্রকাশ॥
তুমি বিশ্ব গড় তুমি বিশ্বে বড়
তেঁই বিশ্বকর্মা নাম।
তোমার মহিমা কেবা জানে সীমা
কেবা জানে গুণগ্রাম॥
বিধাতা হইয়া বিশ্ব নিরমিয়া
পালহ হইয়া হরি।

BANGLADARSHAN.COM

নানা গুণ জানি যারে তারে মানি
বেগার খাটিতে জান ॥

তপোবলে কাশী দেখ পরকাশি
দূর হ রে দুরাচার।

তোর গুণধর যত কারিকর
হইবে দুঃখী বেগার ॥

বিশাই শুনিয়া কহিছে হাসিয়া
বড় ভ্রান্ত তুমি ব্যাস।

শিবেরে লজ্জিবা কাশী প্রকাশিবা
কেন কর হেন আশ ॥

নাহি জান তত্ত্ব নাহি বুঝ সত্ত্ব
শিব ব্রহ্ম সনাতন।

অজাত অমর অনন্ত অজর
আদ্য বিভু নিরঞ্জন ॥

কার্য সাধিবারে এই যে আমারে
এখনি ব্রহ্ম কহিলে।

ব্রহ্ম বলিবার কি দেখ আমার
কেমনে ব্রহ্ম বলিলে ॥

যাহারে যখন দেখহ দুর্জন
তাহারে ব্রহ্ম বলহ।

এইরূপে কত কয়ে নানা মত
লিখিলা যত কলহ ॥

বিশাই ধীমান গেলা নিজ স্থান
ব্যাসের হইল দায়।

কহিছে ভারত এ নহে ভারত
করিবে কথামথায় ॥

BANGLADARSHAN.COM

ব্যাস ব্রহ্মার কথোপকথন

হর হর শঙ্কর সংহর পাপম্।

জয় করুণাময় নাশয় তাপম্॥

রঙ্গতরঙ্গিত গাঙ্গ জটাচয়

অর্পয় সর্পকলাপম্।

মহিষবিষাণরবেণ নিবারয়

মম রিপুশমনলুলাপম্॥

কনক কুসুম পরিশোভিত কর্ণে

কর্ণয় ভক্ত কপালম্।

নিগদতি ভারতচন্দ্র উমাধব

দেহি পদং দুরবাপম্॥

ব্রহ্মার করিলা ধ্যান ব্যাস তপোধন।

অবিলম্বে প্রজাপতি দিলা দরশন॥

আপন দুর্দশা আর শিবেরে নিন্দিয়া।

বিস্তুর কহিলা ব্যাস কান্দিয়া কান্দিয়া॥

শ্নেহেতে চক্ষুর জল অঞ্চলে মুছিয়া।

কহিছেন প্রজাপতি পিরীতি করিয়া॥

অরে বাছা ব্যাস তুমি বড়ই ছাবাল।

শিব সঙ্গে বাদ কর এ বড় জঞ্জাল॥

কাশীতে রহিতে শিব না দিলে না রবে।

তঁার সঙ্গে বাদে তোমা হৈতে কিবা হবে॥

শিবনাম জপ কর যেথা সেথা বসি।

যেখানে শিবের নাম সেই বারাণসী॥

তুমি কি করিবা কাশী লঙ্ঘিয়া তঁাহারে।

কাশীপতি বিনা কাশী কে করিতে পারে॥

শিব লঙ্ঘি আমি কি হইব বরদাতা।

আমি যে বিধাতা শিব আমারো বিধাতা॥

আমার আছিল বাছা পাঁচটি বদন।

এক মাথা কাটিয়া লইলা পঞ্চগনন॥

কি করিতে তাহে আমি পারিলাম তঁার।

BANGLADARSHAN.COM

সৃষ্টি স্থিতি প্রলয় লীলায় হয় যাঁর॥
কিসে অনুগ্রহ তাঁর নিগ্রহ বা কিসে।
বুঝিতে কে পারে যাঁর তুল্য সুধা বিষে॥
ভালে যাঁর সুধাকর গলায় গরল।
কপালে অনল যাঁর শিরে গঙ্গাজল॥
সম যাঁর সুধা বিষে হতাশন জল।
অন্যের যে অমঙ্গল তাঁরে সে মঙ্গল॥
তাঁর সঙ্গে তোর বাদ আমি ইথে নাই।
জানেন অন্তরযামী শঙ্কর গোসাঁই॥
এত বলি প্রজাপতি গেলা নিজস্থানে।
ব্যাসের ভাবনা হৈল কি হবে নিদানে॥
যে হৌক সে হৌক আরো করিব যতন।
মন্ত্রের সাধন কিম্বা শরীরপাতন॥
অন্নপূর্ণা ভগবতী সকলের সার।
কাশীর ঈশ্বরী যিনি বিশ্ব মায়া যাঁর॥
যাঁর অধিষ্ঠানে বারাণসীর মহিমা।
বিধি হরি হর যাঁর নাহি জানে সীমা॥
শঙ্কর আমার অন্ন মানা করেছিল।
শিবে না মানিয়া তিনি মোরে অন্ন দিলা॥
তদবধি জানি তিনি সকলের বড়।
অতএব তাঁর উপাসনা করি দড়॥
তিনি মোক্ষ দিবেন সকলে এথা বসি।
তবে সে হইবে মোর ব্যাসবারাণসী॥
এত ভাবি ব্যাসদেব মনে কৈলা স্থির।
অন্নপূর্ণা ধ্যান করি বসিলেন ধীর॥
বিস্তর কঠোর করি করিলেন তপ।
কত পুরশ্চরণ করিলা কত জপ॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

BANGLADARSHAN.COM

ব্যাসের তপস্যায় অন্নদার চাঞ্চল্য

গজানন ষড়ানন সঙ্গে করি পঞ্চগনন
কৈলাসেতে করেন ভোজন।
অন্নপূর্ণা ভগবতী অন্ন দেন হৃষ্টমতি
ভোজন করিছে ভূতগণ॥
হয় মুখ কার্তিকের গজমুখ গণেশের
মহেশের নিজে মুখপঞ্চ।
কত মুখ কত জন বেতাল ভৈরবগণ
ভাঙ্গ খেয়ে ভোজনে প্রপঞ্চ॥
লেগেছে সিদ্ধির লাগি খেতে বড় অনুরাগী
বার মুখ তিন বাপে পুতে।
অন্নদার হস্ত দুটি অন্ন দেন গুটি গুটি
থাকে নাহি পাতে থুতে থুতে॥
অন্নদা বুঝিলা মনে কৌতুক আমার সনে
বুঝা যাবে কেবা কত খান।
চৰ্ব্ব্য চূষ্য লেহ্য পেয় পাতে পাতে অপ্রমেয়
পয়োনিধি পৰ্ব্বত প্রমাণ॥
খাইবেন কেবা কত সবে হৈলা বুদ্ধিহত
অন্নপূর্ণা কহেন কি চাও।
অন্ন ব্যঞ্জনের রাশি কে রাখিবে করি বাসি
খেতে হবে খাও খাও খাও॥
এইরূপে অন্নপূর্ণা খেলারসে পরিপূর্ণা
নারীভাবে পতি পুত্র লয়ে।
ব্যাসের জপে অনশনে অন্নদা জানিলা মনে
ব্যাসের তপের অনুবলে॥
কপালে টনক নড়ে হাতে হৈতে হাতা পড়ে
উছট লাগিয়া পদ টলে।
দুর্দ্দৈব যখন ধরে ভাল কর্মে মন্দ করে
অন্নদার উপজিল রোষ॥
অনুগ্রহ গেল নাশ নিগ্রহে ঠেকিলা ব্যাস

ভাগ্যবশে গুণ হৈল দোষ॥

ভাবে বুঝি ক্রোধভর জিজ্ঞাসা করিলা হর
কেন দেবি দেখি ভাবান্তর।

অন্নদা কহেন হরে ব্যাস মুনি তপ করে
অনশন কৈল বহুতর॥

তুমি ঠাই নাহি নিলে কাশী হৈতে খেদাইলে
তাহাতে হয়েছে অপমান।

করিতে দ্বিতীয় কাশী হইয়াছে অভিলাষী
সেই হেতু করে মোর ধ্যান॥

হাসিয়া কহেন হর বুঝি তারে দিবা বর
মোরে মেনে দয়া না ছাড়িও।

আমি বৃদ্ধ তাই কই জানি নাই তোমা বই
এক মুটা অন্ন মেনে দিও॥

সক্রোধে কহেন শিবা কৌতুক করহ কিবা
কি হয় তাহার দেখ বসি।

এত বড় তার সাদ তোমা সনে করি বাদ
করিবেক ব্যাসবারাণসী॥

তবে যে কহিবে মোর তপস্যা করিল ঘোর
কি দোষে হইব রুষ্ট তারে।

অসময় সুসময় না বুঝিয়া দুরাশয়
বিরক্ত করিল অত্যাচারে॥

বলি রাজা ভগবানে ত্রিপাদ ধরণী দানে
অধোগতি পাইল যেমন।

তেমনি ব্যাসেরে গিয়া শাপ দিব বর দিয়া
শুনিয়া সানন্দ পঞ্চগনন॥

মহামায়া মায়া করি জরতীশরীর ধরি
ব্যাসদেবে ছলিতে চলিলা।

অন্নপূর্ণাপদতলে ভারত বিনয়ে বলে
রাজা কৃষ্ণচন্দ্র আজ্ঞা দিলা॥

BANGLADARSHAN.COM

অন্নদার জরতীবশে ব্যাসছলনা

কে তোমা চিনিতে পারে গো মা।
বেদে সীমা দিতে নারে॥
কত মায়া কর কত কায়া ধর
হেরি হরি হর হারে।
জিতজরামর হয় সেই নর
তুমি দয়া কর যারে॥
এ ভব সংসারে যে ভজে তোমারে
যম নাহি পারে তারে।
যদি না তারিবে যদি না চাহিবে
ভারত ডাকিবে কারে॥

মায়া করি মহামায়া হইলেন বুড়ী।
ডানি করে ভাঙ্গা লড়ি বাম কক্ষে বুড়ি॥
বাঁকড় মাকড় চুল নাহি আঁদি সাঁদি।
হাত দিলে ধূলা উড়ে যেন কেয়াকাঁদি॥
ডেঙ্গর উকুন নীক করে ইলিবিলা।
কুটকুটি কানকোটোরির কিলিবিলা॥
কোটরে নয়ন দুটি মিটি মিটি করে।
চিবুকে মিলিয়া নাসা ঢাকিল অধরে॥
ঝর ঝর ঝরে জল চক্ষু মুখ নাকে।
শুনিতো না পান কানে শত শত ডাকে॥
বাতে বাঁকা সর্ষ অঙ্গ পিঠে কুঁজভার।
অন্ন বিনা অন্নদার অস্তি চর্ম্ম সার॥
শত গাঁটি ছিঁড়া টেনা করি পরিধান।
ব্যাসের নিকটে গিয়া কৈলা অধিষ্ঠান॥
ফেলিয়া রূপড়ী লড়ি আহা উছ কয়ে।
জানু ধরি বসিলা বিরসমুখী হয়ে॥
ভূমে ঠেকে থুথি হাঁটু কান ঢেকে যায়।
কুঁজভরে পিঠাডাড়া ভূমিতে লুটায়॥
উকুনের কামড়েতে হইয়া আকুল।

BANGLADARSHAN.COM

চক্ষু মুদি দুই হাতে চুলকান চুল॥
মৃদুস্বরে কথা কন অন্তরে হাসিয়া।
অরে বাছা বেদব্যাস কি কর বসিয়া॥
তিন কাল গিয়া মোর এক কাল আছে।
পতি পুত্র ভাই বাপ কেহ নাহি কাছে॥
বাঁচিতে বাসনা নাই মরিবারে চাই।
কোথা মৈলে মোক্ষ হবে ভাবিয়া না পাই॥
কাশীতে মরিলে তাহে কত ভোগ আছে।
তারক মন্ত্রেতে শিব মোক্ষ দেন পাছে॥
এই ভয়ে সেখানে মরিতে সাধ নাই।
মৃত্যু মাত্র মোক্ষ হয় কোথা হেন ঠাই॥
তুমি নাকি কাশী করিয়াছ মহাশয়।
সত্য করি কহ এথা মরিলে কি হয়॥
ব্যাস কন এই পুরী কাশী হৈতে বড়।
মৃত্যু মাত্র মোক্ষ হয় এই কথা দড়॥
বুদ্ধি যদি থাকে বুড়ী এথা বাস কর।
সদ্য মুক্ত হবি যদি এইখানে মর॥
ছলেতে অন্নদা দেবী কহেন রুশিয়া।
মরণ টাকিলি বেটা অনাথা দেখিয়া॥
তোর মনে আমি বুঝি এখনি মরিব।
সকলে মরিবে আমি বসিয়া দেখিব॥
উর্দ্ধগ বিকারে মোর পড়িয়াছে দাঁত।
অন্ন বিনা অন্ন বিনা সুখায়েছে আঁত॥
বায়ুতে পাকিয়া চুল হৈল শণলুড়ি।
বাতে করিয়াছে খোঁড়া চলি গুড়ি গুড়ি॥
শিরঃশূলে চক্ষু গেল কুঁজা কৈল কুঁজে।
কতটা বয়স মোর যদি কেহ বুজে॥
কানকোটারিতে মোর কান কৈল কালা।
কেটা মোরে বুড়ী বলে এ ত বড় জ্বালা॥
এত বলি ছলে দেবী ক্রোধভরে যান।
আর বার ব্যাসদেব আরস্তিলা ধ্যান॥
জগতে যে কিছু আছে অধীন দেবের।

BANGLADARSHAN.COM

শাস্ত্রে বলে সেই দেব অধীন মন্ত্ৰের॥
ধ্যানের প্রভাবে দেবী চলিতে নারিয়া।
পুনশ্চ ব্যাসের কাছে আইলা ফিরিয়া॥
বুড়ী দেখি অরে বাছা অনুকূল হও।
এথা মৈলে কি হইবে সত্য করি কও॥
বুড়া বয়সের ধর্ম অল্পে হয় রোষ।
ক্ষণে ক্ষণে ভ্রান্তি হয় এই বড় দোষ॥
মনে পড়ে না রে বাছা কি কথা कहিলে।
পুন कह কি হইবে এখানে মরিলে॥
ব্যাসদেব কন বুড়ী বুঝিতে নারিলে।
সদ্য মোক্ষ হইবেক এখানে মরিলে॥
বুড়ী কন হয় বিধি করিলেক কালা।
কি বল বুঝিতে নারি এ ত বড় জ্বালা॥
পুনশ্চ চলিলা দেবী ছলে ক্রোধ করি।
ব্যাসদেব পুনশ্চ বসিলা ধ্যান ধরি॥
ধ্যানের অধীনা দেবী চলিতে নারিলা।
পুনশ্চ ব্যাসের কাছে ফিরিয়া আইলা॥
এইরূপে দেবী বার পাঁচ ছয় সাত।
ব্যাসের নিকটে করিলেন যাতায়াত॥
দৈবদোষে ব্যাসদেবে উপজিল ক্রোধ।
বিরক্ত করিল মাগী কিছু নাহি বোধ॥
একে বুড়ী আরো কালা চক্ষে নাহি সুখে।
বারে বারে ধ্যান ভাঙ্গে कहিলে না বুখে॥
ডাকিয়া कहিলা ক্রোধে কানের কুহরে।
গর্দভ হইবে বুড়ী এখানে যে মরে॥
বুঝিনু বুঝিনু বলি করে ঢাকি কান।
তথাস্তু বলিয়া দেবী কৈলা অন্তর্দান॥
বুড়ী না দেখিয়া ব্যাস আন্ধার দেখিলা।
হায় বিধি অন্তর্পূর্ণা আসিয়া ছলিলা॥
নিকটে পাইয়া নিধি চিনিতে নারিনু।
হায় রে আপনা খেয়ে কি কথা कहিনু॥
বিধি বিষ্ণু শিব আদি তোমার মায়ায়।

BANGLADARSHAN.COM

মৃগালের তন্তুমধ্যে সদা আসে যায়॥
প্রকৃতিপুরুষরূপা তুমি সূক্ষ্ম স্কুল।
কে জানে তোমার তত্ত্ব তুমি বিশ্বমূল॥
বাক্যাতীত গুণ তব বাক্যে কত কব।
শক্তিয়োগে শিবসংজ্ঞা শক্তিলোপে শব॥
নিজ আত্মতত্ত্ব বিদ্যাতত্ত্ব শিবতত্ত্ব।
তব দত্ত তত্ত্বজ্ঞানে ঈশের ঈশত্ব॥
শরীর করিনু ক্ষয় তোমারে ভাবিয়া।
কি গুণ বাড়িল তব ব্যাসেরে ছলিয়া॥
ব্যাসবারাণসী হবে ভাবিলাম বসি।
বাক্যদোষে হইল গর্দভবারাণসী॥
অলঙ্ঘ্য দেবীর বাক্য অন্যথা না হয়।
ভবিতব্যং ভবত্যেব গুণাকর কয়॥

BANGLADARSHAN.COM ব্যাসের প্রতি দৈববাণী

ভুল না রে অরে নর শঙ্কর সার কর।
শমনেরে কেন ডর॥
দূর হবে পাপ চূর হবে তাপ
গঙ্গাধরে ধ্যানে ধর।
শঙ্কর শঙ্কর এ তিন অক্ষর
মালা করি গলে পর॥
এ ভব সাগরে না ভজিয়া হরে
কেন মিছা ডুবি মর।
ভারতের মত শুন রে ভকত
ভবে ভজি ভব তর॥

বিরসবদন দেখি ব্যাস তপোধনে।
কহিলেন অন্নপূর্ণা আকাশবচনে॥
শুন শুন ব্যাসদেব কেন ভাব তাপ।
এ দুঃখ তোমাকে দিল শিবনিন্দা পাপ॥

জ্ঞানঅহঙ্কারে বারাণসী মাঝে গিয়া।
শিব হৈতে মোক্ষ নহে কহিলা ডাকিয়া॥
ভুজস্তু কণ্ঠরোধ হয়েছিল বটে।
শিবে স্তুতি করি পার পাইলা সঙ্কটে॥
তার পর শৈব হয়ে বিষ্ণুরে ছাড়িলে।
সেই দোষে কাশী মাঝে ভিক্ষা না পাইলে॥
এক পাপে দুঃখ পেয়ে আরো কৈলা পাপ।
না বুঝিয়া কাশীবাসিগণে দিলা শাপ॥
অন্ন বিনা শিষ্য সহ উপবাসী ছিলে।
আমি গিয়া অন্ন দিনু তেঁই সে বাঁচিলে॥
মোর উপরোধে তোরে মহেশ ঠাকুর।
নষ্ট না করিয়া কৈলা কাশী হৈতে দূর॥
আমি দিনু বর চতুর্দশী অষ্টমীতে।
মণিকর্ণিকার স্নানে পাইবে আসিতে॥
এইরূপে আমি তোরে বরদান দিয়া।
সে দিন রুদ্রের ক্রোধে দিনু বাঁচাইয়া॥
তথাপি শিবের সঙ্গে করিয়া বিরোধ।
কাশী করিবারে চাহ এ বড় দুর্বোধ॥
আমার দ্বিতীয় কিম্বা দ্বিতীয় শূলীর।
যদি থাকে তবে হবে দ্বিতীয় কাশীর॥
ইতঃপর ভেদ দ্বন্দ্ব ছাড়হ সকল।
জ্ঞানের সন্ধান কর অজ্ঞানে কি ফল॥
হরি হর বিধি তিন আমার শরীর।
অভেদে যে জন ভজে সেই ভক্ত ধীর॥
তুমি কি জানিবে তত্ত্ব কি শক্তি তোমার।
নিগম আগম আদি কেবা জানে পার॥
অযোগ্য হইয়া কেন বাড়াও উৎপাত।
খুঁয়ে তাঁতি হয়ে দেহ তসরেতে হাত॥
করিবে দ্বিতীয় কাশী না কর এ আশ।
অভিমান দূর করি চল নিজ বাস॥
আমার আজ্ঞায় চতুর্দশী অষ্টমীতে।
মণিকর্ণিকার স্নানে পাইবে আসিতে॥

BANGLADARSHAN.COM

এখানে মরিবে যেই গর্দভ হইবে।
এই হৈল গর্দভকাশী অন্যথা নহিবে॥
শুনিয়া আকাশবাণী ব্যাস তপোধন।
উদ্দেশে প্রণাম করি করিলা গমন॥
কৈলাসেতে অন্নপূর্ণা শঙ্কর লইয়া।
বিহারে রহিলা বড় সানন্দ হইয়া॥
জয়া বিজয়ারে কন সহাসবদনে।
নরলোকে মোর পূজা প্রকাশে কেমনে॥
কহিছে বিজয়া জয়া ভবিষ্যত বাণী।
কুবের তোমার পূজা করিবেক জানি॥
বসুন্ধর নামে তার আছে সহচর।
দিবেক পুষ্পের ভার তাহার উপর॥
রমণীসম্ভোগ তার কাননে হইবে।
সেই অপরাধে তুমি তারে শাপ দিবে॥
মনুষ্য হইবে সেই হরিহোড় নামে।
ধন বর দিবা তুমি গিয়া তার ধামে॥
তাহা হৈতে হইবেক পূজার সঞ্চর।
কুবেরের সুতে শাপ দিবা পুনর্বার॥
ব্রাহ্মণ হইবে সেই ভবানন্দ নামে।
হরিহোড়ে ছাড়ি তুমি যাবে তার ধামে॥
দিল্লী হৈতে রাজ্য দিয়া পূজা লবে তার।
তাহা হৈতে হইবেক পূজার প্রচার॥
তার বংশে হবে রাজা কৃষ্ণচন্দ্র রায়।
সঙ্কটে তারিবে তুমি দেখা দিয়া তায়॥
তাহা হৈতে পূজার প্রচার হবে বড়।
হাসিয়া কহেন দেবী এই কথা দড়॥
কহিছে ভারতচন্দ্র রায় গুণাকর।
হরিহোড় প্রসঙ্গ শুনহ ইতঃপর॥

BANGLADARSHAN.COM

বসুন্ধরে অন্নদার শাপ

কুবেরের অনুচর নাম তার বসুন্ধর
বসুন্ধরা নামে তার জায়া।
দুই জনে হৃষ্টমনে ক্রীড়া করে কুঞ্জবনে
নানা রস জানে নানা মায়া॥
চৈত্র শুরু অষ্টমীতে অন্নদার পূজা দিতে
নানা দ্রব্য আনি শীঘ্রগতি।
ফুল আনিবার তরে ডাক দিয়া বসুন্ধরে
কুবের দিলেন অনুমতি॥
কুবেরের আঞ্জা পায় বসুন্ধর বেগে ধায়
কুঞ্জবনে হৈল উপনীত।
নানা জাতি তুলে ফুল যাহে মত্ত অলিকুল
যার গন্ধে মদন মোহিত॥
দেখিয়া পুষ্পের শোভা বসুন্ধরা রতিলোভা
বসুন্ধরে কহিতে লাগিল।
ফুলগুণে ফুলবাণ ফুলধনু দিয়া টান
ফুলবাণে আমারে বিঞ্চিল॥
আলিঙ্গন দিয়া কান্ত কামানল কর শান্ত
মোরে আর বিলম্ব না সহে।
কোকিলছকার কাল ভ্রমর ঝঙ্কার শাল
মলয়পবনে তনু দহে॥
বসুন্ধর বলে প্রিয়া আগে আসি ফুল দিয়া
অন্নপূর্ণা পূজিবে কুবের।
পূজা সঙ্গে তোমা সঙ্গে বিহার করিব রঙ্গে
এ সময় নাহি দিও ফের॥
অষ্টমীরে পর্ক্ব কয় ইথে রতি যুক্ত নয়
অন্নদার ব্রততিথি তায়।
আমার বচন ধর আজি রতি পরিহর
পূজা কর অন্নদার পায়॥
বসুন্ধরা বলে প্রভু এমন না শুনি কভু

এ কথা শিখিলা কার কাছে।
সাথে যারে কামড়ায় রোঝা গিয়া ঝাড়ে তায়
তাহে কি অষ্টমী আদি বাছে॥
কাম কাল বিষধর বিষে আমি জর জর
তুমি সে ঔষধ জান তার।
অষ্টমীরে পর্ক কয়ে অন্নদার নাম লয়ে
আরস্তিলা কত ফের ফার॥
অন্নপূর্ণা কি করিবে অষ্টমী কি সুখ দিবে
যে সুখ পাইবে রতিসুখে।
দেবাসুরে সুধা লাগি সিন্ধু মথি দুঃখভাগী
সে সুধা সঘনে পেও মুখে॥
এই যে তুলিলা ফুল কে জানে ইহার মূল
বৃথা হবে জলে ভাসাইলে।
দেখ দেখি মহাশয় সম্ভোগে কি সুখ হয়
তোমায় আমায় গলে দিলে॥
মালা গাঁথি এই ফুলে দিয়া দেখ মোর চুলে
মেঘে যেন বিজুলী খেলিবে।
বিপরীত রতি রঞ্জে পড়িলে তোমার অঞ্জে
ভাব দেখি কিবা শোভা দিবে॥
এইরূপে বসুন্ধরে বিক্রিয়া কটাক্ষ শরে
বসুন্ধরা মোহিত করিল।
কিবা করে ধ্যানে জ্ঞানে যে করে কামের বাণে
বসুন্ধর মদনে মাতিল॥
সেই ফুলে শয়্যা করি সেই ফুলে মালা পরি
রতি রসে দুজনে রহিল।
এথায় যক্ষের পতি অন্নদাপূজায় মতি
একমনে ধ্যান আরস্তিল॥
সংহতি বিজয়া জয়া কুবেরে করিয়া দয়া
অন্নদা করিল অধিষ্ঠান।
দেখিয়া পুষ্পের ব্যাজ কুবের যক্ষের রাজ
সভয় হইল কম্পমান॥
অন্নদা অন্তরে জানি কুবেরে নিকটে আনি

BANGLADARSHAN.COM

দয়ায় অভয়দান দিলা।
বসুন্ধরা বসুন্ধরে বান্ধি আনিবার তবে
ডাকিনী যোগিনী পাঠাইলা॥
ডাকিনী যোগিনীগণ প্রবেশিয়া কুঞ্জবন
বসুন্ধরা বসুন্ধরে ধরে।
সেই ফুলমালা সঙ্গে বুকে বুকে বান্ধি রঞ্জে
আনি দিল অন্নদা গোচরে॥
অন্নপূর্ণা ক্রোধমনে শাপ দিল দুই জনে
যেমন করিলি দুরাচার।
মরত ভুবনে যাও মনুষ্যশরীর পাও
ভারতের এই যুক্তি সার॥

বসুন্ধরের বিনয়

BANGLADARSHAN.COM

কান্দে বসুন্ধর বসুন্ধরা।
অন্নপূর্ণা মহামায়া দেহ চরণের ছায়া
শাপে কৈলা জিয়ন্তেতে মরা॥
অজ্ঞানে করিনু দোষ ক্ষমা কর অভিরোষ
তুমি দেবী জগতজননী।
ভস্ম না করিলে কেন কেন শাপ দিলে হেন
কোন সুখে যাইব ধরণী॥
অপরাধ অল্প মোর শাপ দিলা অতি ঘোর
নরলোকে কেমনে যাইব।
গর্ভবাস মহাদুখে উর্দ্ধপদে হেঁটমুখে
মলমূত্রে ভূষিত থাকিব॥
ভুঞ্জিব অশেষ ক্লেশ না পাব জ্ঞানের লেশ
পরদুঃখে হইব দুঃখিত।
মহাপাপ থাকে যার গর্ভবাস হয় তার
নিগম আগমে সুবিদিত॥
গর্ভবাস পাছে হয় ব্রহ্মাদিরো এই ভয়

সেই ভয়ে তোমারে সে ভজে।
ভব ঘোর পারাবারে তোমা বিনা কেবা পারে
যে তোমা না ভজে সেই মজে॥
অপরাধ হইয়াছে আর কত শাস্তি আছে
কুস্তীপাক রৌরব প্রভৃতি।
তাহে যেতে মন লয় মরতে যাইতে ভয়
বড় দুষ্ট নরের প্রকৃতি॥
ক্রন্দনেতে দুহাঁকার দয়া হৈল অন্দার
কহিলেন করিয়া সান্ত্বনা।
চল সুখে মর্ত্যলোক না পাইবে রোগ শোক
না পাইবে গর্ভের যাতনা॥
হয়ে মোর ব্রতদাস মোর পূজা পরকাশ
মরত ভুবনে গিয়া কর।
লোকে ব্রত পরকাশি পুন হবে স্বর্গবাসী
আমি সঙ্গে রব নিরন্তর॥
শুনি বসুন্ধর কয় ইহা যদি সত্য হয়
তবে মোর মরতে কি ভয়।
তব অনুগ্রহ যথা কৈলাস কৌশল তথা
চতুর্দর্গ সেইখানে হয়॥
যদি সঙ্গে যাহ তুমি তবে আমি যাই ভূমি
এই বর দেহ দাঁড়াইয়া।
পাতালেতে গিয়া বলি ছিল যেন কুতূহলী
গোবিন্দেরে দুয়ারি পাইয়া॥
এত বলি বসুন্ধর যোগাসনে করি ভর
জায়া সহ শরীর ত্যজিল।
অন্নপূর্ণা তুষ্ট হয়ে চলিলা দুজনে লয়ে
রায় গুণাকর বিরচিল॥

BANGLADARSHAN.COM

বসুন্ধরের মর্ত্যলোকে জন্ম

বসুন্ধর বসুন্ধরা অন্নদার শাপে।
সমাধিতে দিয়া মন তনু ত্যজে তাপে॥
বসুন্ধর বসুন্ধরা বসুন্ধরা চলে।
আগে আগে অন্নপূর্ণা যান কুতূহলে॥
কর্মাভূমি ভূমণ্ডল ত্রিভুবনে সার।
কর্মাহেতু জন্ম লৈতে আশা দেবতার॥
সপ্ত দ্বীপ মাঝে ধন্য ধন্য জম্বুদ্বীপ।
তাহাতে ভারতবর্ষ ধর্মের প্রদীপ॥
তাহে ধন্য গৌড় যাহে ধর্মের বিধান।
সাদ করি যে দেশে গঙ্গার অধিষ্ঠান॥
বাসুন্ধরায় ধন্য পরগণা বাণ্ডয়ান।
তাহে বড়গাছি গ্রাম গ্রামের প্রধান॥
পশ্চিমে আপনি গঙ্গা পূর্বেতে গাঙ্গিনী।
সেই গ্রামে উত্তরীলা অন্নদা তারিণী॥
জয়ারে কহিলা দেবী হাসিয়া হাসিয়া।
এ গ্রামে কে বড় দুঃখী দেখহ ভাবিয়া॥
তার ঘরে জন্মিবে আমার বসুন্ধর।
বড় সুখী করিব পশ্চাতে দিয়া বর॥
হেন কালে এক রামা স্নান করি যায়।
তৈল বিনা চুলে জটা খড়ি উড়ে গায়॥
লতা বাসুন্ধর পদপাতে কটি আচ্ছাদন।
ঢাকিয়াছে পদপাতে মাথা আর স্তন॥
অন্ন বিনা কলেবরে অস্তিচর্ম সার।
গেয়ে লোকে দিয়াছে পদ্মিনী নাম তার॥
আয়তের চিহ্ন হাতে লোহা একগাছি।
মুখগন্ধে পদ্মিনীর সদা উড়ে মাছি॥
তারে দেখি অন্নদার উপজিল দয়া।
হের আস বলি তারে ডাক দিল জয়া॥
অভিমাণে সেই রামা কারেহ না চায়।

BANGLADARSHAN.COM

মনুষ্য দেখিলে পথে বনে বনে যায়॥
নিকটে বিজয়া গিয়া কহিল তাহারে।
হের এই ঠাকুরাণী ডাকেন তোমারে॥
শুনিয়া কহিছে রামা করিয়া ক্রন্দন।
কে ডাকিলে অভাগীরে কে আছে এমন॥
পদগন্ধ যার গায় সে হয় পদ্মিনী।
পদপাত পরি আমি হয়েছি পদ্মিনী॥
ঘুঁটে কুড়াইয়া স্বামী বেচেন বাজারে।
যে পান খাইতে তাহা না আঁটে তাঁহারে॥
মৌলিক কায়স্থ জাতি পদবীতে হোড়।
কত কষ্টে মিলে এটে নাহি মিলে থোড়॥
বাহত্তরে কায়স্থ বলিয়া গালি আছে।
বসিতে না পান ভাল কায়স্থের কাছে॥
এমন দুখিনী আমি আমারে কে ডাকে।
সুখী লোক আমার বাতাসে নাহি থাকে॥
যে বল সে বল আমি যাব নাহি কাছে।
অভাগীর ঠাই বল কিবা কার্য্য আছে॥
বড়ই দুঃখিনী এই অন্নদা জানিলা।
কাছে গিয়া আপনি যাচিয়া বর দিলা॥
আমার আশিষে তুমি পুত্রবতী হবে।
সেই পুত্র হৈতে তুমি বড় সুখে রবে॥
ধন ধান্যে পরিপূর্ণ হইবেক ঘর।
কুলীন কায়স্থ সব দিবে কন্যা বর॥
অন্নপূর্ণা ভবানীরে তুষ্টিও পূজায়।
হইবেক নাম ডাক রাজায় প্রজায়॥
মায়াময় শ্রীফলের ফুল দিলা হাতে।
বীজরূপে বসুন্ধরে রাখিলা তাহাতে॥
কানে কানে কহিলেন যতনে রাখিবে।
ঋতুমান দিনে ইহা বাটিয়া খাইবে॥
এতেক বলিয়া দেবী কৈলা অন্তর্দান।
দেখিতে না পেয়ে রামা হৈল হতজ্ঞান॥
ক্ষণেকে সম্বিত পেয়ে লাগিলা কান্দিতে।

BANGLADARSHAN.COM

হায় রে দারুণ বিধি নারিনু চিনিতে॥
পেয়েছিঁনু মাণিক আঁচলে না বান্ধিনু।
নিকটে পাইয়া নিধি হেলে হারাইনু॥
কেমন দেবতা মেনে দেখা দিয়াছিল।
অভাগীর ভাগ্যদোষে পুন লুকাইলা॥
হরিষ বিষাদে রামা গেলা নিজালয়।
দেবীর দয়ায় ঋতু সেই দিনে হয়॥
স্নানদিনে সেই ফুল বাটিয়া খাইল।
পতিসঙ্গ রতিরঙ্গে গর্ভিণী হইল॥
শুভ ক্ষণে বসুন্ধর কৈল গর্ভবাস।
এক দুই তিন ক্রমে পূর্ণ দশ মাস॥
গর্ভবেদনায় হৈল পদ্মিনী কাতরা।
দ্রুত হয়ে বসুন্ধর ধরে বসুন্ধরা॥
পুত্র দেখি সুখ রাখিবারে নাহি ঠাই।
ধরি তোলে তাপ দেয় হেন জন নাই॥
আপনি দিলেন হলু নাড়ীচ্ছেদ করি।
দুঃখেতে স্মরিয়া হরি নাম দিলা হরি॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

হরিহোড়ের বৃত্তান্ত

অন্নদার দাস হয়ে হরিহোড় নাম লয়ে
বসুন্ধর ভূমিষ্ঠ হইল।
দেখিয়া পুত্রের মুখ বিষ্ণুহোড় পায় সুখ
পদ্মিনীর আনন্দ বাড়িল॥
ষষ্ঠীপূজা হৈল সায় ছয় মাসে অন্ন খায়
যুবা হৈল নানা দুঃখ পায়।
বনে মাঠে বেড়াইয়া কাট ঘুঁটে কুড়াইয়া
বেচিয়া পোষয়ে বাপ মায়ে॥

এক দিন শূন্য পথে অন্নপূর্ণা সিংহরথে
কুতূহলে ভ্রমিতে ভ্রমিতে।
জয়া বিজয়ার সঙ্গে কথোপকথনরঙ্গে
হরিহোড়ে পাইলা দেখিতে॥
মনে হৈল পূর্বকথা আপনি আসিয়া তথা
মায়া করি হইলেন বুড়ী।
কাট খড় জড়াইয়া সব ঘুঁটে কুড়াইয়া
রাখিলেন ভরি এক বুড়ি॥
হরিহোড় যেথা যান কাট ঘুঁটে নাহি পান
আট দিক আন্ধার দেখিলা।
বিস্তর রোদন করি হরি হরি স্মরে হরি
বুড়ীটিরে দেখিতে পাইলা॥
দেখেন বুড়ীর কাছে বুড়িভরা ঘুঁটে আছে
বোঝাবান্ধা কাট আছে তায়।
হরিহোড় কান্দি কহে বুড়ী মজাইল দহে
আজি বড় দেখি অনুপায়॥
কোথা হৈতে আসি বুড়ী ঘুঁটে লয়ে ভরে বুড়ি
সর্বনাশ করিল আমার।
কাড়ি নিলে হবে পাপ বুড়ী পাছে দেয় শাপ
এ দুঃখের নাহি দেখি পার॥
বৃদ্ধ পিতা মাতা ঘরে আকুল অন্নের তরে
ঘুঁটে বেচা আমার সম্বল।
কিছু ঘুঁটে না পাইনু মিছা বেলা মজাইনু
এ ছার জীবনে কিবা ফল॥
দয়া করি হরপ্রিয়া হরিহোড়ে ডাক দিয়া
ছল করি লাগিলা কহিতে।
কাট ঘুঁটে কুড়াইয়া রাখিয়াছি সাজাইয়া
অরে বাছা না পারি বহিতে॥
মঙ্গল হইবে তোর অতিদূরে ঘর মোর
ঘুঁটেগুলি যদি দেহ বয়ে।
অর্ধেক আমার হবে অর্ধেক আপনি লবে
দয়া করি চল মোরে লয়ে॥

BANGLADARSHAN.COM

হরিহোড় এত শূনি অর্দ্ধ লাভ মনে গুণি
মাথায় লইলা ঘুঁটেঝাড়ি।
বাতে কুঁজে বেঁকে বেঁকে লড়ী ধরে থেকে থেকে
আগে আগে চলিলেন বুড়ী॥
নিকটে হরির ঘর নহে অতি দূরতর
সাঁঝ কৈলা সেইখানে যেতে।
তাহারি উঠানে গিয়া বসিলেন হরপ্রিয়া
কহেন চলিতে নারি রেতে॥
কহিলা মধুর স্বরে থাকিলাম তোর ঘরে
হরি বলে এ হবে কেমনে।
ভাঙ্গা কুঁড়ে ছাওয়া পাতে বৃদ্ধ পিতা মাতা তাতে
ঠাই নাহি হয় চারি জনে॥
অতিথি আপনি হবে উপোসী কেমনে রবে
অন্নের সংযোগ মোর নাই।
হেন ভাগ্য নাহি ধরি অতিথি সেবন করি
এই বেলা দেখ আর ঠাই॥
এই দেখ বৃদ্ধ বাপ অন্ন বিনা পান তাপ
বৃদ্ধ মাতা অন্ন বিনা মরে।
গেল চারিপার দিন অন্ন বিনা আমি ক্ষীণ
যমযোগ্য অতিথি এ ঘরে॥
হরির শুনিয়া বাণী কহেন হরের রাণী
অরে বাছা না ভাবিহ দুখ।
ভারত সান্ত্বনা করে অন্নদা আইলা ঘরে
ইতঃপর পাবে যত সুখ॥

হরিহোড়ে অন্নদার দয়া

ভবানী বাণী বল এক বার।
ভবানী ভবের সার॥
ভবানী ভবানী সুমধুর বাণী

ভবনদী করে পার।
ভবানী ভাবিয়া ভবানী পাইয়া
ভব তরে ভবভার॥
ভবানী যে বলে এ ভবমণ্ডলে
ভবনে ভবানী তার।
ভবানীনন্দন ভারত ব্রাহ্মণ
ভবানী ভরসা যার॥

হাসিয়া কহেন দেবী শুন রে বাছনি।
না জানে গৃহিণীপনা তোমার জননী॥
গৃহিণীর পাপ পুণ্যে ঘর থাকে মজে।
সেই সে গৃহিণী যেই অন্নপূর্ণা ভজে॥
প্রভাতে যে জন অন্নপূর্ণা নাম লয়।
ইহলোকে অল্পে পূর্ণ শেষে মোক্ষ হয়॥
অল্পে পূর্ণা ধরা অন্নপূর্ণার দয়ায়।
অন্নপূর্ণা নাহি দিলে অন্ন কেবা পায়॥
শুনিয়া পদ্মিনী কহে শুন ঠাকুরাণী।
অন্নপূর্ণা কেবা কিবা কিছুই না জানি॥
বুড়ীটি কহেন রামা শুন মন দিয়া।
অন্নপূর্ণা নাম লয়ে হাঁড়ী পাড় গিয়া॥
হাঁড়ীভরা অন্ন আর ব্যঞ্জন পাইবে।
কোন কালে খাও নাই এমন খাইবে॥
শুনিয়া পদ্মিনী বড় আনন্দ পাইল।
অন্নপূর্ণা নাম লয়ে প্রণাম করিল॥
হাঁড়ী পাড়ি দেখে অন্ন ব্যঞ্জনের রাশি।
দণ্ডবত প্রণাম বুড়ীরে করে আসি॥
হরিহোড় বলে তুমি কে বট আপনি।
পরিচয় দেহ বলি পড়িল ধরনী॥
বুড়ীটি কহেন বাছা আগে অন্ন খাও।
শেষে দিব পরিচয় আর যাহা চাও॥
হরি বলে পিতা মাতা আগে খান ভাত।
পরিচয় দিলে অন্ন খাইব পশ্চাত॥

BANGLADARSHAN.COM

ক্ষুধা তৃষ্ণা দূর হৈল তোমারে দেখিয়া।
দূর কর দুর্ভাবনা পরিচয় দিয়া॥
হাসিয়া কহেন দেবী অরে বাছা হরি।
পরিচয় দিব আগে দুঃখ দূর করি॥
আহা মরি ঘুঁটে বেচি তোমার নিৰ্ব্বাহ।
এই ঘুঁটে একখানি বেচিবারে যাহ॥
এত বলি একখানি ঘুঁটে হাতে লয়ে।
দিলেন হরির হাতে অনুকূল হয়ে॥
ঘুঁটে হৈল হেমঘুঁটে দেবীর পরশে।
লোহা যেন হেম হয় পরশি পরশে॥
ঘুঁটে দেখি হেমঘুঁটে হরিহোড়ে ভয়।
এ কি দেখি অপরূপ ঘুঁটে সোনা হয়॥
কেমন দেবতা মেনে বুড়ী ঠাকুরাণী।
জাগিতে স্বপন কিবা বাজি অনুমানি॥
তপস্যা কি আছে যে দেবতা দেখা দিবে।
ভাগ্যগুণে বুঝি কোন বিপদ ঘটিবে॥
হেমঘুঁটে হাতে হরি কাঁপে থর থর।
অনিমিক নয়নে সলিল ঝর ঝর॥
এইরূপে হরিহোড়ে মোহিত দেখিয়া।
কহিতে লাগিলা দেবী ঈষদ হাসিয়া॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

হরিহোড়ে বরদান

ভয় কি রে অরে বাছা হরি।
আমি অন্নপূর্ণা মহেশ্বরী॥

অরে বাছা হরিহোড় দূর কর ভয়।
আমি দেবী অন্নপূর্ণা লহ পরিচয়॥
দুঃখ দেখি আসিয়াছি তোরে দিতে বর।

ধন পুত্র লক্ষ্মী পরিপূর্ণ হবে ঘর॥
চৈত্র মাসে শুরু পক্ষে অষ্টমী নিশায়।
করিহ আমার পূজা বিধি ব্যবস্থায়॥
আমার পূজার ফলে বড় সুখে রবে।
মাটিমুটা ধর যদি সোনামুটা হবে॥
দেবীর অমৃতবাক্যে পাইয়া আনন্দ।
প্রণমিয়া হরিহোড় কহে মৃদু মন্দ॥
অন্নপূর্ণা অবতীর্ণা অধমের ঘরে।
কেমনে এমন হবে প্রত্যয় কে করে॥
বিধি বিষ্ণু বিরিঞ্চিঃ বাসব আদি দেবে।
দেখিতে না পায় যাঁরে ধ্যান করি সেবে॥
ধর্ম অর্থ কাম মোক্ষ যাঁর নামে হয়।
তাঁরে আমি দেখিব কেমনে মনে লয়॥
শুনিয়াছি কাশীতে তাঁহার অধিষ্ঠান।
সেই মূর্তি দেখি যদি তবে সে প্রমাণ॥
নহে যেন অসম্ভবে কে করে প্রত্যয়।
ভেলকীতে কত ভাত ঘুঁটে সোনা হয়॥
হাসিয়া কহেন দেবী দেখ রে চাহিয়া।
বসিলেন অন্নপূর্ণা মূরতি ধরিয়া॥
মণিময় রক্তপদ্মে পদ্মাসনা হয়ে।
দুই হাতে পানপাত্র রত্নহাতা লয়ে॥
কোটি শশী জিনি মুখ অর্দ্ধ শশী ভালে।
শিরে রত্নমুকুট কবরী কেশজালে॥
পঞ্চমুখ সম্মুখে নাচেন অন্ন খেয়ে।
ভূমে পড়ে হরিহোড় একবার চেয়ে॥
মূর্ছিত দেখিয়া হরিহোড়ে হরপ্রিয়া।
প্রবোধিয়া দিলা বর রূপ সম্বরিয়া॥
হরিহোড় বলে মা গো ধনে কাজ কিবা।
এই বর দেহ পাদপদ্মে ঠাঁই দিবা॥
হাসিয়া কহিলা দেবী সে ত হবে শেষে।
কিছু দিন সুখভোগ করহ বিশেষে॥
হরিহোড় কহে মা গো কর অবধান।

BANGLADARSHAN.COM

চঞ্চলা তোমার কৃপা চঞ্চলাসমান॥
অনুগ্রহ করিতে বিস্তর ক্ষণ নহে।
নিগ্রহ করিতে পুন বিলম্ব না সহে॥
তবে লব ধন আগে দেহ এই বর।
বিদায় না দিলে না ছাড়িবে মোর ঘর॥
কিঞ্চিৎ ভাবিয়া দেবী তথাস্ত বলিলা।
ভোজন করিতে পুনর্বীর আজ্ঞা দিলা॥
দেবীর আজ্ঞায় হরিহোড় ভাগ্যধর।
মায়েরে কহিলা অন্ন দেহ শীঘ্রতর॥
পদ্মিনী পদ্মিনী হৈল দেবীর দয়ায়।
দিব্য বস্ত্র অলঙ্কার সুশোভিত কায়॥
মুখপদ্মগন্ধে মত্ত মধুকর ওড়ে।
মহানন্দে অন্ন বাড়ি দিলা হরিহোড়ে॥
চর্ব্য চূষ্য লেহ্য পেয় আদি নানা রস।
ভোজন করিল হরিহোড় মহাযশ॥
বস্ত্র অলঙ্কারে বিষ্ণুহোড় দিব্যকায়।
কুটার হইল কোঠা দেবীর কৃপায়॥
এইরূপে হরিহোড়ে দিয়া ধন বর।
অন্তরীক্ষে অন্নপূর্ণা গেলেন সত্বর॥
আজ্ঞা দিলা কৃষ্ণচন্দ্র ধরণী ঈশ্বর।
রচিল ভারতচন্দ্র রায় গুণাকর॥

বসুন্ধরার জন্ম

এইরূপে হরিহোড় পেয়ে ধন বর।
ধনধান্যে পরিপূর্ণ কুবেরসৌসর॥
কুলীন মৌলিক যত কায়স্থ আছিল।
নানামতে ধন দিয়া সকলে তুষিল॥
ঘটক পাইয়া ধন গাইল ঠাকুর।
বাহাত্তর গালি ছিল তাহা গেল দূর॥

ঘোষ বসু মিত্র মুখ্যকুলীনের কন্যা।
বিবাহ করিল তিন রূপে গুণে ধন্যা॥
পিতা মাতা সুত ভ্রাতা কন্যা বধূগণ।
জামাই বেহাই লয়ে ভুঞ্জে নানা ধন॥
অন্নপূর্ণা ভবানীরে প্রত্যহ পূজিয়া।
রাখিলেক কিছু দিন অচলা করিয়া॥
ভাবেন অন্নদা দেবী কি করি এখন।
স্বর্গে লব বসুন্ধরে করিয়া কেমন॥
শাপ দিতে হইবেক কুবেরনন্দনে।
জনম লইবে সেই মরতভুবনে॥
ভবানন্দ মজুন্দার হইবেক নাম।
তার ঘরে হইবেক করিতে বিশ্রাম॥
ইহা হইতে ছাড়িতে নারি না দিলে বিদায়।
কহ লো বিজয়া জয়া কি করি উপায়॥
হেন কালে বসুন্ধরা অব্যাহতরূপে।
কান্দিয়া কহিছে মজি পতিশোকরূপে॥
আমার স্বামীরে লয়ে মানুষ করিয়া।
আনন্দে রাখিলা তারে তিন নারী দিয়া॥
স্বামিহীনা আমি ফিরি কান্দিয়া কান্দিয়া।
এত দুঃখ দেহ মোরে কিসের লাগিয়া॥
আপনি ত জান স্ত্রীলোকের ব্যবহার।
সতিনী লইলে পতি বড়ই প্রহার॥
বরঞ্চ শমনে লয় তাহা সহে গায়।
সতিনী লইলে স্বামী সহ্য নাহি যায়॥
শিব যদি যান কভু কুচনীর বাড়ী।
ভাবহ আপনি কত কর তাড়াতাড়ী॥
পরদুঃখ সেই বুঝে আপনা যে বুঝে।
অন্তরযামিনী তুমি তবু নাহি সুঝে॥
ঠাকুরাণী দাসীরে না দিবে যদি দৃষ্টি।
তবে কেন স্ত্রীপুরুষে কৈলা রতিসৃষ্টি॥
ব্রহ্মরূপা তুমি তেঁই নাহি পাপ পুণ্য।
হৌক মেনে জানা গেল বিবেচনাশূন্য॥

BANGLADARSHAN.COM

এইরূপে বসুন্ধরা গর্বির্ত ভর্ৎসনে।
কান্দিয়া কহিছে দেবী হাসিছেন মনে॥
জয়া বলে এই ভাল হইল উপায়।
ইহারে মানুষী করি বিভা দেহ তায়॥
ইহার কন্দলে তার অলক্ষণ হবে।
তাহারে ছাড়িতে তুমি পথ পাবে তবে॥
যুক্তি বটে বলে দেবী করিলেন তুরা।
বসুন্ধরা লইয়া চলিলা বসুন্ধরা॥
আমনহাঁড়ার দত্ত ছিল ভাঁড়ু দত্ত।
তার বংশে ঝাড়ু দত্ত ঠক মহামত্ত॥
ধূমী নামে তার নারী বড় কন্দলিয়া।
তার গর্ভে বসুন্ধরা জনমিল গিয়া॥
শিশুকাল হৈতে তার কন্দলে আবেশ।
এক বোলে দশ বলে নাহি আঁটে দেশ॥
মনোমত তার মাতা তাহারে পাইয়া।
সোহাগী দিলেক নাম সোহাগ করিয়া॥
ভবিতব্যং ভবত্যেব খণ্ডিতে কে পারে।
বৃদ্ধকালে হরিহোড় বিয়া কৈল তারে॥
শুভ ক্ষণে সোহাগী প্রবেশ কৈল আসি।
লকলকী নামে তার সঙ্গে আইল দাসী॥
বৃদ্ধকালে হরিহোড় যুবতী পাইয়া।
আজ্ঞাবহ সোহাগীর সোহাগ করিয়া॥
অন্নপূর্ণা ছাড়িতে সর্বদা চান ছল।
চারি সতিনীর সদা বড়ই কন্দল॥
ঝাড়ু করে ঠকামি সোহাগী দ্বন্দ্ব করে।
নানা মতে ধন যায় রাজা ছল ধরে॥
কন্দলে কন্দলে ত্রোদ হৈল অন্নদার।
ছাড়িতে বাসনা হৈল কেবা রাখে আর॥
সেখানে দেবীর দয়া পিরীতি যেখানে।
যেখানে কন্দল দেবী না রন সেখানে॥
দিনে দিনে হরিহোড় পাইছে যন্ত্রণা।
কৈলাসে বসিয়া দেবী করেন মন্ত্রণা॥

BANGLADARSHAN.COM

ইতঃপর শুন সবে ভারত রচিল।
ভবানন্দ মজুন্দার যেমতে জন্মিল ॥
কর গো করুণাময়ি করুণা কাতরে।
কৃপাকল্পতরু বিনা কেবা কৃপা করে ॥
কৃষ্ণচন্দ্র আজ্ঞায় ভারতচন্দ্র গায়।
হরি হরি বল সবে পালা হৈল সায় ॥

নলকুবরে শাপ

কুবরের সূত রূপ গুণযুত
বিখ্যাত নলকুবর।
তাহার কামিনী চন্দ্রিণী পদ্মিনী
দুঁহে প্রেম অতিতর ॥
চৈত্র মধু মাস বসন্ত প্রকাশ
তরু লতা সুশোভিত।
কোকিল ছঙ্কারে ভ্রমর ঝঙ্কারে
সৌরভে বিশ্ব মোহিত ॥
কুঞ্জবনে গিয়া রমণী লইয়া
বিহরে নলকুবর।
রমণী সঙ্গেতে বিহরে রঙ্গেতে
আর যত সহচর ॥
শুরু অষ্টমীতে ভুবন ভ্রমিতে
পূজা লইবার মনে।
অন্নদা জননী চলিলা আপনি
লয়ে সহচরীগণে ॥
যাইতে যাইতে পাইলা দেখিতে
নলকুবরের খেলা।
দেখি বনশোভা মন হৈল লোভা
কৌতুক দেখিতে গেলা ॥
নৃত্য বাদ্য গীত গন্ধে আমোদিত

নানা ভোজ্য আয়োজন।

নির্মূল চন্দ্রিকা প্রফুল্ল মল্লিকা
শীতল মন্দ পবন॥

কহেন অভয়া দেখ লো বিজয়া
কে বুঝি পূজে আমারে।
এ কৈল যেমন না দেখি এমন
এই সে ধন্য সংসারে॥

হাসি জয়া কহে ও মা এ সে নহে
এ ত কুবেরের বেটা।

পূজা কি কে জানে করে বা ও মানে
উহারে আঁটয়ে কেটা॥

ধনমত্ত অতি লইয়া যুবতী
ও করে কামবিহার।

পূজিতে তোমারে বল কি বিচারে
কি কব আমি ইহার॥

ধনমত্ত যেই সে কি সেবা দেই
আপনি না জান কিবা।

নিকট হইয়া জিজ্ঞাসহ গিয়া
এখনি মর্শ্ব পাইবা॥

পুরুষ আকারে যাহ ছলিবারে
না যেও নারীর বেশে।

মত্ত মধুপানে বিদ্র কামবাণে
লজ্জা দেই পাছে শেষে॥

শুশ্রুণিগুস্তারে বধ করিবারে
মোহিনী হইয়াছিলে।

গৃহিণী করিতে আইল লইতে
মো সবারে লাজ দিলে॥

জয়ার বচনে হাসি মনে মনে
আপনি দেবী চলিলা।

ব্রাহ্মণের বেশে কৌতুক অশেষে
নিকটেতে উত্তরিলা॥

কহেন ব্রাহ্মণ শুন হে সুজন

BANGLADARSHAN.COM

কেমন বুদ্ধি তোমার।
পণ্ডিত হইয়া পৰ্ব না মানিয়া
করিছ রতিবিহার।
এই যে অষ্টমী পুণ্যদা এ তমী
অন্নদার ব্রততিথি।
ইহাতে অন্নদা অবশ্য বরদা
তঁাহারে কর অতিথি।
এই দিব্য স্থল এ দ্রব্য সকল
অন্নদাপূজার যোগ্য।
না পূজি তঁাহারে যুবতীবিহারে
কেন কর প্রেতভোগ্য।
এমন গুনিয়া হাসিয়া ঢুলিয়া
ঘূর্ণিত রক্ত লোচনে।
মাথা হেলাইয়া অঙ্গ দোলাইয়া
জড়িমযুক্ত বচনে।
অতিমত্ত মদে না গণে আপদে
কহে কুবেরের বেটা।
এ নব বয়সে ছাড়িয়া এ রসে
কার পূজা করে কেটা।
এ সুখযামিনী এ নব কামিনী
এ আমি নব যুবক।
এ রস ছাড়িয়া পূজায় বসিয়া
ধ্যানে রব যেন বক।
জানি অন্নদারে সে জানে আমারে
কি হবে পূজিলে তারে।
অন্নদা যেমন কতেক তেমন
আছয়ে মোর ভাঙরে।
শঙ্কর ভিখারী সে ত তারি নারী
আমি মর্শ্ব জানি তার।
বাপার ভাঙরে অন্ন চাহিবারে
দিনে আসে তিন বার।
কি বলে বামণ অরে চরণ

BANGLADARSHAN.COM

বধ রে ইহার প্রাণ।
এমন শুনিয়া সক্রোধ হইয়া
দেবী হৈলা অন্তর্দান ॥
হুঙ্কার ছাড়িয়া জয়ারে ডাকিয়া
বিজয়ারে দিলা পান।
ডাকিনী যোগিনী শাঁখিনী পেতিনী
যুদ্ধে হৈল আশুয়ান ॥
ভাঙ্গি কুঞ্জবনে বধি যক্ষগণে
নলকুবরেরে ধরে।
রমণী সঙ্গেতে বান্ধিয়া রঙ্গেতে
দিল অন্নদা গোচরে ॥
অন্নদা ভাবিয়া ব্রতের লাগিয়া
শাপ দিলা তিন জনে।
মর্ত্যলোকে যাও নরদেহ পাও
রায় গুণাকর ভণে ॥

BANGLADARSHAN.COM

নলকুবরের প্রাণত্যাগ

কান্দে নলকুবর দুঃখিত।
চন্দ্রিণী পদ্মিনী সংমিলিত ॥
না জানিয়া করিয়াছি দোষ।
দয়াময়ি দূর কর রোষ ॥
কেন দিলা নিদারুণ শাপ।
ভূমে গেলে বাড়িবেক তাপ ॥
শাস্তি দিবা যদি মনে আছে।
সুঁপে দেহ শমনের কাছে ॥
কুস্তীপাক রৌরবে রহিব।
তথাপি ভূতলে না যাইব ॥
ভূমে কলি বড় বলবান্।
নাহি রাখে ধর্মের বিধান ॥

পাতকী লোকের মাঝে গিয়া।
পড়ি রব পাপ বাড়াইয়া॥
ক্রন্দনে দেবীর হৈল দয়া।
মর্ম্ম বুঝি কহিছে বিজয়া॥
ভয় নাহি ও নলকুবর।
চল তুমি অবনী ভিতর॥
অন্নদার হবে ব্রতদাস।
ব্রতকথা করিবে প্রকাশ॥
পুনরপি এখানে আসিবে।
কলি তোমা ছুঁতে না পারিবে॥
অন্নপূর্ণা পরিপূর্ণা রঞ্জে।
আপনি যাবেন তোমা সঙ্গে॥
কান্দি কহে কুবেরের বেটা।
এ বাক্যে প্রত্যয় করে কেটা॥
অধম নরের ঘরে যাব।
কোন গুণে অন্নদারে পাব॥
ব্যস্ত হব উদর ভরণে।
কি জানিব ভজন পূজনে॥
সন্তান কেমন মেনে হবে।
তাহে কি দেবীর দয়া রবে॥
অন্নপূর্ণা কহেন আপনি।
ভয় নাহি চল রে অবনী॥
জনমিবে ব্রাহ্মণের ঘরে।
মোরে ভক্তি রহিবে অন্তরে॥
আপনি তোমার ঘরে যাব।
বড় বড় সঙ্কটে বাঁচাব॥
তোমার সন্তানে রাজা হবে।
তাহাতে আমার দয়া রবে॥
এত গুনি কুবেরনন্দন।
জায়া সহ ত্যজিল জীবন॥
অন্নপূর্ণা তিন জনে লয়ে।
অবনী চলিলা হৃষ্টা হয়ে॥

BANGLADARSHAN.COM

রাজা কৃষ্ণচন্দ্রের আজ্ঞায়।

রচিল ভারতচন্দ্র রায়॥

ভবানন্দের জন্মবৃত্তান্ত

অভয়া দয়া কর আমারে গো।

বিপাকে ডাকি তোমারে গো॥

দানবদমনী শমনশমনী

ভবানী ভবসংসারে গো।

সঙ্কটতারিণী লজ্জানিবারণী

তোমা বিনা কব কারে গো॥

জঠরযন্ত্রণা যমের মন্ত্রণা

কত সব বারে বারে গো।

দয়াদৃষ্টে চাহ তুরায় তরাহ

ভারতেরে ভবভারে গো॥

এইরূপে অন্নপূর্ণা তিন জনে লয়ে।

উত্তরিলে ধরাতলে মহাহুষ্ঠা হয়ে॥

ধন্য ধন্য পরগনা বাণ্ডয়ান নাম।

গাঙ্গিনীর পূর্বকূলে আন্দুলিয়া গ্রাম॥

তাহার পশ্চিম পারে বড়গাছি গ্রাম।

যাহে অন্নদার দাস হরিহোড় নাম॥

রহিতে বাসনা নাহি হরিহোড় ধামে।

এই হেতু উত্তরিলে আন্দুলিয়া গ্রামে॥

তাহে রাম সম্ভার নাম এক জন।

শ্রোত্রিয় কেশরী গাঁই রাঢ়ীয় ব্রাহ্মণ॥

সীতা ঠাকুরাণী নামে তাহার গৃহিণী।

ঋতুস্নান সে দিন করিয়াছিল।

রতিরসে সেই সতী পতিরে তুষিলা।

নলকুবরেরে দেবী সেই গর্ভে দিলা॥

শুভ ক্ষণে নলকুবরের গর্ভবাস।

BANGLADARSHAN.COM

এক দুই তিন ক্রমে পূর্ণ দশ মাস॥
ভূমিষ্ঠ হইল নলকুবর স্বচ্ছন্দে।
ভবানন্দ নাম হৈল ভবের আনন্দে॥
লালন পালন পাঠ ক্রমে সাজ পায়।
বিস্তার বর্ণিতে তার পুথি বেড়ে যায়॥
চন্দ্রিণী পদ্মিনী দুহে কত দিন পরে।
জনম লইল দুই ব্রাহ্মণের ঘরে॥
চন্দ্রমুখী পদ্মমুখী নাম দু জনার।
বিবাহ করিলা ভবানন্দ মজুন্দার॥
চন্দ্রমুখী প্রসবিলা তিন পুত্র ক্রমে।
গোপাল গোবিন্দ আর শ্রীকৃষ্ণ প্রথমে॥
পদ্মমুখী যুবতী রহিলা অই মত।
সুয়াভাবে মজুন্দার তাহে অনুগত॥
নানা রসে মজুন্দার দুঁহে অভিলাষী।
সাধী মাধী নামে দুঁহে দিলা দুই দাসী॥
ইতঃপর অন্নপূর্ণা হরিহোড়ে ছাড়ি।
আসিবেন ভবানন্দ মজুন্দার বাড়ী॥
গৃহছেদে হরিহোড় সতত উন্মুনা।
দিনে দিনে নানামত বাড়িছে যন্ত্রণা॥
এক দিন পূজায় বসিয়া ধ্যান করে।
তার কন্যা হয়ে দেবী গেলা তার ঘরে॥
মনে আছে তার পূর্ব দিবস হইতে।
জামাই এসেছে তার কন্যারে লইতে॥
অন্নপূর্ণা বিদায় চলিলা সেই ছলে।
ক্রোধভরে হরিহোড় যাহ যাহ বলে॥
ওই ছলে অন্নপূর্ণা বাঁপি লয়ে করে।
চলিলেন ভবানন্দ মজুন্দার ঘরে॥
স্থির নাহি হয় হরি যত ধ্যান ধরে।
বাহিরে আসিয়া দেখে কন্যা আছে ঘরে॥
জিজ্ঞাসা করিয়া তার বিশেষ জানিল।
অন্নদা ছাড়িলা বলি শরীর ছাড়িল॥
চারি দিকে বন্ধুগণ করে হায় হায়।

BANGLADARSHAN.COM

দেখিতে দেখিতে ধন ধান্য উড়ে যায়॥
সোহাগী মরিল পুড়ি হরিহোড় লয়ে।
স্বর্গে গেল বসুন্ধর বসুন্ধরা হয়ে॥
অন্নপূর্ণা গাঙ্গিনীর তীরে উপনীত।
রচিল ভারতচন্দ্র অন্নদার গীত॥

অন্নদার ভবানন্দভবনে যাত্রা

কে জানিবে তারানামমহিমা গো।
ভীম ভজে নাম ভীমা গো॥
আগম নিগমে পুরাণ নিয়মে
শিব দিতে নারে সীমা গো।
ধর্ম অর্থ কাম মোক্ষ ধাম নাম
শিবের সেই সে অগিমা গো॥
নিলে তারা নাম তরে পরিণাম
নাশে কলির কালিমা গো।
ভারত কাতর কহে নিরন্তর
কি কর কৃপাময়ী মা গো॥

অন্নপূর্ণা উত্তরিল গাঙ্গিনীর তীরে।
পার কর বলিয়া ডাকিলা পাটুণীরে॥
সেই ঘাটে খেয়া দেয় ঈশ্বরী পাটুণী।
তুরায় আনিল নৌকা বামাস্বর শুনি॥
ঈশ্বরীরে জিজ্ঞাসিল ঈশ্বরী পাটুণী।
একা দেখি কুলবধু কে বট আপনি॥
পরিচয় না দিলে করিতে নারি পার।
ভয় করি কি জানি কে দিবে ফেরফার॥
ঈশ্বরীরে পরিচয় কহেন ঈশ্বরী।
বুঝহ ঈশ্বরী আমি পরিচয় করি॥
বিশেষণে সবিশেষ কহিবারে পারি।
জানহ স্বামীর নাম নাহি ধরে নারী॥

গোত্রের প্রধান পিতা মুখবংশজাত।
পরমকুলীন স্বামী বন্দ্যবংশখ্যাত॥
পিতামহ দিলা মোরে অন্নপূর্ণা নাম।
অনেকের পতি তেঁই পতি মোর বাম॥
অতিবড় বৃদ্ধ পতি সিদ্ধিতে নিপুণ।
কোন গুণ নাহি তাঁর কপালে আগুন॥
কুকথায় পঞ্চমুখ কণ্ঠভরা বিষ।
কেবল আমার সঙ্গে দ্বন্দ্ব অহর্নিশ॥
গঙ্গা নামে সতা তার তরঙ্গ এমনি।
জীবনস্বরূপা সে স্বামীর শিরোমণি॥
ভূত নাচাইয়া পতি ফেরে ঘরে ঘরে।
না মরে পাষণ্ড বাপ দিলা হেন বরে॥
অভিমাণে সমুদ্রেতে ঝাঁপ দিলা ভাই।
যে মোরে আপনা ভাবে তারি ঘরে যাই॥
পাটুনী বলিছে আমি বুঝি সাকল।
যেখানে কুলীন জাতি সেখানে কন্দল॥
শীঘ্র আসি নায়ে চড় দিবা কিবা বল।
দেবী কন দিব আগে পারে লয়ে চল॥
যার নামে পার করে ভবপারাবার।
ভাল ভাগ্য পাটুনী তাহারে করে পার॥
বসিলা নায়ের বাড়ে নামাইয়া পদ।
কিবা শোভা নদীতে ফুটিল কোকনদ॥
পাটুনী বলিছে মা গো বৈস ভাল হয়ে।
পায়ে ধরি কি জানি কুমীরে যাবে লয়ে॥
ভবানী কহেন তোর নায়ে ভরা জল।
আলতা ধুইবে পদ কোথা খুব বল॥
পাটুনী বলিছে মা গো শুন নিবেদন।
সেঁউতী উপরে রাখ ও রাজা চরণ॥
পাটুনের বাক্যে মাতা হাসিয়া অন্তরে।
রাখিলা দুখানি পদ সেঁউতী উপরে॥
বিধি বিষ্ণু ইন্দ্র চন্দ্র যে পদ ধেয়ায়।
হুদে ধরি ভূতনাথ ভূতলে লুটায়॥

BANGLADARSHAN.COM

সে পদ রাখিলা দেবী সৈঁউতী উপরে।
তঁার ইচ্ছা বিনা ইথে কি তপ সঞ্চরে॥
সৈঁউতীতে পদ দেবী রাখিতে রাখিতে।
সৈঁউতী হইল সোনা দেখিতে দেখিতে॥
সোনার সৈঁউতী দেখি পাটুণীর ভয়।
এ ত মেয়ে নয় দেবতা নিশ্চয়॥
তীরে উত্তরিল তরি তারা উত্তরিলা।
পূর্বমুখে সুখে গজগমনে চলিলা॥
সৈঁউতী লইয়া কক্ষে চলিলা পাটুণী।
পিছে দেখি তারে দেবী ফিরিলা আপনি॥
সভয়ে পাটুণী কহে চক্ষে বহে জল।
দিয়াছ যে পরিচয় সে বুঝি নি ছল॥
হের দেখ সৈঁউতীতে থুয়েছিল পদ।
কাঠের সৈঁউতী মোর হৈলা অষ্টাপদ॥
ইহাতে বুঝি নি তুমি দেবতা নিশ্চয়।
দয়ায় দিয়াছ দেখা দেহ পরিচয়॥
তপ জপ জানি নাহি ধ্যান জ্ঞান আর।
তবে যে দিয়াছ দেখা দয়া সে তোমার॥
যে দয়া করিল মোর এ ভাগ্য উদয়।
সেই দয়া হৈতে মোরে দেহ পরিচয়॥
ছাড়াইতে নারি দেবী কহিলা হাসিয়া।
কহিয়াছি সত্য কথা বুঝহ ভাবিয়া॥
আমি দেবী অন্নপূর্ণা প্রকাশ কাশীতে।
চৈত্র মাসে মোর পূজা শুরু অষ্টমীতে॥
কত দিন ছি নি হরিহোড়ের নিবাসে।
ছাড়িলাম তার বাড়ী কন্দলের ত্রাসে॥
ভবানন্দ মজুন্দার নিবাসে রহিব।
বর মাগ মনোনীত যাহা চাহ দিব॥
প্রণমিয় পাটুণী কহিছে যোড় হাতে।
আমার সন্তান যেন থাকে দুধে ভাতে॥
তথাস্তু বলিয়া দেবী দিলা বরদান।
দুধে ভাতে থাকিবেক তোমার সন্তান॥

BANGLADARSHAN.COM

বর পেয়ে পাটুনী ফিরিয়া ঘাটে যায়।
পুনর্বার ফিরি চাহে দেখিতে না পায়॥
সাত পাঁচ মনে করি প্রেমেতে পূরিল।
ভবানন্দ মজুন্দারে আসিয়া কহিল॥
তার বাক্যে মজুন্দারে প্রত্যয় না হয়।
সোনার সঁউতী দেখি করিলা প্রত্যয়॥
আপন মন্দিরে গেলা প্রেমে ভয়ে কাঁপি।
দেখেন মেঝায় এক মনোহর ঝাঁপি॥
গন্ধে আমোদিত ঘর নৃত্য বাদ্য গান।
কে বাজায় নাচে গায় দেখিতে না পান॥
পুলকে পূরিল অঙ্গ ভাবিতে লাগিলা।
হইল আকাশবাণী অনন্দা আইলা॥
এই ঝাঁপি যত্নে রাখ কভু না খুলিবে।
তোর বংশে মোর দয়া প্রধানে থাকিবে॥
আকাশবাণীতে দয়া জানি অনন্দার।
দণ্ডবত হৈলা ভবানন্দ মজুন্দার॥
অন্নপূর্ণাপূজা কৈলা কত কব তার।
নানামতে সুখ বাড়ে কহিতে অপার॥
করণাকটাক্ষ চয় উত্তর উত্তর।
সংক্ষেপে রচিত হৈল কহিতে বিস্তর॥
ইতঃপর কহে শুন রায় গুণাকর।
প্রতাপআদিত্য মানসিংহের সমর॥

॥সমাপ্ত॥